

((((((((((((((((_____

المجنونة

تأليف: نسيم مجلى

تقديم: جلال العشرى

162p

مقدمة بقلم

جلال العشرى

يقول الكاتب السويسرى العالمى فريدريش دورينمات ملخصا روح العصر:

"إننا نعيش فى اللامكان يحيط بنا ما لا جوهر له ولا معنى، هناك الدولة والدين والفن، ولكنها غير مرتبطة معا بصلة: بل هى أشياء مجردة طغى عليها التكنيك، وطغت عليها الصورة، صورة ما لا جوهر له "

ومن هنا رأى دورينمات أن الكوميديا هى أنسب الأشكال الدرامية لتصوير هذا العالم وأكثرها تعبيراً عن روح العصر.

فالكوميديا تعمق احساسنا بالتناقض، وتجعلنا ننفجر بالضحك، ومن انفجارات الضحك هذه تتبدى لنا الأزمة فى صورة جديدة، صورة مأساوية قابلة للحل، لأن العقدة الكامنة فى طيات العالم، أصبحت الآن مشكلة طافية فوق السطح، وهذا ما عبر عنه ذلك الكاتب الشهير بقوله " أن الكوميديا هى النوع الوحيد الذى يتفق معنا، لقد انساق عالمنا الى المهزلة انسياقه الى القنبلة الذرية ".

ومن هنا ظهرت عبارة "إن الكوميديا لم تعد كوميديا بحق، ولا التراجيديا هى التراجيديا " لأنها فى النهاية الكوميديا الدامعة أو الكوميديا السوداء أو بالأحرى الكوميديا المسيلة للدموع.

وليس أدل على هذا من أننا لا نكاد ندري من " المجنون " فى هذه المسرحية، هل هى ناهد الفتاة الجميلة التى لم تتجاوز الثامنة والعشرين وتحلم بالزواج والحياة الطبيعية، أم هم أخوات " ناهد " من أخيها الأكبر حامد الى أخيها الأصغر محمود، الى شغالة البيت حسنية، أم هو سعيد وأخواته د. سعاد أخته العانس، ومديحة أخته السيدة، وزينب التى تعمل شغالة عنده هى وابنتها شادية وابنها كمال أم هى سامية جارة ناهد وزوجها فريد، وصديقهم كريكو طبيب الأسنان اليونانى. فالجميع يعملون من أجل هدف، ولا أحد يعرف ما هو هذا الهدف؟ وبالتالي فنحن لا نكاد نعرف من هو " المجنون " فى هذه المسرحية المجنونة؟

أو على حد تعبير أحد اشخاص هذه المسرحية، ولعله حسين الذى يقول فى دهشة وحيرة " مش عارف أقول إيه احنا فى حلم ولا فى علم ".

وهذا هو مفتاح تلك المسرحية التى كتبها الأديب المسرحى نسيم مجلى، الذى يعد واحدا من كتابنا المثقفين الذين جمعوا بين ثقافة النقد وموهبة الإبداع، وبحثوا فى الأسس الفكرية والجمالية لأهم مدارس الأدب والمسرح والنقد فى القرن العشرين، وقارنوا بين النظرية والتطبيق عند رواد هذه المدارس الأدبية من أمثال ت. س. اليوت وبرتولد بريخت وجان انوى وطه حسين وصلاح عبد الصبور. وناقشوا واحدة من أعنف المعارك الأدبية فى تاريخنا الحديث، وهى المعركة التى نشبت بين العقاد ومحمد كامل حسين حول كتاب الأخير " وحدة المعرفة "

وهكذا جاءت مسرحية المجنونة مرآة عاكسة للتغيير الاجتماعي الذي حدث في مصر ما بعد العبور، فلم تعد مصر هي الدولة الاشتراكية التي تؤمن بمبدأ الكفاية والعدل وملكية الشعب لوسائل الإنتاج، وتحالف قوى الشعب العاملة، وحق الجميع في مؤسسات القطاع العام. كما لم تتردد رأسمالية يتحكم في اقتصادها أصحاب رؤس الأموال. ويتصرف في مقدراتها تحالف قوى الأقطاع، وتتدخل في شئونها دولة استعمارية وان تخفت في صورة الاستعمار الجديد.

لا هذا ولا ذاك، وانما اتجهت مصر نحو سياسة الانفتاح، لا الانفتاح الانتاجي الذي يعطى أكثر مما يأخذ، ولكنه الانفتاح الاستهلاكي الذي يأخذ دون أن يعطى شيئاً على الاطلاق. مما أدى الى قيام مجتمع توفيقى لا هو اشتراكي ولا هو رأسمالي ولكنه أقرب الى ما يسمى بمجتمع الرخاء الوهمي أو الزائف حيث تقدم الدولة الخدمات العامة للشعب، دون أن يكون هناك مساس بالتكوين الأساسى للمجتمع. والذي يعنينا من هذا كله، هو أن الطبقة المتوسطة في مصر، نسيت دورها او فقدته، وتحولت بأحلامها وتطلعاتها الى طبقة بورجوازية صغيرة وايضا حقيرة، يهتم كل فرد فيها بمصالحه الشخصية. الفردية والأنانية ... وبزيادة المكاسب الهزيلة التي يسمح بها الانفتاحيون.

لقد فقدت الطبقة الوسطى ثورتها، ورمت سلاحها في منتصف الطريق، وتحول معظم أفرادها الى بورجوازيين صغار، لا يهتمون بغير مصالحهم المباشرة، ولا يدركون إن كانوا يعيشون في حلم أو في علم، كما عبر عنهم أحد أبطال هذه المسرحية.

فأبطال هذه المسرحية يدركون فى وضوح أن هناك شيئاً خاطئاً فى المجتمع، ولكنهم لا يدركون بنفس الوضوح ما هو هذا الشيء، ولا ماهو الأسلوب الذى يعالجون به هذا الخطأ.

والصورة الملحة فى هذه المسرحية هى صورة البطلة ناهد، الفتاة الجميلة التى لم تتجاوز الثامنة والعشرين من عمرها، والتى تحلم بالزواج. وبناء عش الزوجية السعيد، ولكننا نراها دائماً ساخطة على كل شىء.. على أخويها حامد ومحمود، وعلى خطيبها سعيد وأختيه سعاد ومديحة، وعلى جارتها سامية وزوجها فريد، بل وعلى قريبها حسين الذى ستتزوجه فيما بعد. ولا أغالى إذا قلت إنها ساخطة حتى على نفسها وعلى اليوم الذى جاءت فيه الى الحياة.

ولكنها فى ذات الوقت عاجزة عن تحويل هذا السخط الى فعل إيجابى، أو حتى عن تحديد أسباب هذا الغضب، لأن السخط أو الغضب يمكن أن يكون وقوداً فى معركة الحياة. ولكنه لا يشكل موقفاً من المجتمع، أو قراراً فى مواجهة الآخرين.. فهو مشروع قرار، ولكنه ليس قراراً فى حد ذاته!

" لازم أشوف مصلحتى، من النهاردة لازم أدبرأمورى أسويها، ماله لما أفكر مع حسين، وأتعاون معاه، أنا ضايعة، غلبانة، وهو غلبان برضه، خلاص، نكون فريق الغلبة.. أنا وهو ... لازم أعرف كل حاجة...وأعرف رأسمال التجارة كلها "

وإذا كانت كل هذه المعانى التى توحى بها المسرحية، يمكن أن تكون مفتاحاً لعالمها الفكرى، ومضمونها الاجتماعى، فإن كل

شئ فى مسرحية " المجنونة " ينبع من بنائها الفنى، لا من تصريحات الشخصيات ولا من مواعظ الكاتب.

وتتلخص المسرحية، إن جاز تلخيصها، فى أن ناهد الفتاة الجميلة التى تقف على أهبة الاستعداد للزواج، تتنازل عن نصيبها فى الميراث لكل من أخويها حامد الصيدلى، البالغ من العمر أربعين عاما، ومحمود. خريج التجارة وصاحب الصيدلية والبالغ من العمر خمسة وثلاثين عاما، وينجح مشروع الصيدلية، حتى ينجب صديقات أخرى . .

ويعيش كل من حامد ومحمود فى سعة من العيش وبذخ من الانفاق، دون أن يعود شئ من هذا كله على أختهم ناهد، التى قنعت ببقائها فى البيت، ترعى شئونهما وتسهر على راحتيهما، ولو كان ذلك على حساب سعادتها هى.

وكلما تقدم لها عريس عمل الاثنان على إبعاده، بدعوى أنها مجنونة، ولا تصلح للزواج، وهذا ما عبر عنه محمود بقوله: " هبله ومجنونة ... وهتهلبنى معاكى ... كل واحد يقول لك كلمة حلوة تقولى هيجوزنى ... حتى الطبيب النفسانى اللى بيعالجها مجرد أنه يلاطفها شوية أثناء العلاج عشان يرفع معنوياتها ... تخرج من عنده تقولى اسمع يا محمود ... الدكتور معجب بى وعازب يجوزنى ... كفاية تعبتينى ... يا بنت الحلال فوقى بقه ... بلاش فضايح. أنا ها سيب البلد عشانك "

ويرتج على ناهد، فلا تدري إن كانت مجنونة حقا أم عاقلة،
حتى تقنعها جارتها سامية وزوجها فريد، بأنها سوية ولا يشوب
عقلها أو جمالها أى شىء على الإطلاق.

"مش حاسين بى يا مدام اللى معذبنى ... يوم ما أقع من
المرض يجرونى عالدكتور ويوم ما يخلص العلاج وأعود لحالتى
الطبيعية ينتهى كل شىء ... ما فيش اهتمام. ما فيش كلمة تريح ...
عمرهم ما واحد منهم فاتحنى فى كلمة تخصنى. ما بي فهموش انى
أنا بنت زى باقى البنات عايزة تتجوز وتفرح "

تلك هى شكوى ناهد ، شكوى الشعور بالوحدة والاغتراب ،
فهى وحيدة رغم كل من حولها ، وهى مغتربة حتى فى داخل
البيت وبين أفراد الأسرة ، وهى تريد أن تفعل شيئا ولكنها مشلولة
الرجلين لا تتحرك ، مكتوفة اليدين لا تتصرف ، معصوبة العينين
لا ترى ، ولا تجد من يساعدها على الحركة أو التصرف أو حتى
الرؤية ، فالكل مشغول بذاته ، غارق فى أنانيته ، سابح فى
مصالحة الشخصية ، وربما كان الوحيد الذى يشعر بها دون أن
تشعر به ، هو حسين ، قريبها ، الذى يعمل فى الصيدلية ، ولم
يحصل بعد على شهادته الجامعية ، ولكنه لا يستطيع أن يعبر عن
حبه لها لشعوره بالدونية ، فهو دونها مالا وجمالا ، ودون أخويها
شهرة ونجاحا ، فأين يروح الصعلوك بين الملوك !!

وتشعر ناهد بألم فى الأسنان، فتصعد الى جارتها الدكتور
كرياكو، صديق أخيها محمود فى ذات الوقت، والمتعاطف معها
على طول الخط. ويرشح لها سعيد صديق الشلة، مدرس الثانوى

الذى لم يتجاوز الأربعين من عمره، وتوافق ناهد على أن يقوم الدكتور باقناع أخيها محمود بالعريس الجديد.

وينجح كرياكو فى اقناع محمود ، بمعاونة فريد زوج سامية ، ويتقدم سعيد للزيارة وتنتهى الزيارة بتحديد موعد الخطوبة ، وفى الموعد المحدد يذهب سعيد هو وأختاه ... سعاد ومديحة ، ومن ورائهم سامية وفريد ، وبعد مناقشة تبدأ هادئة وتنتهى صاخبة ، حول الزواج ، ومفهوم الحياة الزوجية ، ودور المرأة فى البيت والمجتمع ، والطريقة المثالية لتربية الأولاد ، وأسلوب التفاهم بين الزوج والزوجة فى مواجهة ظروف الحياة ، بعد هذه المناقشة التى تتعدد فيها الآراء ، وتختلف وجهات النظر ، تحتد الدكتور سعاد أخت العريس ، وتنسحب من الجلسة ، تاركة الخيار لأخيها سعيد فى أن يبقى أو ينصرف .

وبالفعل ينصرف سعيد مع أخته سعاد ومديحة، وينفض السامر وتفشل هذه الزيجة كما فشلت زيجات أخرى من قبل، وتعود ناهد لكى تدخل فى محارة أحزانها وهواجسها، وترتد الى شرنقة اللوم والأحزان، وكأنما تؤكد مقولة أخويها حامد ومحمود من أنها مجنونة، لا تصلح للزواج، ولا تقدر على تحمل مسئولية الحياة الزوجية!

وفى الأفق الملبد بالغيوم بين السحابات الداكنة المنذرة بالمطر، يظهر حسين على مسرح الأحداث، وكان قد أعد لابنة عمته الوحيدة ناهد أغنية لكى يغنيها فى حفل الزفاف، تحية لها فى ليلة العمر، ولكنه سرعان ما يعرف من أخويها حامد ومحمود، بفشل المشروع، يبدو عليه التأثير العميق والأسى الأعماق، فحلم حياته

بين يديه، ولكنه لا يجروء على الإمساك به، أو القبض عليه، إنها في حياته كالسراب، إذا ابتعد عنه رآه، وإذا أقترب منه لم يشعر بوجوده، فهو القريب البعيد، الغائب الحاضر.

إنه يدرك تماما حقيقة وضعه الطبقي، وهو يشعر بعاطفة قوية نحو ناهد، وهناك شعور جارف نحوها، العلاقة الصادقة الوحيدة في حياته. ويستدرجه محمود في الكلام حتى يعترف بهذا كله، فيعده بالموافقة على زواجه من ناهد إن هي وافقت أصلا " لا ... مش هزار وحياة أبويا باتكلم جد بس توافق ناهد . والشبكة موجودة والحفلة بكره فى موعدها "

ويؤيد حامد هذا الاقتراح، ويباركه، مشجعا ابن عمته حسين على التقدم الى أخته ناهد: " أنا ما عنديش مانع ... على الأقل يبقى زيتنا فى دقيقنا ... انت ابن عمتنا واخونا الثالث "

وتوافق ناهد على مرأى من الجميع، ويكاد حسين أن يطير من الفرح، بعد أن جاءت له فرصة العمر، وابتسمت له الحياة، وكان يراها غابه مخصبة بالدماء نابا ومخلبا: " وفعلادى فرصة العمر بالنسبة لى ... أنا طول عمرى باحب ناهد ... واتمنى اسعدها "

وهكذا تنتهى مسرحية " المجنونة " مؤكدة أن الجنون فى روح العصر ، وليس فى طبيعة أبناء العصر ، وهو جنون التكالب على المال، والتهافت على النجاح ، جنون الكسب السريع بأقل الجهود وأرخص التكاليف ، جنون " الأنا وحديّة " عندما تسيطر على الجميع ، فيشعر الفرد بأنه انما يعيش هو وحده ، رغم الزحام الشديد فى كل مرفق من مرافق الدولة .

وليس معنى هذا أننا هنا بازاء مسرحية أفكار مباشرة. تهدف اساسا الى مناقشة طائفة بعينها من الآراء، مع عرض الآراء عرضا دراميا عن طريق التعارض والتقابل، أو التناقض والتضاد، ولكننا فى الحقيقة فى عالم المسرحية الواقعية بأحداثه المتطورة، وشخصياته المألوفة، وذروته المرسومة، وكل ما من شأنه أن يشعرونا بنبضات قلب الواقع.

ومع ذلك فقد استطاع المؤلف بحساسيته المسرحية المرفهة، التى تبدو فى أبسط الأمور حتى فى ارشاداته المسرحية، أن يطور من صياغته الواقعية، مقدما اضافة جديدة الى الفن الدرامى، وهى الإضافة التى تبتعد عن التجريبية الساذجة التى تفتق الى النضوج، بقدر ما تبتعد عن الواقعية المباشرة التى عانى منها مسرحنا أكثر من معاناته من التجريبية، فالواقعية هنا مشحونه بالمعنى والدلالة، حيث يجدل الواقع والرمز فى نسيج واحد. وحيث تومىء الشخصية المتفردة المرسومة بكل دقة وعناية الى معنى أكبر منها دون أن تتردى لحظة واحدة فى هوة الرمز أو التجريد.

وتتمثل الإضافة الأخرى التى يقدمها المؤلف فى هذه المسرحية، فى ذلك النهج شبه التشكيلى الذى يتوزع فيه الاهتمام بين أكثر من موقف فى المشهد الواحد، مع التفاعل المستمر بين هذه المواقف بحيث يطور بعضها البعض داخل كل فصل على حدة ثم داخل فصول المسرحية كلها مرة واحدة.

ومن هنا جاء تعدد المشاهد فى البناء المعمارى للمسرحية، حيث يقع الفصل الأول فى أربعة مشاهد، والفصل الثانى يقع فى خمسة مشاهد، أما الفصل الثالث والأخير فيقع فى ستة مشاهد.

وتتبع أهمية هذا الأسلوب فى أن كل مشهد مسرحى يكتسب عمقا جديدا بتفاعله مع بقية المشاهد الأخرى، دون أن يكون لهذا الأسلوب علاقة بالمنهج المألوف عن تطوير المشاهد فى شكل جزئيات تؤلف كلا متكاملا.

وتتصل بهذه النقطة نقطة جوهرية أخرى، تتعلق برسم الشخصية، ونمو هذه الشخصية نموا دراميا، يؤدى الى تطور الحدث، فإذا كانت الشخصية الدرامية تتكشف اساسا من خلال علاقاتها بالشخصيات الأخرى، كان لزاما أن تكون الشخصيات جميعا حية ومكتملة، وليست مجرد أنماط مجردة

ولذلك كان من الطبيعى أن تفقد المسرحية هدفها حين تتخلى عن الشخصية، وخاصة إذا كانت المسرحية ... مسرحية شخصية رئيسية أو محورية كما فى حالة " المجنونة " وهذا ما جعل الكاتب يحرص على البعد الدرامى فى رسم شخصيته المحورية ... حتى لا تكون مجرد شخصية موجهة لابرار فكرة بعينها أو معنى بالذات.

ولقد تجلّى هذا البعد الدرامى فى جعل الشخصية خاضعة للصراع الداخلى، وليست عرضا لأحداث خارجية. فالصراع الداخلى يعمق الاحساس بدرامية الشخصية، وبالعلاقات المتفاعلة

مع الشخصيات الأخرى، على العكس من الأحداث الخارجية التي تبدد جوهر الشخصية وتحيله الى كلمات تذروها الرياح.

وهذا أساس من أسس الإبداع المسرحى، حين تكون الوسيلة الفعالة لتطور الفكرة هى تطور الشخصيات الحية، وتطور العلاقات فيما بينها، على نحو يحقق لنا فى النهاية ما يعرف بالتنوير.

وتأسيسا على ذلك فان كثرة الشخصيات التى لا دور لها يعد عيبا أساسيا فى المسرحية لأن تعدد الشخصيات يؤدى الى تشتت الحدث فى المسرحية، وتوزع الفكرة الرئيسية، من ذلك مثلا شخصية عاطف بطرس وصلاح، وهما زميلان لسعيد فى المدرسة، أحدهما مدرس كيمياء والآخر مدرس تربية رياضية، ومن ذلك أيضا شخصية زينب التى تعمل عند سعيد، وحسنية التى تعمل عند ناهد، وفاطمة التى تعمل عند الدكتور كركاكو، وكلها شخصيات ثانوية، هشة أو هامشية لا تثير اهتمامات خاصة بها أو بما تقوله، وان أدت الى تشتت الحدث وتمزيق الفكرة.

على انه بالرغم من أحكام بناء المسرحية، فان مشاهد بعينها كان يمكن حذفها دون أن يتأثر هذا البناء، أو يختل ذلك الأحكام، وبخاصة الأغنية التى أعدها حسين، واختتم – المؤلف بها المسرحية، والتى جعل اسمها: (من أمتى كان اللى انكوى بالحب تاب).

وبالرغم من سلامة حوار المسرحية وسلاسته فى أكثر الأحيان حيث وفق الكاتب فى استخدام اللهجة العامية. استخداما

فنيا ملائما لطبيعة الشخصيات التى تتكلم هذه اللهجة، إلا ان بعض الجمل الحوارية ، جاءت حائرة بين عامية اللهجة وفصحى اللغة . وكان ينبغى على الكاتب ان يمسرحها اعنى لغة المسرحية بلون واحد.

وان كان لنا أن نشيد بجهد المؤلف فى نسج الحوار، والذى جاء معبرا عن لسان حال الشخصيات، وليس عن فكر الكاتب، بحيث تتحول الشخصيات الى أبواق تردد كلمات المؤلف وأفكاره، من ذلك مثلا قول البطلة، ناهد فى نهاية المشهد الأول من الفصل الأول: " أدى أول خطوة سليمة.. مدام سامية مدرسة، وجوزها كمان مدرس، وناس طيبين ... يمكن الحظ يضرب والسنارة تغمز.. لكن ده مش كفاية حتى لو جه العريس المناسب .. اخواتى هيطفشوه. هيقولا مريضة ومجنونة زى كل مرة ... انا لازم ألعب بعقلهم وأجننهم لحد ما يفهمونى صح "

فهذا نوع من لحوار الجامع بين البساطة والسلاسة ، والمعبر عن لسان حال الشخصية وليس عن رأى الكاتب أو فكرة ، وقد ينحدر هذا الحوار البسيط السلس ، فى بعض الأحيان الى بلاغة لغوية أو مسرحية ، مما يسىء الى لغة العمل ككل ، ولكن المسرحية كما هو واضح تتجنب الألفاظ الضخمة ، والكلمات الرنانة ، والشعارات البراقة ، لكى تحقق أقصى قدر من الصدق والعمق بأبسط الكلمات ، وأسلس العبارات .

وليس أدل على ذلك من أماكن أدراج هذه المسرحية، تحت ما يسمى ب " دراما الأسرة " وهو اللون المسرحى الذى افتقدناه زمنا طويلا، وليس أكثر من حاجتنا اليه الآن، على أن نضع فى

الأعتبار انه لا يمكن أن يثير فينا الاهتمام ما لم يقنعنا بصدقه، فالصدق وأنا أعنى به الصدق الفنى وليس الصدق الواقعى، هو مفتاح هذه المسرحية أو هذا اللون من الفن المسرحى!

اننى بالرغم من ايمانى بأن أى فن حقيقى لابد أن يكون بالضرورة فنا ملتزما، إلا أن الالتزام عندى لا يعنى الخروج بالفن من نطاقه الخاص الى أفاق الوعظ والأرشاد أو الخطابة والمباشرة، وبذلك يصبح الصراع الحقيقى صراعا بين الفن واللافن.

بين المسرح الذى ينطوى على الفرجة والفكر، وعلى المتعة والرأى، وبين المسرح الذى يعتمد على النكتة والقافية ومشاهير النجوم.

وعندما ينبذ الجمهور تلك المسرحيات التى تظهر متكررة فى هيئة فن ، يجد نفسه فى قلب الفن الحقيقى ، وفى رحاب المسرح الجاد .

واننا فى بحثنا الجاد عن أعمال فنية تمتع الروح والعقل والبصر، وفى تطلعنا الى كل ما هو مشرق وجميل وأصيل، لايسعنا إلا أن نضع هذا النص المسرحى " المجنونة " فى عداد هذه الأعمال التى تنطبق عليها تلك المواصفات، الامتاع والإشراق، الى جانب الأصالة والجمال.

(نشر هذا المقال فى العدد 88 من مجلة القاهرة بتاريخ 15 اكتوبر 1988 بعنوان " إنها حقا مجنونة " وقد اخترته ليكون مقدمة لهذه الطبعة الجديدة)

رأى المخرج حسن عبد السلام في هذه المسرحية

قرأت نص مسرحية المجنونة فسعدت بها لأنها أعادت للمسرح المصرى نوعا مسرحيا افتقدناه وهو مسرح العائلة التى هى نواة المجتمع ولها وبين سطورها الكثير من العبر والعظات والإنذارات والكشف والتعزية والصدق الكامل فى الرسم والنحت والتشكيل والبحث فى الأغوار الإنسانية. المجنونة عمل طيب صياغة فنية راقية

هذا رأى فى العمل الذى أحب أن أخرج به بإذن الله مع شكرى.
المخرج حسن عبد السلام

1997-6-17

ومع ذلك رفضت الدكتور هدى وصفى، وكانت تتولى إدارة المسرح القومى، رفضت الموافقة على قيامه بخراجها بحجة إنه مريض وتعبان صحيا.

=====

المجنونة

رؤية رجل لعالم المرأة

بقلم: ناهد نجيب

(هذا حديث أذاعته الأستاذة ناهد نجيب بالإنجليزية فى البرنامج الأوربي)

لقد أصبحت تيمة المرأة الوحيدة أو غير المتزوجة موضوعا للكوميديا فى العالم كله. والمصطلحات التى كانت تستخدم لوصف هذه المرأة هى، عانس أو بنت فاتها قطار الزواج، هذه الألفاظ باتت مهجورة الآن.

لكن تغيير هذا المفهوم أخذ وقتا طويلا، ومصر لم تكن استثناء فى هذا الحال. فقد ظلت المرأة غير المتزوجة موضوعا لإثارة الضحك والقهقهات فى مسرحيات الريحانى والفرق المسرحية الخاصة الأخرى وكانت السيدة مارى منيب شريكة للريحانى تقوم بهذه الأدوار التى لاتنسى وهى ممثلة قديرة يستعصى على أى ممثلة أخرى تقليدها..

كان هذا منذ خمسين عاما او يزيد ومع ذلك فهذا التقليد لايزال مستمر فى أعمال قدمت فيها المرأة الوحيدة أو غير متزوجة كمدرسة أو ناظرة كشخصية معقدة، وفى هذا تقليل كامل من قيمة النساء المكرسات اللأئى تركزن لإعالة أسرهن باعترارهم

المصدر الوحيد لكسب العيش، مضحين بفرص الزواج من أجل تربية أخوة أو أخوات صغار.

لقد حدث علاج لهذا الوضع أخيرا عن طريق السينما والتلفزيون إذ بدأ الاهتمام بالتعمق فى دراسة شخصية المرأة غير المتزوجة. إحدى هذه الحالات رواية " ليلة القبض على فاطمة " للكاتبة سكينة فؤاد، وهى الرواية اتى تحولت إلى فيلم ثم إلى مسلسل تلفزيونى فكانت هذه الرواية ضربة معلم. هذه المرة امرأة تكتب عن عالم المرأة.

أما المسرحية التى نتحدث عنها هذا المساء " المجنونة " فإنها تتناول نفس الموضوع أيضا. ولكن الكاتبة هذه المرة رجل، هو نسيم مجلى، وبطلته هى ناهد، والمفترض أنها مجنونة. وكما يشير فى الحوار وفى مواقف كثيرة للرجال بأنها ظلمت من جانب أخوتها. فقد باعت نصيبها من الأرض لكى تساعداهم على فتح أجزاخانه، وقد كبر المشروع والإجزاخانه الواحدة صارت إثنين، لكل واحد منهما إجزاخانه، ولم تحصل هى على شىء. وقد أحست بالضيق خصوصا وأنها لم تكمل دراسة المرحلة الثانوية بسبب تفرغها لرعاية أمها المريضة التى توفيت منذ سنين، وهى الآن تعيش فى رعايتهما، وعلى هذا فهى ليست مؤهلة لطالبي للزواج..

مع ذلك، فإن أخزيها مازالا مستمران فى رفض الخطاب القليلين الذين يأتون من وقت لآخر يطلبون يدها على أساس إنها مجنونة ولاتستطيع أن تتحمل أعباء الحياة الزوجية هذا هو الوضع : الشخصية مألوفة ، الفتاة غير المتزوجة المصابة بالعقد..

والكاتب بغوص فى أعماقها باحثاً عن عقدتها وعن الهواجس التى تدفعها للإلحاح فى طلب الزواج..إ. إنها تذكر أخويها بأنها باعت قطعة الأرض التى كانت تملكها لكى توفر لهما المال اللازم لمشروعهما ,إن نجاحهما كان بسبب أموالها .والأخوان جرى تصويرهما كشخصيات مادية لاتحس بمشاعر هذه الأخت ولاتفطن لاحتياجاتها كفتاة فى سن الزواج. فقط يسرعون بها إلى الطبيب حين تقع مريضة.

هناك شخص واحد فقط هو حسين الذى يحبها ويتعاطف معها ولا يقدر على شىء آخر، لأنه مجرد عامل يشتغل فى صيلية أحدهما. هناك صداقة قوية تربط بين ناهد وحسين، لكنه لا يستطيع أن يتقدم لخطوبتها ولا يجرؤ على هذا، إلا أنه يقدم النصيحة والعطف ويكتب الشعر. وفى هذا بعض العزاء لناهد ولكن كما يريد الكاتب، ناهد لديها حاجة ملحة لطب الزواج. ومن أجل هذا يتطوع بعض أصدقاء العائلة بالبحث عن عريس لتاهد ويقع اختيارهم على صديقهم سعيد، وهو مدرس تربية فنية فى المدرسة الثانوية ويشبه ناهد فى بعض حالاته النفسية وقد حاول الإنتحار ذات مرة.

وبعد كثير من الأحداث التى تجرى ضمن حبكة مجدولة بإحكام بحيث يتعذر علينا أن نرويها هنا بالتفصيل، يوافق أخوها على قبول خطبة سعيد لناهد وتتظاهر هى بالقبول. لكن هذا ليس هو الحل الذى يصر عليه المؤلف. الحل الصحيح فى رأيه هو أن تتزوج ناهد الشخص الذى متحها الحنان والفهم والصداقة وأحفى حبه المبرأ من الأنانية. هذا الشخص هو حسين ابن عمتها الذى يعمل عند أخويها..والنهاية السعيدة هى أن يتزوجا .

كان اختيار الكاتب لموضوعه مسألة فى غاية الأهمية لأنه يتحدى واحدة من المفاهيم الإجتماعية السائدة التى تقوم على أساس أن المرأة غير المتزوجة هى امرأة مغقدة. لهذا فإنه يصف بالتفصيل المواقف الكثيرة التى ضحت فيها من أجل هذين الأخوين دون أن تفكر فى نفسها، وهما الآن لايهتمون بمشاعرهما، لكن الكاتب يبدو فى كثير من الأجزاء وكأنه يقبل هذه الفكرة ويتحداها فى نفس الوقت ، ومن ثم فإنه ينهى الصراع فى المسرحية بالزواج. وفى أجزاء أخرى يظهر بصيرة ثاقبة وعمق، عندما يصر على حق المرأة الوحيدة فى ان تخرج ألى المجتمع حينما تريد، كما يصر على حقها فى الحرية واختيار الزوج الذى يناسبها..

زد على ذلك أن الحوار فى المسرحية يتميز بالسلاسة والدهاء. تصويره للشخصيات يتراوح بين التصوير الكركاتورى كما فى رسمه لشخصية الخواجة كريكو كاتونيللو طبيب الأسنان، الذى يحاول الكاتب من خلاله أن ينطق ببعض المفاهيم التى مازالت غريبة على مجتمعنا، وكذلك تصويره لشخصيتى أخويها تصويرا خارجيا مختصرا، كل هذا مقابل تصويره الشديد العمق لشخصية حسين. أما تصويره لشخصية ناهد فإنه يتصاعد من التصوير من الخارج وتصويرها من الداخل ومحاولة استيطان أعماقها ومشاعرها الداخلية، التى تكشف عن حقيقتها كفتاة أسوء فهمها بقسوة من المجتمع المحيط بها والبيئات أخونها

المسرحية جزء من المسرح الواقعى الذى كان رائده الأول والمدافع عنه الأستاذ نغمان عاشور. رغم إغراقها فى الواقعية

فإن هذه المسرحية تعكس افكارا جديدة وكما قلنا إنها تتحدى
مسلمات مقبولة اجتماعيا إلا أن الأمر لا يزال هو عالم المرأة كما
يراه الرجل، وقد يبدو من الغلظة أن نلومه على ذلك. ومن ثم فإنه
من الممكن للمستمعين المهتمين بهذا الموضوع أن يقرأوا قصة
"عمة رفيق" للكاتبة العراقية ديزى الأمير. وهى قصة قصيرة
سنقراها فى البرنامج الأوروبى الأربعاء القادم بإذن الله. utc. فى
هذه القصة نجد سيدة محترمة كرسى حياتها لقضية أخيها
المناضل لكنها تستيقظ بعد فوات الأوان لتجد ان الأسم الذى
أعطاه لها المجتمع هو "عمة رفيق" أو "أخت الرجال" وليست
زوجة أحد من الناس. كان القصد من ذلك تكريمها، إلا أن المؤلفة
لم يفوتها أن تشير إلى تلك المرارة التى تختزن فى الأعماق.
لكل كاتب وجهة نظره الخاصة وفى الأحاديث القادمة سوف نقدم
مسرحيات أخرى تلقى مزيدا من الضوء على هذا الموضوع أو
غيره.

هذا كل ما لدينا هذا المساء. نشكركم على حسن استماعكم
وانتظرونا فى السبوع القادم.

الشخصيات :

- 1- ناهد: (المجنونة) فتاة جميلة فى الخامسة والعشرين .
- 2- سامية: سيدة جميلة فى الثلاثين من العمر. (جارة ناهد)
- 3- فريد: زوج سامية . مدرس فى حوالى الأربعين
- 4- حسين: شاب تعدى العشرين بقليل . قريب ناهد ويعمل عندهم.
- 5- حامد: صيدلى فى الأربعين . الأخ الأكبر لناهد.
- 6- محمود: فى حوالى الخامسة والثلاثين. الأخ الثانى لناهد. خريج تجارة وصاحب صيدلية
- 7- كريكو كاتونلو: طبيب أسنان يونانى فى حوالى الستين. جار وصديق محمود
- 8- حسنية: فتاة فى حوالى الرابعة عشر تعمل عند ناهد .
- 9- نوال : سيدة فى حوالى الخامسة والعشرين جميلة وممتلئة .

- 10- سعيد: مدرس ثانوى فى الأربعين خطيب ناهد.
- 11- د.سعاد: أخت سعيد الكبرى. أنسة فى الخمسين ممثلة جاحظة العينين تميل إلى السمرة.
- 12- مديحة: أخت سعيد. سيدة فى الخمسين ممثلة الجسم.
- 13- صلاح الجناينى: مدرس تربية رياضية زميل سعيد فى حوالى الثلاثين.
- 14 – عاطف بطرس: مدرس كيمياء زميل سعيد فى سن صلاح تقريبا
- 15- فاطمة: سيدة جميلة فى حوالى لثلاثين. تعمل عند الدكتور كريكو
- 16- زينب: سيدة جميلة سمراء خمريّة اللون فى الأربعين من العمر تعمل عند سعيد.
- 17- شادية: ابنة زينب. طفلة جميلة تبلغ من العمر عشر سنوات.
- 18- كمال: طفل فى حوالى السابعة.. ابن زينب.
- 19- اسعد الفقى: شاب فى الثلاثين من عمره.

الفصل الأول

المشهد الأول:

صالة فسيحة الى حد ما.. باب الشقة فى مواجهة الجمهور الى اليمين بحيث نرى الداخل والخارج. الى اليسار يوجد انتريه مفتوح على الصالة والى جواره حجرة المائدة وهى مفتوحة على الصالة من ناحية وعلى الانتريه من ناحية أخرى بحيث يظهر كل شىء للمتفرج.

الأثاث حديث ويدل على الثراء الطارىء. عند رفع الستار تظهر ناهد فتاة جميلة ناضجة ممثلة في حوالى الثامنة والعشرين. لا تكاد تتقدم لكى تغلق المذياع الموجود فوق اليوفيه على أغنية

(ودع هواك وانساه لعبد المطلب) حتى تلتقط صورة كبيرة لعريس وعروسة. فتقلبها على وجهها.. ثم تنادى.

ناهد: بت يا حسنية .. مين اللى جاب صورة نجية هنا
حسنية: سى محمود يالليل. عايز يعمل لها برواز ويلقها.
ناهد: اسمعى الصورة دى لازم تختفى .
حسنية: لكن دى مرة أخوكى الكبير ويمكن ياخذ على خاطره.
ناهد: اللى مايعجبوش ينفلق. كفاية عليه يعلقها فى رقبتة
حسنية: وسى محمود.

ناهد: (بصوت غاضب) كلمة واحدة قللتك . أنا لما باشوقها
بيركبنى ستين عفريت. وانتى عارفة طبعاً .
حسنية: سلامتك ياستى. انشالله ع قباعدلك . نفسى
أغمض عينى وأفتحها وأشوفك جنب ابن الحلال.
ناهد : كان زمان وجبر المهم شوفى مكان ادفنى فيها
صورة المخفية دى والمحروس بتاعها تتجه الى داخل
الشقة)

حسنية: امرك ياستى (تتأمل الصورة) والنبي صورتك تبقى
قمر يا ستى. نفسى افتح الباب القى ابن الحلال قدامى
(تلف الصورة فى ورقة وتضعها فى البوفية . وفجأة
يدق جرس الباب فتسرع نحوه، ولا تكاد تفتحه حتى
يندفع الى الصافة شاب متوسط القامة يغطى رأسه شعر
طويل منكوش تعدى الثلاثين من العمر. يندفع الى الصالة
وهو يتكلم)

الشاب: فين سيدك. فين ستك؟
حسنية: (تتراجع فى خوف) ايه ده ؟

الشاب: (يتوقف عند منتصف الصلاة ويتلفت حوله فى انبهار)
يا صلاة النبى
حسنية: يا فتاح يا عليم.
الشاب: ايه يا بت بعبع .. وشى مش عاجبك ؟
حسنية: (بصوت مرتفع) انت عايز ايه ؟
الشاب: عايز شقة .. فهمتى ؟ شقة وبس.
حسنية: اسما لله عليك يا أستاذ السكة غلط
الشاب: (صارخا) نهارك زى بعضه .
حسنية: أعوذ بالله – انت ايه اللى حدفك علينا النهاردة ؟
الشاب: حدفنى الهوى .. عارفة يعنى ايه الهوى ؟
حسنية: (تنتظر فى صمت ثم تبتسم) ايوه .. ايوه يا أستاذ
الشاب: نفسى فى شقة حلوة وجميلة زيك كده.
حسنية: نعم يا أستاذ . ؟
الشاب: مش ده بيت الدكتور محمود صاحب التجارة والعمارة
اللى هناك ؟
حسنية: ايوه بيته يا أستاذ يلزم خدمة ؟
الشاب: (بخفة روح) ما تقولى كده من الأول .. كان لازم
تقطعى نفسى.
حسنية: أسفة يا استاذ.. أصل خضرتك دخلت البيت كده
محدوف زى القضا خلتنى اتلخبط.
الشاب: أنا اللى متلخبط على الآخر. خمس سنين داير على شقة
كل مرة ألقى عروسة ونتفق على الجواز ما نلقاش الشقة
(يقرب منها) تصدقى ثلاث عرايس زى المانجة طاروا
منى واحدة ورا الثانية لما عقلى قرب يطير.
حسنية: (وهى تتسلى بمنظره) وبعدين يا أستاذ ؟
الشاب: قلت أضمن الشقة أولا وبعدين اشوف العروسة.

حسنية: (فى خشونة) واحنا مالنا يا استاذ ؟
الشاب: مالك ازاي؟ العروسة عايزة الشقة والشقة عندكم.
فى العمارة الجديدة.
حسنية: أنا ما أعرفش حاجة عن الشقة .دى.
الشاب : انده لى حد كبير اتفاهم معاه .
حسنية : (بغضب) انده لك ست ناهد ترد عليك .
(وفى هذه اللحظة تأتى ناهد من الداخل وهى تنادى
بصوت عال)
ناهد: بت يا حسنية .
الشاب: (وقد أخذته المفاجأة) ياه ... يا صباح الفل
والياسمين.
ناهد : ايوه يا أستاذ ؟ (وهى تبتسم)
الشاب : (ينظر اليها باعجاب شديد) أيوه . أيوه أصل أنا
عايز أجوز وجيت عشان.
ناهد : (بفرح) أهلا يا أستاذ
الشاب : قلت أضمن شقة عشان العروسة ما تفلتش منى .
ناهد : (فى تردد) انت خاطب يا أستاذ ؟
الشاب : ثلاث مرات وحياتك .. اخطب وتستمر الخطوبة سنة
أو سنتين .. وبعدين يجى واحد تانى ويلطشها.
ناهد: ولقيت عروسة نانى ؟
الشاب: أنا أمى راضية عنى خالص النهاردة .. عشان يظهر
انى لقيت الشقة والعروسة (يشير اليها)
ناهد: (بفرح) ألف مرحب يا أستاذ (تلتفت الى حسنية)
الحقى اندهى محمود .. ثم تقترب منه وبلهجة رقيقة)
ايوه يا أستاذ.. كنت بتقول ايه؟
الشاب: بأقول عايز أتجوز.

ناهد : تجوزنى . أنا يا أستاذ؟
الشاب: ياريت يا ستى .. تعرفى لو حصل أبقى اسعد انسان
على وجه البسيطة.
ناهد: أنت شفتنى قبل كده يا أستاذ
الشاب: كفاية انى شفتك الوقت، أنا لو اصطحب بوجهك البشوش
ده كل يوم مش حأعرف الزعل تانى.
ناهد: (فى خجل وسعادة) شكرا يا استاذ .

الشاب: صدقيني يا آنسة. ثلاث مرات أخطب ما حسيتش أبدا
بالفرحة لكن أول ما شفتك انفتح قلبي فى الحال.
ناهد: (تستعذب الكلام " وتسرح معه ") آه يا أستاذ

الشاب: (يقترب منها أكث) كل حاجة فيك بتشدنى وتخلى
قلبي يدق ولسانى ينطق صدقيني يا آنسة.
ناهد: مصدقك والله يا استاذ .. بس عايزه
الشاب: عايزه تعرفيني .. اسمى أسعد الفقى. مدرس علوم
بمدرسة الزراعة الثانوية. آه – والللة طيب وغلبان وابن
ناسى كويسين أوى ... بس شكلى كده زى ما انتى شايفه
ياترى يعجبك.

ناهد: أوى .. أوى يا أستاذ.
اسعد: مش باقولك قلبي انفتح لك من أول نظرة .
محمود: (يأتى مسرعا من الداخل فى حالة غضب شديد) ايه
ياجدع انت اللى جابك هنا ؟ هى وكالة من غير بواب.
مافيش أدب ما فيش أخلاق؟؟؟
اسعد: أسف يا استاذ .
محمود: (يدفعه من أكتافه الى الخارج) اتفضل مع السلامة

.. البيوت لها حرمة يا محترم.
 اسعد: لكن أنا ما تعدتس على بيتك .. أنا قصدى شريف والله العظيم.

محمود: (يواصل محاولات دفعه للخارج) يحزن عليك ربنا
 الشاب: انتظر يا أستاذ (بصوت مرتفع) أنا جاى اطلب ايد أختك.

ناهد: استنى يا محمود (تتحرك ناحيته) اسمع شوف الأستاذ بيقول ايه.

محمود: (لا يهتم بكلامها) ما كانش ينعز (يدفعه) بره ما عندناش بنات تتجوز

اسعد: (عيناها متعلقتان بناهد وكأنه يستنجد بها)
 ناهد: (تتظر الى اسعد بلهفه وتمسك محمود تحاول منعه) ايه ده يا محمود ما يصحش كده ! (ثم تصرخ فيه) خلى الأستاذ يكمل كلامه.

محمود: (يحاول التخلص منها) اسكتى بلاش هبل يا مجنونة

اسعد: (يقاوم محاولا البقاء فى مكانه) مش كده يا أستاذ . أدبنى فرصه اشرح لك .

محمود: (يدفعه) كفاية تشرح للتلاميذ بتوعك فى المدرسة.
 ناهد: (تحاول الخروج لتمسك بأسعد لكن محمود يدفعها ويصفع الباب خلفه بغیظ) لا .. لا مش كده. معقول ده ليه كده تكسر حظى فى كل مرة.

محمود: (يصفعها على وجهها بقوة) استكتى يا مجنونة عايزه تقضحينا.

ناهد: لا ، لا مش معقول كده (تنخرط فى البكاء حتى تنهار ثم تسقط على الأرض.)

محمود: هبله ومجنونة وهتبلينى معاكى . كل واحد يقول لك كلمة تقولى بيحبنى. وكل واحد يضحك لك تقولى هيجوزنى. حتى الطبيب النفسانى اللى بيعالجها مجرد انه بيلاطفها شوية أثناء العلاج عشان يرفع معنوياتها بعدين تخرج من عنده (وهو يتحدث الى الجمهور) تقوللى اسمع يا محمود الدكتور معجب بى وعاييز يجوزنى. كفاية تعبتينى (بنبرة حزن) يا بنت الحلال فوفى يقه. يلاش فضايح. أنا هاسيب البلد عشانك (يخرج ويصفع الباب خلفه بقوة)

ناهد: (بحقد وتشنج) طيب يا محمود ان ما وريتكم

النجوم فى عز الضهرية. (تواصل البكاء)

حسنية: كفاية. كفاية ما تقطعيش قلبى.

ناهد: (تسترد تماسكها) انا لازم أعمل حاجة تقلب حالهم.

لازم انتقم منهم . أنا هاحرق البيت واحرق نفسى كمان.

حسنية: يا مصيبتى يا ستى !وهتسببى لمين؟

ناهد: ايوه يا حسنية. آمال أعمل ايه عشان يحسوا بى.

حسنية: تفكرى فى حاجة تانية .. عشان تتجوزى وتفرحى

بشبابك

ناهد: آخذ بعضى وأروح ورا العريس ؟

حسنية: وهتروحي فين اذا كان مالوش شقة .

ناهد: طيب أعمل ايه تانى .. الحال ده مش ممكن يستمر.

اخواتى ألتاح. ألتاخ ما عندهمش احساس ولا

مسئولية.

حسنية: مش قال انه مدرس فى الزراعة. يبقى الأستاذ فريد

يعرفه ومدام سامية صديقتك وبتحبك خالص.
ناهد: مدام سامية هي الست الوحيدة فى العمارة اللى بتحبني
وتخاف على.
حسنية: خلاص نفول لها تخلى جوزها يشوف العريس ده
ناهد: (تضحك فى هيسثيريا ثم تتوقف فجأة) لكن اخواتي
هيمنعوه..كل واحد يجى يطردوه ويقولوا على مجنونة..
أنا ها جننهم
حسنية: ناوية تعملى ايه؟
ناهد: ما فيش غير حاجة تقلب حالهم وتريحنى (تبدأ تمسك
بالكراسى وتقلبها على بعض) لازم أخليه كوم تراب.
ناوليني صفيحة الجاز بسرعة.
جسنية: (تصرخ بصوت عال) يا مصيبتى (تجرى نحو الباب
تفتحه) الحقينا يا أبله سامية .. الحقونا يا ناس (تعود
تمسك بناهد تحاول منعها لكن ناهد تدفعها بقوة فتسقط
على الأرض وبعدها تتعثر ناهد وتسقط ايضا)
(وفى هذه الأثناء تدخل مدام سامية وهى فى حوالى
الثلاثين جميلة وعطوفة تتأثر بحالة ناهد فتنحنى عليها
وتربت على جسمها ووجهها وهى تحاول تهدئتها)
سامية: كفالله الشر .. جرى ايه يا ناهد؟
ناهد: قال أنا مجنونة يا أبله سامية ؟؟
سامية: (تضحك بصوت مسموع) فشر .. مين قال كده؟
ناهد: المضروب فى قلبه محمود .. طرد العريس وقاله دى
مجنونه ما تنفعش
سامية: هو ده كان جاى عشان يخطبك
ناهد: كان جاى يسأل على شقة ولكن أول ما وقعت عينه على

- ناهد: كان جاى يسأل على شقة ولما شافنى عينيه اتلقت بى
وقال عايز أجوزك ...
- حسنية: (بعد أن رتبت الكراسى المقلوبة) هو مدرس فى
الزراعية وفريد بيه لازم يعرفه
- سامية: خلاص .. ولايهمك يا ناهد.. نجيبه. أو نجيب غيره.
ألف عريس يتمنوا يجوزوا واحدة زيك..
- ناهد: أنا ؟ .. (وهى تهز رأسها فى مراره) مش منظور .
سامية: مين قال كده (تمسك يدها وتربت على جسمها
وشعرها فى اعجاب) الجمال ده كله . الشفايف اللى
زى الورد. والخدود الحمرا اللى زى التفاح الأمريكانى
(تفرد شعرها) يا وعدى على الشعر الحرير. كل
الأوصاف اللى بيتمنهاها الشبان.
- ناهد: تهز رأسها كمن لا يصدق) الكلام على الحظ .
- والفرص بتيجى مرو واحدة بس ما بتتكررش.
- سامية: (تبتسم باستغراب) بقى ده كلام تقوله واحدة حلوة زيك
. الفرص قدامك كثيرة انتى عملتى ايه لسه. سنك كام
سنة عشان تياسى كده.
- ناهد: ثمانية وعشرين سنة .. ثلاث أرباعها غلب. سجن مع
الأشغال الشاقة. قعدونى من المدرسة من سن انتاشر
سنة عشان أخدم أمى أول ما أصابها المرض. ثلاث
سنين وربنا افكرها. وابتديت انتقل معاهم من
المنصورة لاسكندرية. لحد ما خلصوا الجامعة. الكبير
طلع صيدلى كبير. والثانى واخد بكالوريوس تجارة وأنا
بس اللى طلعت فشوش، لاشهادة ولا ميراث فى ايديا.

سامية: (تضحك) فشوش ؟ ازای تكونيش بتخذى العين
عندك الخير ده كله والمكاسب والتجارة وهتطلعى
فشوش ازای؟

ناهد: (بغیظ وحسرة) مش ضامنة حاجة. أنا كان نفسى اتعلم
واخذ شهادة زى اللى اتعملوا ويبقى لى شغلة اعتمد
عليها.

سامية: روقى . خدنا ايه من التعليم والشغل – من الشغل للبيت
زى البقرة اللى فى الساقية طول اليوم. كنس وطبخ
وغسيل يعنى ايه زايد علينا – ستات البيوت أفضل ألف
مرة – والشبان بيفضلوهم عن الموظفين.

ناهد: تعرفى خطيبة الدكتور حامد نجية بنت عمتى ؟ ما
تعرفش الألف من كوز الدرة، شكلها تحفة، لاجسم ولا
وشكل صبوح وقال بيموت فيها . وهى بتكرهنى موت
وهو يقول ما اخدش غيرها . مش بقولك حظ.

سامية: بكره حظك يضرب وتتجوزى زى نجية .

ناهد: مش باين .. انتى عارفة يا ست سامية ايه اللى حصل
أمبارح؟ خدونى الشهر العقارى وقعت على بيع
الأرض. آخر ما أملك فى الدنيا.

سامية: (تتأثرو تكاد تبكى) وبيعملوا كده ليه؟ همه عايزين ليه
ياخدوا أرضك؟؟

ناهد: ما خدوهاش . دول باعوها..

سامية: ازای ده هم يبيعوا ولا يشتروا . اجز خانتين وتجارة
واسعة ويبيعوا أرضك كمان.

ناهد: الحكاية قديمة يا أبلة سامية. من ايام مادخلوا الجامعة
كانوا بيعضوا فى الفلوس بهيل، وابتدوا يبيعوا الأرض

فدان ورا فدان. ما خلوش غير فدانين بتوعى. ولما فكروا فى عمل اخزاخانة ما كانش معاهم فلوس.. قالوا نبيعهم. الكبير كان تعبان فى شغله والمضروب فى قلبه محمود ما كانش لاقى شغلة بشهادة التجارة... قالوا نبيع الفدانين بتوعك ونفتح أخزاخانة قلت بيعوهم. الكلام ده كان من تسع سنين. الأجزاخانة كبرت بقت اجزاخانتين وكمان تجارة الكسب والسماذ وعينك ما تشوف الا النور بقى عندنا أربع عربيات نقل وكل واحد عربية ملاكى وامبارح بس جه المشتري عشان يسجل الأرض فى الشهر العقارى.

سامية: آه فهمت . لكن طبعا هيعوضوكى عن الأرض. يكتبوا لك نصيب فى أجزاخانة منهم.

ناهد: مش اصول كده والنبي ؟

سامية: طبعا يا حبيبتي أمال ايه ؟

ناهد: لحد الآن ما فيش حد كتب لى حاجة ولا طمنى حتى

بكلمة . وأنا عايشة زى واحدة خدامة آدى البيه الكبير بيتجوز، والتانى بكره يعملها وأفضل أنا زى المقاطيع أشحت منهم (تحتد فجأة) لا ده مش هيحصل أبدا. ومن النهاردة لازم أعرف مصلحتى وأدور على حقوقى.

سامية: برافو عليكى . اهو ده الكلام السليم. كلميهم بالراحة، حاولى تكسبى عطفهم بدون زعيق ولا خناق. بس فرفشى وانسى الهموم خسارة جمالك وشبابك.

ناهد : غصب عنى يا أبله سامية . اخواتى مش حاسين بى غمرهم ما فكروا فى مستقبلى.

سامية: معلش . فاتحيهم ودورى على حقوقك. وأنا بأعتقد انهم مش ناسينك. باين انهم مش بخلانين عليكى

بالفلوس بيودوكى للدكاترة فى مصر واسكندرية ما
بيقصروش.

ناهد: دول مجرمين. أطاخ . هم اللي جابولى المرض والغم
بيودونى عند دكاترة الأعصاب بعد ما بوظوا أعصابى
ونكبونى ووقفوا حالى

سامية: يا ناهد يا أختى بتاع ربنا وهمه ما لهم ؟
ناهد: أ بدا (تبكى) المنكوب الصغير هو اللي ضربنى على
راسى لحد ما فقدت عقلى (تتأثر وترتمى على الكنب)
سامية: (تميل عليها وتشدها من يدها) كان امتى ده – وسببه
ايه ؟ !

ناهد: الحب يا أبله سامية (الدموع تخنفها) هو الحب عيب
يا أبله ؟ هو ده السبب.

سامية: (تربت على خدها) امسحى دموعك يلا واحكى لى
. احكىلى على المفاجآت الجديدة دى (تضحك وتحاول
أن تخرجها من حالة الحزن) كان فين الحب ده ؟ ومين
المحظوظ ده اللي استولى على قلبك؟

ناهد: ربنا ينتقم منه . الوغد الجبان. خدعنى وغدر بى. حبيت
المجرم بكل احساسى. كنت أقف بالساعت فى البلكونة
انتظره، وكان يقف قبالى فى الشباك. يفضل يشاور لى
واشارو له. وفى يوم لقيت نفسى رايحة له.

سامية: وبعدين ؟ ما تسرحيش.

ناهد: خبطت على الباب فتح . أول ما شافنى اتخض واتلجلج
اصفر واحمر. كنت فاكره انه هيفرح بى. وياخذنى
بالحضن. لكنه طلع ندل وجبان. وقف فى الباب وقاللى
ليه كده يا ناهد؟ جاية هنا ليه؟ بصيت له مستغربة. انت
مش بتحبنى. مش انت بتشاور لى. قال آه . آه بس أنا

وطب سكت. وبعدين لمحت الدبلة فى ايده اليمين
وعقلى طار. رحت ماسكة فى خناقه وشديته من شعره
. ازاي يعمل فى كده. وشوية اتلمت الناس على الخناقة
، وجه أخويا محمود وفضل يضرب فى لما فقدت وعى
ما دريتش بالدنيا فين (تنهار وتجلس على الكنبه -
المشهد السابق يمكن تقديمه بالانتميم)
مسكينة ! تحملتى كتير. ربنا يشفيكى. لكن انتى لازم
تساعدى نفسك.

سامية:

(بصوت مرتفع) ازاي دلينى ؟
تسامحى أخوكى . سامحيهم وانسى اللي حصل. انتى
عندك حقد مكتوم ومتغاضة خالص. وده اللي تاعب
أعصابك. سامحى أخوك وما تنسيش انه كان معذور
انتى عارفة الناس ما بتسكتش.

ناه:

سامية:

مش حاسين بى يا مدام ، اللي معذبني يوم اقع من
المرض يجرو بية عالدكتور و يوم ما يخلص العلاج
وأعود لحالتى الطبيعية ينتهى كل شىء، ما فيش اهتمام
— ما فيش كلمة تريح . عمرهم ما واحد فاتحنى فى
كلمة تخلصنى.

ناهد:

ما بيفهموش انى أنا بنت زى باقى البنات، عايزه
تتجوز وتفرح. الدكتور حامد أهو كبير وطيب عمره
ما ضربني وبيشفق على لكن ما فتحش قلبه يوم لى
ماشعرتش انه فاهمتى ابدأ . ليه ما بيحسوش بي. هو أنا
برضة مش زى نجية المفوعة اللي هيجوزها.
انتى متأثرة خالص يا ناهد وأنا مضطرة أسيبك شوية
ترتاحى . لما اخلص من شغل البيت ها جيلك، لكن
لازم تساعدى نفسك، دبرى من مصروف البيت

سامية:

واعملی حاجة تنفعك , یعنی حوشی قرش ورا قرش
تعملی ثروة وما تحتاجیش لحد أبدا . وبلاش قلق عشان
تحافظی على صحتك وجمالک . بكرة یجى عریس
الغفلة اللى یسعدک .

ناهد: معقول یا أبله سامیه مین یرضی یجوزنی ؟ الكل
عارف انی مریضة وبقولوا على مجنونة .

سامیه: (تضحك) یا ریت فیهم نص عقلک . انتی بس حساسة
أكثر من اللازم وبتفكری كتیر فی الماضی . انسى
وبلاش تعکنى على روحک .

ناهد: أعمل ایه بس فی بختی .. كل ما یجینى عریس بیطفشوه
. عایزین أقعد كده أخدمهم

سامیه: ما تقولیش كده . یمكن العرسان ما عجبوش اخواتک .
تلقاهم فلاحین مش قد المقام .

ناهد: (تصدم ناهد ویبدو الشحوب على وجهها وتتحرك
سامیه نحو الباب وبعد ان تخرج سامیه یدق جرس الباب
فتسرع حسنیة لفتحه ویدخل شاب فی العشرین من عمره
ثم یضع کتابا على الحائط الذى یفصل بین الصالة وحجرة
المائدة)

حسین: (بتردد) صباح الخیر یا ناهد .
ناهد: (یشرق وجهها بابتسامة) حسین تعال قرب (تمد یدها
للسلام وتسده للجلوس) أقعد شویة ما لك ؟

حسین: أقعد ؟ أنا اتأخرت فی النوم . الساعة حداثر ولازم
افتح الأجزاء بسرعة . محمود لو عرف هیتخانق معایا
ویهدلنى .

ناهد: اطمن محمود ماعدش فاضی من السرمة رایح جای .

حسين: ازای ؟ هو ما رجعش من اسكندرية؟
ناهد: لا رجع بالليل وسافر من شوية.
حسين: سافر ليه تانى ؟
ناهد: أنا اللي عايزه أعرف منك بيعمل ايه فى اسكندرية ؟
حسين: بيحبيب أدوية طبعا.
ناه: (بصوت عال) حسين ! ها تلف على (تمسك بيده وتضع يدها الأخرى على كتفه) أنا بنت عمك برضه وعايزاك تصارحنى لأن سفره زاد عن الحد.
حسين: (تاخذه الحيرة ثم يضحك) أقول ايه بس !
ناهد: تقول الحقيقة. انت رحت معاه اسكندرية مرات كثيرة!
حسين: حصل طبعا.
ناهد: مرة قضيتم أسبوع هناك.
حسين: آه انتى فاكروه؟
ناهد: هو أنا بأنسى حاجة (بابتسامة) قوللى يا حسين قضيتم الوقت ازای ؟ مين معاه رجالة أو ستات.
حسين: رجالة طبعا .
ناهد: (تضربة على صدره بمرح) ولد انت بتخبى على ؟ بقى راىخ اسكندرية عشان يسهر مع رجالة؟ شفت مين ؟ وكم واحدة ؟
حسين: (يتلفت حوله ويحاول رفع يدها من على كتفه) لا . لا
أنا يا ستى ماليش طبعا فى الحاجات دى.
ناهد: ليه يا متتيل . ما انتش راجل زيه؟
حسين: لا راجل طبعا بس مفلس .
ناهد: (تقفز ضاحكة) وهو الافلاس يمنع .
حسين: يمنع طبعا . الافلاس يمنع كل حاجة كويسة 9 يمنع روقة البال وراحة الجسم كله.

ناهد: لكن البيه كان معاك وبيصرف عايز فلوس ليه ؟
حسين: جبتى اللى فيه الفائدة. أنا موظف عنده. آه ماشى معاه صحيح. بس فى خط تانى.
ناهد: فهمت (بنظرة تأمل) بتحب يعنى .
حسين: (يضحك فى سخرية) وأنا مين بس هيحبنى ما هو ده عايز فلوس برضه وأنت عارفة الحال.
ناهد: مسكين يا حسين شايلى الهم زى بنت عمك .
حسين: أنا فين وأولاد عمى فين . أنا شغال عندهم. افتح يا حسين الأجزاء - روح يا حسين هات دوا . روح افتح المخزن وسلم كسب وسماد ومهربات وسوق سوده. همه يقبضوا الآلاف ولو كبس البوليس على هيقولوا لى سد يا حسين، واروح أنا فى داهية.
ناهد: (بشفقة) كفالله الشر . وبتحط نفسك ليه فى الحاجات دى . وما بتاخدش حقك ليه
حسين: بيدونى ملاليم. ويلهفوا الآلاف. ربنا يغنيننا ويتوب علينا من الذل.
ناهد: معلش يا حسين خليك زى أنا لكن اسمع ؟ احترس وابتعد عن السكك الخطرة انت موظف فى الأجزاء وبس مالکش دعوة بالباقي.
حسين: (تدخل حسنية معها الشاي باللبن وتقدمه له فيحيها) الله يفتح عليك يا حسنية .
ناه: هاتى كيك لحسين يا بت (تمسك كوب اللبن وتناوله)
حسين: زى بعضه لكن ايه اللى حصل ، ايه الكرم اللى حاطط عليك النهاردة .
ناهد: (تقدم حسنية الكيك وناهد تناوله بالقطعة) شايفاك غلبان زى حالاتى .

حسين: بس أنا اتأخرت.
ناهد: ايه اللي أخرك
حسين: (يمد يده يأخذ الكتب) كنت سهران وراحت على نومه
ناهد: (تضحك وتضربه) سهران تعمل ايه يا مضروب انت
ومع مين يا ولد قول؟
حسين: (يهز الكتب) أنا ودول. باذاكر هامتحن الثانوية العامة بعد
ثلاث شهور.
ناهد: كده مرة واحدة ما قلتش قبل كده
حسين: أقول لمين . خفت أقول يطردوني ويقولوا ده مش فاضى
للشغل.
ناهد: للدرجة دى بتخاف منهم ؟
حسين: طبعا ، كل واحد ما يهموش غير مصلحته .
ناهد: (تقترب منه) صحيح يا حسين بتفكر فى مين ؟
حسين: بأفكر فى مستقبلى
ناهد: (تصطدم لكنها تتماسك) ما تشلش هم شد حيلك
أنا معاك وان عزت حاجة قول لى.
حسين: ما اتحرمش ، كلام ما قالوهش الرجالة .
ناهد: همه الرجالة حاسبين بينا .
حسين: لكن ها أقولك ايه . هتشرح لى انجليزى. هو ده اللي
مغلبنى
ناهد: الأستاذ فريد جارنا اخليه يديك درس.
حسين: كده لوجه الله ؟
ناهد: لا طبعا أنا هادفع .
حسين: (بمرح) الله يكرمك والله بقالى ضهر فى الدنيا .
ناهد: (تنظر اليه بعطف وسعادة) بس عايزاك تفتح عينك
وتاخذ بالك كويس

حسين: تحت أمرك اللى تطليه (يهم بالخروج فتستوقفه من كتفه وتنظر اليه فى حب)

ناهد: فهمت أنا عايزة ايه ؟

حسين: طبعاً ودى عايزة ذكاء .

ناهد: تقترب منه أكثر وتربت على كتفه (ها استناك على الغداء . تيجى هنا .

حسين: لما أشوف الظروف .

ناهد: مش ها كل لحد ما تيجى .

حسين: (ينظر بحنان ويهز رأسه ثم يسحب يده من يدها بهدوء) باى . باى .

ناهد: باى (تسير وراءه حتى الباب ثم تعود الى مقدمة المسرح وترقص فى خفة) لازم أشوف مصلحتى . من النهاردة لازم ادبر أمورى . اسويها ماله لما أفكر مع حسين . وأتعاون معاه . أنا ضايعة علبانة وهو غلبان برضة . خلاص تعمل فريق الغلبة . أنا وهو . لازم أعرف كل حاجة حتى راس مال التجارة كلها . واحسب نصيبى واطلب حقى . ليه استنى لما حد تانى يفكر لى . برافو عليكى يا مدام سامية . أبوه كلامك صح لازم أوفر من مصروف البيت وأعمل ثروة (تتوقف عن الحركة) كده نبدأ أول خطوة . (تضحك فجأة ثم تفتح الراديو . تنبعث منه موسيقى راقصة مرحة فتبدأ ترقص وتدندن وحينئذ يرن جرس الباب فتتوقف) افتحى الباب يا حسنية (تدخل نوال سيدة شابة ممثلة الجسم . تحمل طفلاً غلى ذراعها)

نوال: صباح الخير يا ناهد

ناهد: (لا ترد بل تنظر اليها فى تمعن) تتحرك نوال فى الصالة فى دهشة وخوف . تدور ناهد حولها وهى تحاول الاقتراب منها وعيناها تحملقان فى وجه نوال)

نوال: ايه ده ؟ مالك؟ يا نهار زى بعضه.
ناهد: (تواصل ناهد الدوران حولها وفجأة تضحك فى هيسستيريا ثم تقف مكانها)

نوال: يا مصيبتى .. بتضحكى بعد ما نشفتى دمي. (ناهد تستمر فى الضحك) يا شيخة خضيتينى. هو الهزار يبقى كده

ناهد: (تعود الى هدوئها) اسمعى يا نوال، انتى نمتى كويس الليلة ؟

نوال: نمت كويس خالص. أول ما أحط راسى على المخدة بأروح فى النوم على طول.

ناهد: جوزك بيسهر مع مين ؟

نوال: أنا عارفة بقه . بيسهر مع أى حد؟

ناهد: بتحبيه يا نوال ؟

نوال: أمال . احنا لنا حد غيره.

ناهد: وهو بيحبك ؟

نوال: (تضحك) باين عليكى فايقة خالص وعازية تتسلى على .

ناهد: مش أحسن ما تتسلوا أنتم على.

نوال: احنا مين ؟

ناهد: انتى وغيرك من الجيران.

نوال: كده برضه يا ناهد. احنا بنزعل عشانك ونفسنا نشوفك سعيدة مبسوطه.

ناهد: (تضحك) واياه رأيك فى النهاردة ؟
نوال: (محتارة) انتى ؟ انتى كويسة بس هزارك يخوف.
ناهد : (تنظر اليها بنفس الطريقة السابقة وتتقدم نحوها. تبدأ نوال تتراجع أمامها ويدوران وراء بعضهما نفس الدورة الأولى) ما قلتيش جوزك بيحبك؟
نوال: بيحبنى خالص .
ناهد: هو موجود فى الشقة دى القوت ؟
نوال: آه . آه موجود
ناهد: قاعد مع مين. مع أمك
نوال: وفيها ايه؟
ناهد: مش أحسن تقعدى انتى معاه فى يوم راحته وتسليه.
نوال: (تتحرك نحو الباب وتفتح بسرعة ثم تقف فى الباب) اما صحيح مجنونة (وتغلق الباب)
ناهد: عجيبة !قال بتنام وتشبع نوم . أنا أفضل اتململ طول الليل، أفكر شوية وأبكى شوية، ودى بتنام الليل كله. ايه بيخلى واحدة زيها تنام وتشبع نوم. يكونش الجواز فيه سر بيهدى الأعصاب ويخلى الستات تنام . غريبة . لكن دى جوزها عاشق عليها كمان وهى عارفة. وبتنام – أول ما تحط دماغها على المخدة تروح فى النوم. مافيش حاجة بتشغلها. حكمتك يارب. حتى اللى جوزها مجوز عليها، واللى جوزها بيحبها نص نص، وحتى اللى جوزها عاشق واحدة غيرها بتنام كلهم لاقيين حاجة تخليهم يناموا ويشبعوا نوم. وأنا بس اللى غلب حمارى. جربت الأدوية والحبوب وكل الوصفات البلدى والأفرنجى وما فيش فايده. قريت فى المجالات

والقصص ساعات طويلة وما فضلش غير الجواز. بنت
يا حسنية.

- حسنية: (تخرج الى الصالة) نعم يا ستى
ناهد: (تنظر لحسنية) ليه أنا ما أجوزتش؟ وحشة . كتعة؟
(تنظر فى المرأة)
حسنية: فشر مين قال كده يا ستى . ده انتى قمر منور ما فيش
جمال بعد كده.
ناهد: ما فيش حد غيرك فاهمنى يا حسنية وبتحسى بى . يمكن
من غيرك كنت انتحرت.
حسنية: (تضحك وتجرى نحوها وتحضنها) سلامتك يا ستى يا
حلوة ياللى كلك حنية.
ناهد: صحيح أنا حلوة يا حسنية ؟
حسنية: انتى أحلى واحدة فى الدنيا.
ناهد: وفى العمارة، الناس بيقولوا على ايه ؟
حسنية: بيقولوا ما فيش حد فى جمالك . وشها أبيض منور
وشعرها فاحم زى الليل (تمصص شفتيها) لكن مالهاش
حظ .
ناهد: طيب واعمل ايه مع الحظ ده ؟ ايه ناقصنى عشان أمسك
الحظ والوى رقبته. شهادة، فلوس وظيفة؟ ما بيقولوش
على مجنونة؟
حسنية: فشر يا ستى . تقدر واحدة تقول كده قدامى.
ناهد: لكن ده اللى بيقولوه اخواتى وبتقوله نجية – وأنا لازم
أنتقم منهم كلهم . لازم يبطلوا الكلام ده – لكن ازاي؟
أشوف عريس طيب وبعدين. هأقوله اجوزنى. هيقول
مجنونة. طيب ليه، اشمعنى الراجل يروح للواحدة ويقول

لها أجوزك - والبنت ما تقدرش على كده - ليه؟ ما لناش
نفس زيهم؟ . (صمت حزين) يوه طيب ما أنا عملت كده
الأول وأخذت نصيبى من العقاب. لا .. لا. إلا الطريق ده
. أنا لازم أجبرهم على انهم يجروا ورايا. لكن ازاي؟ ده
هو المهم . حسنية ازاي يا حسنية؟
حسنية: (تنظرا ليهما بشفقة) أنا عارفة يا ستى . جمالك كفاية -
وطيبة قلبك.

ناهد: (بصوت عالى) بس انتى جبتى الفايده . الطيبة دى هى
الى ضيعتتى وهضيعنى. الطيبة فى البلد دى ما لهاش
نصيب ولا بد (صمت)
حسنية: هتعملى ايه ؟

ناهد: اعمل اللى ما اتعملش. اخليهم يشهدوا كلهم ان أنا أعقل
منهم. أنا طاهرة ونقية. اتحملت كتير - خدمت أمى
واخواتى. وبأحب الناس وأعطف على الغلابة اللى
بيفجروا وبيعملوا البدع بتغفر لهم الناس وانا ما
غفروليش غلطة!! اللى قلت باحب كأن الحب عا.
النجاسة الخفية حلوة ومقبولة ومغفورة. لكن الصراحة
وحشة . جنون والمرض عار ومصيبة.
حسنية: ما يهمكيش يا ستى . ربنا مش هيسيبك وهيبعت لك ابن
الحلال

ناهد: ونعم بالله. هو ابن الحلال موجود ز ازاي افاتحه. أنا
لازم أفكر عشان ما أكررش غلطتى.
حسنية: فكرى برضه اعملى زى الناس ما بتعمل
ناهد: حسنية . اندهيلى مدام سامية. هى الوحيدة المخلصة فى
الحتة دى.

(تخرج حسنية) عجائب يا زمن طيب ليه . ليه
الواحدة تلف وتدور . ايه اللي كان يحوجنى لكده لو فيه
حد بيّفهم ويقدر (تمسك شعرها وتنظر فى المرأة ثم تبسم
(خلاص . ما دام المساواة انعدمت يبقى ما فيش غير
التدبير والنضال لتحقيق الهدف زى ما بيّقولوا فى
الراديو . أيوه النضال لتحقيق الهدف . لكن أناها أناضل
وحدى؟ ما ليش أم ولا أخت . معلّش أبلّة سامية تساعدنى
فى التدبير وحسين لازم يخش فى الخية ويساعدنى .
(تجلس على الكنبه وتمسك مجلة تبدأ تقرأ فيها)

سامية: (تدخل من الباب) أيوه يا ناهد

ناهد: عندكيش واحد فلاح يجوزنى

سامية: (تضحك فى حيرة) وده كلام ايه يا ناهد . يا حبيبتى أنا
مقصدتش از علك وأنا لما قلت فلاحين كنت أقصد انهم
مش مناسبين لك . وعشان كده اخواتك طردوهم .

ناهد: أنا ما يهمنىش . أنا نويت أجوز وعايضة عريس . يا ريته
يكون فلاح هو الفلاحين وحشين؟

سامية: (تضحك) أجوزك بلبل ابنى

ناهد: والنبي يا أبلّة سامية تفهمينى . أنا باتكلم جد . شوفى لى
عريس فلاح ، عامل أو موظف أو أى حاجة .

سامية: الجمال ده كله ياخذ أى حاجة برضه . ده يستحق أحسن
عريس . (تربت على خدها) الحكاية دى خلّيتها على الله
وعلى . بس أوع تزعلنى منى .

ناهد : ورينى شطارتك يا أبلّة

سامية: عن اذنك الطبيخ عالنار .

ناهد: (تودعها عند الباب) ثم تعود الى مقدمة المسرح) أدى
أول خطوة سليمة . مدام سامية مدرسة وجوزها مدرس
وناس طيبين. يمكن الحظ يضرب والسنارة تغمز. لكن
ده مش كفاية؟ حتى لو جه العريس المناسب اخواتي
هيطفشوه – هيقلوا مريضة ومجنونة زى كل مرة أنا
لازم ألعب بعقلهم واجننهم لحد ما يفهموني صح.

(ستار)

المشهد الثانى:

(شقة الأستاذ فريد تشبه شقة ناهد. فريد وزوجته سامية جالسين وأمامهم ترابيزة وعليها اكواب الشاي)

سامية : أدي الحكاية بتاع ناهد .. وايه رأيك؟

فريد : ناهد يلزمها الزواج فعلا ... وده اللي قالتها مدام عفاف امبارح . واحدة زيها تعمل ايه بس. شباب وجمال تستنى ايه؟ تفتكرى انتى لو مكانها تسكتى؟

سامية : مش معقول . جسمها فاير بتتفجر حيوية. والله لولا اختلاف الدين لجوزتها لجر جس اخويا.

فريد : ناهد ما لهاش غير سعيد يجوزها هو اللي يحل عقدتها.
سامية : ازاي ؟

فريد : (يضحك) كانت بتجيله حالات جنون زى كده.
سامية : (بلهجة حادة) بس ناهد مش مجنونة.

فريد : سعبد برضه مش مجنون .. لكن بتجيله حالات غريبة (يضحك كأنه تذكر شيئاً) فى مرة حاول ينتحر لولا لحقناه كان رمى نفسه من الشباك.

سامية : وده هيحل عقدتها والللا هيخلص عليها.

فريد : هو خلاص صحنى وبقى عادى جدا . أصل الانتحار انتهى بمغامرة عاطفية طلعت الجنون من نافوخة. عقدته الوحيدة الآن انه يلقى واحدة ترضى تتجوزه.

سامية : أنا مش فاهمة حاجة ... ازاي انتحر وازاي اتعالج ؟

فريد : (يضحك) اشرح لك الحكاية بس ركزى معايا (يقف ويتحرك) فى ليلة كنت راجع للبيت عند الغروب ولقيته مرمى على الشباك والنصف الأعلى من جسمه مطوح فى الشارع وصلاح وزينب ما سكتيه من الخلف زينب ماسكه فى رجله وقاعدة على الأرض . وصلاح ماسكه بقوة من وسطه ويحاول يمسك ايده ويشدها. (يتغير المشهد بالفلاش باك).

أمامنا صالة تمتد يمينا ويسارا، فسيحة الى حد ما لكن أثاثها بسيط عبارة عن بضعة كراسى وطاولات صغيرة إلى اليسار .. وسجادة مفروشة على الأرضية. يواجه المتفرج فى خلفية المسرح شباك، وسعيد منحني فى الشارع لا يظهر منه الا مؤخرته وهو يحاول أن يلقى بنفسه الى الشارع. يمسك به من الخلف رجل وامرأة هما صلاح وزينب)

فريد : (يفاجأ عند دخوله بالمشهد فيصيح بصوت مرتفع) ايه ده يا مجنون .

سعيد : (يفيق بفعل المفاجأة ويلتفت الى الخلف بعيون زائغة ثم يقع على الأرض منهارا)

فريد : ليه كده . أنا افكرتك بتهزر!
زينب : (بعيون باكية وصوت متأثر) لا حول ولا قوة الا بالله
الجدع كان هيصع فى شربة ميه .
صلاح : سيبوه شوية لما يرتاح . قومى يا زينب هاتى كوباية مية
أو لمون .
سعيد : (يسترد أنفاسه . يرفض تناول المشروب فى البداية .
لكن زينب تلح عليه وتقدم له الكوب مرة بعد مرة حتى
يقبل فى النهاية ويمسك بالكوب)

فريد : اعملى قهوة كمان يا زينب (يقدم له سيجارة) خد يا
سعيد اعدل دماغك .
صلاح : كان هيصع نفسه .
سعيد : (بغيط) عايز ارتاح من الدنيا .
صلاح : ده بعدك (يضحك) عايز ترتاح حضرتك ونسينا لوجع
الدماغ .
سعيد : يعنى خايف على نفسك بس!
صلاح : طبعا ، يمكن يحسبوك علينا نفر ويقولوا قتلوه .
فريد : لكن أنا سايبك فى أمان الله بترسم وتتفنن (يتلفت حوله)
فين اللوحة المنحوسة دى؟ (وفجأة تقع عينه عليها)
فوق رأس سعيد ياه! هى دى؟
سعيد : (يهز رأسه موافقا) آه .

(اللوحة معلقة فوق رأسه الى اليمين . الجميع يتأملها
باستغراب شديد . لوحة كئيبة بالألوان – أرضيتها
حمراء داكنة فى قلبها طفل جميل مزعور الوجه وحوله
ثلاث نساء شعرهن منكوش وعيونهن مفتوحة بشراهة

يكاد الشرر أن يتطاير منها فى شكل سهام مصوبة نحو
الطفل. أفواههن مفتوحة أيضا والأسنان بارزة بشكل
مخيف)

فريد : (يتأمل الصورة باهتمام كبير ثم يستدير نحو سعيد) لكن
دى صورة غريبة ! ستات دول والا وحوش؟
صلاح : (بلهجة ساخرة) دول ام شوشة وأخواتها (لسعيد)
أقولك ولا تزعلش .. دول زوجات المستقبل اللى
بيطلعوا له فى الكوابيس

زينب : (تخرج عن صمتها) سعيد بيه يتجوز الوحشين دول.
صلاح : آمال كان بيرمى نفسه من الشباك ليه ؟ أول ما
وقعت عليه عليهم عقله طارو قرر يختصر
الطريق.

فريد : فعلا كان فيه حاجة مضايقاه، وكان المفروض انه
استراح بعد ما انتهت الصورة .

صلاح : ما تتكلم يا أخ وتشرح لنا فنك اللى يجيب الغم .
فريد : قول لى يا سعيد بجد .. الفكرة دى جات لك زاي ؟
سعيد : (يعتدل فى جلسته) دى فكرة قصة قصيرة كتبتها وأنا
طالب فى أولى ثانوى اسمها " الحقد " والطفل
المزعور عبارة عن الولد الوحيد اللى بتحاصره ثلاث
بنات أكبر منه.

فريد : ثلاث بنات أخوات أكبر منه .. ده يبقى حظه من السما.
زينب : يبقى الدلوعة بتاعتهم بالليل والنهار.
سعيد : (بانفعال) أبدا . ده مش حب ده حقد.

صلاح : (بتهكم شديد) الله يفتح عليك .. ده العلم واسع يا جدعان. قول كمان قول نورنا من فائض علمك. قول هيقعدوا عليه ليه يا فنان النحاس والكرب العظيم!
سعيد : (بصوت حاد منفعل) لا، بيحقدوا عليه لمجرد انه ولد يقدر يخرج ويدخل زى ما هو عايز.

فريد : يهز رأسه فى حيرة ثم يتكلم بصوت هادىء) أنا عايزك تخلع النضارة السوداء دى، وما تلبسهاش تانى . عشان بتوريك أحلام مزعجة

سعيد : دى مش أحلام . ده واقع أنا عشته بنفسى.
فريد : (بسخرية) ولا يهملك، بتحصل فى أحسن العائلات .
صلاح : وخصوصا فى عائلة أبو جلمبو (يمد يده محاولا العبث بشنب سعيد) قوم أغسل وشك عشان تخرج معانا .
سعيد : أنا مش خارج الليلة . عايز استريح .

فريد : لو تيجى معانا النادى يكون أجسن لك. تبقى فرصة أغلبك عشرة طاولة تفوقك.

سعيد : لا ، أنا قايم آخد دش بارد وأنام (ينهض مسرعا نحو الحمام)

فريد : على راحتك .. وأنت يا زينب خليكى معاه لما نرجع.
صلاح : خلىنا لما نشرب الشاى يمكن يغير رأيه.
فريد : يستحسن طبعاً، أو نفضل جنبه ؟
سعيد : (يعود من الحمام فى حالة استرخاء .. يجلس على الأرض، على سجادة ويتكىء على وسادة مسنودة على

الحائط. فوقه الشباك واللوحه) ما فيش داعى تعطلوا
أنفسكم. أنا هاشرب الشاي أوقد على السرير.
زينب : (تدخل حاملة صينية عليها ثلاثة أكواب مملوءة بالشاي
.. تضع الصينية على الترابيزة أمام فريد وصلاح ثم
تأخذ كوبا على طبق وتقدمه لسعيد وتجلس بالقرب منه)
أجيب لك عشا الأول.

سعيد : (فى نبرة عتاب رقيق) ليه كده يا أستاذ سعيد .. يهون
عليك عشتتا؟

سعيد : تعبت يا زينب .. تعبت من حقد اخواتى ومن دسائس
الزملاء المنافقين.

زينب : يا خويا ما تدقش .. انت ايه يهملك من اخواتك أو من
الناس ؟ أنسى وريح بالك.

سعيد : مش قادر .. (بغيط) مش قادر انسى الحقد مش قادر.

زينب : (سيبك ، مش كفاية احنا بنحبك واللا احنا ما ننفعش ؟

سعيد : (ينظر اليها ثم يبتسم ولا يتكلم)

صلاح : ما ترد على الكلام اللى زى العسل ده واللا انت مش
شايفه؟

فريد : النضارة هى السبب (يضحك الجميع)

:اسمعى يا زينب .. سعيد ده حياته فى ايدك وموته فى
ايدك.

زينب : يا ساتر يا رب .. وأنا بايدى ايه بس يا أستاذ صلاح

فريد : ما تتخضيش كده يا زينب .. صلاح بيهرج.

صلاح : لأ مش تهريج أنا باتكلم جد . انتى تقدرى تنتشليه من
حالة البؤس لو بتحبيه بصحيح --

زينب : (تضحك ثم تتكلم بخجل وحياء) عايزنى أعمل ايه وأنا أعمله.

سعيد : تتجوزيه .

زينب : (ترتبك قليلا) وأنا قد المقام برضه .

فريد : ده انتى مقامك على جدا يا زينب .. ودى فكرة هائلة

زينب : (تجمع أكواب الشاي الفارغة وتحمل الصينية وتتحرك الى الداخل)

صلاح : (يقف فى طريقها) استنى بتهربى ليه .

فريد : المفروض ان سعيد هو اللى يتكلم .

سعيد : (يبتسم ولا يتكلم)

صلاح : وسعيد موافق طبعاً . يتكلم يقول ايه .. هيلقى فين فرصة زى دى .

زينب : الأستاذ يأخذ واحدة من توبه وارثه أو موظفة لكن أنا فين وهو فين.

فريد : لعلمك سعيد معقد من الموظفين .

صلاح : والوارثة هتاخذه على ايه .. تكونيش مغشوشة فى شنبه المدلل زى شنب عبد الرحيم بيه كبير الرحمانية قبلى.

زينب : فشر الأستاذ راجل كامل وسيد الرجالة (تسرع بادخال الصينية والعودة)

(فريد وصلاح يضحكان)

صلاح : وقعتى بلسانك .. يبقى اتفقنا.

زينب : (تضحك) مرة واحدة كده

فريد : هى عايزة سعيد ينطق الأول ، وسعيد لا يتكلم

صلاح : هينطق يقول ايه . هيلقى فين واحدة جميلة فى أخلاق زينب. شوف بقالنا سنتين مع بعض ما شفناش منها الا كل خير.. وزيادة على ذلك هى بتحبه وتخاف عليه.

فريد : فعلا .. كل الصفات الطيبة، وسعيد فنان لايهمه الا
جوهر الانسان وروحه.

زينب : يا جماعة كفاية تريقه أنا فين وسعيد فين بس؟

صلاح : وحياة أمى ما هيلقى زيک لو عمل ايه لأنه عرفك
وعرفتيه معرفة حقيقية وسيبك من الكلام التانى . الحياة
مش منظره.

زينب : لكن لازم ياخذ واحدة من توبه، وتتناسب مع مكانته
..مش ياخذ شغالة

صلاح : الانسان ساعة ما يجوز عايز انسانة نضيفة وشريفة
تفهمه وتشاركه حياته على الحلوة والمرة .ما يهموش
تبقى درجتها ايه .. بالمقياس الحقيقى انت أفضل من
موظفات ياما .. تدخل بيوتهم ما تطقيش تشوفى منظرها
ولا تشمى ريحتها. يا زينب الناس قيمتها فى عملها اللي
بتعمله باخلاص -

فريد : أنا عمرى ما شفت صلاح يتكلم بعقل وحكمة زى الليلة
لكن الكرة عند سعيد ولازم يتكلم .

سعيد : (بنوع من اللامبالاة) هاتكلم أقول إيه ما نتم بتتكلموا
كويس .

صلاح : المهم زينب توافق . هي مترددة خايفة على أولادها.
لكن سعيد طيب ويحب أولادك وطول الوقت بيلاعبهم.
وبدل ما تفضلى عزبه تلقى جنبك راجل يونسك، وهو
صحيح مش ولا بد لكن أحسن من بلاش.

فريد : يمكن منتظرة ترجع لجوزها.

صلاح : مش ممكن.. لأنه طلقها مرتين قبل كده ودى الثالثة، وعشان ترجع له لازم تتجوز واحد غيره.

سعيد : (يضحك) عايز تشغلنى محلل يا خبيث .
صلاح : ان نفعت وعجبته الله يسهلكم . ما نفعتوش مع بعض يبقى تتطلق هى وترجع لجوزها وانت ربنا يرزقك . كده تتحل مشكلتك ومشكلتها.

فريد : والعصمة تبقى فى إيد مين؟
صلاح : تبقى فى إيدك. شرع الله شرع العدل عشان تحمى أولادك ، وما حدش يتحكم فيهم ولا فيكى .. مش كده واللا ايه يا فريد؟

فريد :الرأى لسعيد.
سعيد : ما تفرقش ،أنا ما تحكمتش فى حاجة أبدا حتى أخص خصوصياتى . العصمة دايما ما كانتش فى إيدى . ثلاث مرات أخطب وتتفق على الزواج ونحدد الموعد وييجوا الهوانم اخواتى ويفسدوا كل شىء فى آخر لحظة.
فريد : ازاي يا أستاذ تسمح لهم يتدخلوا فى أمورك الشخصية ؟

سعيد : من غير علمى فجأة ابص القاهم راحوا عند العروسة خبطوها كلمتين وبوظوا كل حاجة .
زينب : يا حول الله يا جدعان . ازى ده يحصل؟

صلاح : (يقهقه) زينب ما يتخافش عليها --- هى الوحيدة اللى تقدر تشككمهم .

فريد : فعلا .. زينب تعرف توقف كل واحدة عند حدها. وانت لازم تتحرر من سيطرتهم بأى طريقة وبأسرع ما يمكن.

احنا بنادى بحرية المرأة وانت بتضيع حرية الرجال.
 اتحرك يا أستاذ وحرر نفسك قبل ما تجر علينا العار.
 صلاح : قلها .. خليه يتحرك ويفضها سيرة .
 زينب : لا يا جماعة ما تضغطوش على الراجل بالشكل ده .
 صلاح : خلاص احنا نطلع منها ومنكم لبعض .
 زينب : وده كلام انتوا برضه الخير والبركة (تضحك)
 فريد : أعتقد أن دورنا انتهى لحد كده .. وان كان على الشقة
 صلاح هيسيبها من بكره والسكن على قفا من يشيل.
 زينب : ازاي .. هي حدوته كده وانتتهت.
 صلاح : الباقي ناقشيه مع عريس الغفلة .. واحنا جاهزين
 نجيب المأزون فى أى وقت.
 فريد : خير البر عاجله . عشان تقطعوا الطريق على التتار
 قبل ما يعرفوا ويبجوا يفسدوا كل شئ
 صلاح : ده الكلام السليم .. واحنا خارجين فريد يتحرك
 نحو الباب)

انتظر شوية (يخاطب سعيد وزينب) خطوا ايديكم فى
 ايدين بعض. قدمي يا زينب ومدى ايدك (تعد يدها لسعيد)
 أمسك ايدها أمال وانهض.. قف ياراجل أوع تقصر رقبتنا
 (زينب تمسك يده اليمنى وصلاح يمسك باليسرى يشد
 سعيد) شدي يا زينب جامد. قوم أقعد على كرسى عشان
 نتقاهم معاها. شد حيلك متبقاش رمة. سعيد يترك يديه
 ممدودة دون محاولة جادة للوقوف وصلاح يحث زينب
 فتمسك بيديها الاثنتين وتشد بقوة حتى يتحرك سعيد
 ويعتدل استعدادا للوقوف على قدميه وهنا يسحب صلاح
 يده فجأة فيقع سعيد الى الخلف وتقع فوقه زينب ويرتبان
 ربكة كبيرة وينفجر صلاح وفريد فى الضحك. وفى جو

الارتباك يحولان النهوض فتحدث بعض الأخطاء والحركات المتوقعة في مثل هذا الظرف المثير الباعث على السخرية والضحك وفي النهاية يتملص سعيد من التضارب وتشابك الأيدي والأجسام ويتمكن من الوقوف أولاً بسرعة يحاول أن يأخذ بيد زينب فيشدها بقوة فلا تكاد تقفز من مكانها حتى يختل توازنها نتيجة لشدها بقوة فترتمى على صدره وبغير وعى منه يحاول أن يسندها بيده الأخرى من الخلف فيضمها إليه. وهنا يضحك صلاح وفريد ويصفقان تصفيقا عالياً)

صلاح : نحن هنا يا أخ .
فريد : يظهر إنه استحلى اللعبة ؟
صلاح : كفاية (لسعيد) يا مراهق.
زينب : (تتصنع الغضب) كده برضه يا استاذ صلاح ؟
صلاح : تعيشى وتاخدى غيرها.
فريد : ما عدش لنا مكان هنا بعد كده .
صلاح : يللا بنا عالنادى. وهناك نسأل على سكن آخر.
فريد : وجب .

(يخرجان ويتغير المشهد وتضاء الأنوار مرة أخرى في شقة فريد)

سامية : أما عالم مجانيين .. عايزين تجوزوه الشغالة!
فريد : مش أحس من الانتحار .. كما ن هي اللي أنقذته ولولاها كان نزل اتكسرفى الشارع لا طال الموت ولا طال الحياة

سامية : وأتجوزته ؟

فريد : يا ريته حصل .. اليوم التانى كانوا منسجمين جدا. قلنا
نتقل عليهم لما يتكلموا هم الأول، وفجأة ودون مقدمات
حضرت أخت سعيد الكبرى وراسها وألف سيف لازم
تأخده عشان يشوف الكارثة اللي حاقت بالأسرة العريقة.
سامية : وايه كانت الكارثة اللي حصلت ؟
فريد : أختهم الصغرى ، عقب العنقود هربت مع واد بتجبه
وراحت تجوزه بعيدا عن بيت الأشباح . لكن أختها
الكبرى مصرّة تأخذ سعيد عشان يمنعوها.
سامية : وجوازة زينب ؟
فريد : ما فتحوش الموضوع أبدا قدامنا والحال على ما هو
عليه . لكن الشئ المؤكد انه رجع متغير خالص. أصبح
أكثر مرحا وتفاؤلا. يمكن جوازة أخته فكت عقده وفتحت
قدامه بابا للخروج من العزلة.
(هنا يدق جرس الباب فيسرع فريد لفتحه) اتفضل يا
دكتور.
حامد : (فى الأربعين مكتئب الوجه .. عيناه محمرتان تكاد
تطفرف منهما الدموع) أنا. أنا جاى.
فريد : أهلا يا دكتور. خير انشالله.
حامد : ناهد طبعا !
سامية : (بلهفة) عايزانى فى حاجة --
حامد : هى ما تستغناش عنك أبدا .. لكن جيت اتغدى لقيتها
راقدة متكدرّة على الآخر.. ومش عايزة تتكلم.
سامية : قالت لك حاجة مزعلاها منى ؟
حامد : عمرها ما زعلت منك أبدا .. دى ما تحبش فى العمارة
كلها غيرك.

سامية : وأنا باحبها زى ما تكون أختى وما برحش عندها كمان
الا لما تطلبنى .

حامد : احنا عارفين شعورك ناحيتها ومقدرين موقفك تمام .

سامية : الحقيقة هى اللى نادتنى وفتحت معايا الموضوع .

فريد : لكن ازاي يا دكتور تتجاهلوا مشاعرهما بالشكل ده ؟ أنتم
ناس مثقفين ومبسوطين. ازاي ما تفكروش فى زواجها
وراحتها؟

حامد : ما تنفعش . دى مريضة واعصابها تعبانة ازاي عتعيش
مع راجل غريب.

فريد : مش يمكن الزواج يحل مشكلتها.

حامد : ولو ما تحلتش هنتعقد أكثر .. ويمكن تخلف عيلين ثلاثة
وتبقى مصيبة.

سامية : يا ساتر يا رب ، ليه التشاؤم ده كله ؟

حامد : لا يا أبله .. الزواج مش لعبة.

سامية : انا شايفة ان الزواج هو الحل .. أختك عقلها سليم. بس
شاعرة بتوع من الظلم وعايضة تحس بالآمان.

حامد : أرجوكى عشان خاطرنا.

سامية : لا اطمئن خالص . ودى أختكم وأنتم أدري بها منا.

حامد : (يقف ويستأذن فى الخروج) شكرا يا أستاذ فريد ..
شكرا يا أبله سامية.

فريد : مع السلامة (وتطفأ الأنوار)

المشهد الثالث:

(تضاء الأنوار فى شقة ناهد) نجية زوجة حامد تقوم
ياعداد الطعام وترتيب الأطباق على المائدة. ناهد
تجلس على كرسي متحفزة وعيناها على الباب. تقف
فجأة وتقفز بسرعة نحو الباب حيث تظل خلفه
تتصنت على حامد عند الأستاذ فريد جارهم ثم تعود
الى مكانها الأول.. يدق جرس الباب. حسنية تفتح
ويدخل حامد)

حامد : الأكل جهز يا نجية ؟
نجية : خلاص .. هيا (ترص الأطباق)
حامد : (يتجه نحو ناهد) ناهد قومى نتغدى ؟
ناهد : كتر خيرك .. اتغدى انت والهانم بتاعتك وسيب ناهد فى
حالتها.

حامد : ازاي ، وده كلام برضه ؟
ناهد : (تصرخ فيه فجأة) اسمع .. كفاية لف ودوران
(تنهض) انت كنت فين؟ رحت عند الأستاذ فريد ليه ؟
رحت تقول لهم ما يجوش عندي؟ عاوزين تقفلوا على
البيان والشبابيك وتجننوني.

حامد : (بهدوء) لا يا شيخة . ما تقوليش كده أنا
ناهد : ما تكذبنيش .. قلت لمدام سامية ايه ؟ قتلها ما تجبيش
سيرة الجواز قدام ناهد عشان ناهد هبلّة وعبيطة
ومجنونة ومش فاهمة حاجة. هو الجواز علم وفلسفة
يعنى أنا ما حصلتتش التحفة دى اللى انت جاييها من
ورا الجاموسة؟

نجية : (تفاجأ وهى تضع الطبق على التراييزة وتقف مترددة
برهة) كده كده ..يا ناهد الله يسامحك .

ناهد : الله لايسامحك انتى وجوزك . انتو واقفين فى سكتى
ليه؟ مش علوزينى أجوز ليه؟ كتعة معرقة زيك؟
نجية : أنا ما ليش داعى . منك لأخوتك واللا عاوزة تطلعى
جنائك على؟
ناهد : (بغيظ وبصوت عال) طيب ..يعنى أنا مجنونة. شفت
التحفة اللى انت جاييها عشان تكيدنى (تصمت برهة
تلتقط أنفاسها) لا ، والنبي لأوريكى الجنان على
أصله .. وحية أمة لأجوز غصب عنكم وأغيطك
انتى وأمك!
نجية : بس لما تلقى اللى يرضى يجوزك!
حامد : اسكتى يا نجية .
نجية : (تقف وهى تنتفض من الغيظ) طيب ، استاهل أنا اللى
جيت هنا.
حامد : (يلتفت ناحية ناهد) عيب يا ناهد تقولى كده ونجية
ضيفة عندك.
ناهد : (تضحك فى هيسستيريا) والله سلامات يا حضرة
الضيقة .دى مش ضيقة يا فهميم .. دى عزول كباد.
جاية عشان تغيظنى وتشمت فى.. مش لقيت مغفل
زيك يعملها سعر؟
نجية : (تكايدها بحركة يديها من خلف ظهر حامد) أمال زيك
يا مجنونة .. ما فيش ينى آدم راضى يهوب ناحيتك؟
ناهد : (تزداد هياجا وتحاول الهجوم على نجية) طيب استنى
لما أوريكى الجنون بصحيح (تمسك نجية من
شعرها وتوقعها على الأرضية لكنها سرعان ما
تنهض وتهرب بعيدا عنها . فى نفس الوقت نجد حامد
يمسك ناهد محاولا ان يمنعها لكن ناهد تمسك طبقا

وتقذف به نجية فيخطئها ويصطدم بالحائط وينكسر ثم
تبدأ فى تقليب الأطباق على التراييزة)
حامد : كده تقلبى الأكل. كده برضه يا ناهد. عشان ما تتغداش
عندك؟

ناهد : (تصرخ بحدة) مش عايزاكم .. مش عايزة أشوف
المجرمة دى أبدا. مش قادرة أشوفها (تنهج بالبكاء ثم
تسقط منهارة على الأرض. يرتبك حاحد أيضا
ويجلس على الكنبه وهو ييكى. نجية تقترب منه
مزعورة باكية)

حسنية : أنه لها مدام سامية؟

حامد : هاتى سامية تفوقها الأول .. روى بسرعة.

نجية : أنا ماشية وخليك انت معاها.

حامد : استنى شوية لما نفوقها.

نجية : هى مش ها تفوق الا لما أمشى أنا (تمسك حقيبتها
وتستعد للتحرك) ابقى حصلنى (يفتح الباب وتدخل
سامية مندفعة نحو ناهد وورائها حسنية . تجلس
سامية بجوار ناهد على أرضية الصالة وتربت على
وجهها) ناهد .. فوقى. جرى ايه. كف الله الشر.

حامد : لو سمحتى يا مدام خليكى معاها لحد ما أبعت حسين
بالعربية يودىها للدكتور (ثم يخرج خلف زوجته)

ناهد : (تعتدل فى جلستها وهى تهددهم) طيب يا حامد انت
ونجية .. ان ما وريتكم النجوم فى عز الضهرية.

سامية : قومى يا أختى روى بالك .. أغسلى وشك وروى
اتعدى.

ناهد : آه يا نارى من البنّت نجية .. كان نفسى أرقعها علقة
سخنة وأشفى غليلى، لكن ما سا بنيش عشان استفرد
بها.

سامية : (تضحك بقهقة) يوه انتى باين عليكى شرانية خالص .
معقول واحدة حلوة زيك تقول كده؟

ناهد : (بغيط) ها طق منها ومنه.

سامية : يا شريحة المسامح كريم.

ناهد : مش قادر اسامحهم .. مش حاسبين بى أبدا ولا عاملين
لى أى حساب.

سامية : اطمنى ربنا مش ها ينساكى أبدا (تقف سامية) يللا يا
حسنية رتبى التراييزة (لناهد) قومى اتشطفى
واتغدى.

(تتجه ناهد نحو الحمام . وتتحرك سامية نحو باب
الخروج وتبدأ حسنية تجمع الأطباق وتنظف المائدة
وفجأة يدق جرس الباب قبل أن تصل اليه مدام سامية
فتسرع حسنية بفتحه وتخرج سامية أولا ثم يدخل
حسين فيجد ناهد قادمة من ناحية الحمام وهى تجفف
وجهها. يتجه نحوها فتبتسم له)

حسين : أنا جبت العربية عشان أوديكي للدكتور.

ناهد : (تضحك) انت صدقت ؟ أنا عملت كده مع حامد عشان
يبعتك تتغدى.

حسين : صحيح ؟ ده قال انك راقدة متكدره وحالتك بالبلا.. وقال
الحق الحالة رجعت لها وديها بسرعة للدكتور!

ناهد : شفت أنا بقيت هايلة ازاي ؟ مثلت الدور وخال عليه.
لازم أتعبهم أكثر وأكثر لغاية ما يفكروا يفهمونى

ويحسوا بى . وانت يا حسين عايزاك تفتح مخك معايا
وتفهمنى.

حسين : طيب أدينى فتحت مخى .. عايزة ايه؟
ناهد : استنى لما ألبس هدومى (تخفى دقائق معدودة)
حسين : (يتحرك فى الصالة .. ينظر للمرأة يمشط شعره. يعود
الى مقدمة المسرح) قال فتح عينك يا حسين .. فتح
مخك يا حسين ا افهمنى يا حسين. والله العظيم ما حد
فاهمك غير أنا .. دواكى معايا أنا بس. يا ريت
أخواتك يفتحوا مخهم ويفهموا ان الطب أنواع لكن
يفهموا ليه ! أمورهم ماشية والمكاسب بالكوم يفكروا
ليه؟ ويفهموا؟ (فجأة) بت يا حسنية ما عملتيش شأى
ليه؟

حسنية : (خارجة من المطبخ) لآ، ماحدش قال لى
حسين : فتحنى مخك معايا انتنى كمان .. انتنى عارفة أنا ما
بأخلصش أكل الا اذا شربت الشأى.

حسنية : عنية ياسى حسين .. ثوانى والشأى يجهز (تدخل)
حسين : (يقف ينظر فى المرأة ويضع يده على جانب رأسه) يا
نفوخى اللى هيطير.. ها أسد على مين ولا مين.
روح يا حسين .. فتح يا حسين فى هذه الأثناء تخرج
ناهد فى منتهى الشياكة والجمال)
ناهد : (تضربه على كتفه) بتكلم روحك ليه .. اتطسيت فى
مخك انت كمان؟

حسين : (يلتفت فيفاجأ بالمشهد فيظل يتراجع الى الوراء) ايوه
آه أنا أصلى مش واخذ بالى
ناهد : (تقف بطريقة استعراضية) ايه رأيك ؟ حلوة؟

حسين : هو انتى حلوة بعقل .. ده انت الحلوة كلها. ده انتى منورة زى البدر.. لا ده مش كفاية.. انتى زى شمس النهار بتاع ألف ليلة وليلة.

ناهد : (تستعذب الكلام) أيوه كده .. آمال كنت ساكت ليه من زمان، ما سمعتنيش ولا كلمة زى الكلام الحلو ده شاطر تروح تألف وتغنى لنجية المفوعة المسكحة. حسين : لا يا ناهد. أنا كنت باغنى للدكتور حامد ونجية دى عروسة حامد. ده أخوكى ولأزم أفرح له.

ناهد : طيب قولى لى .. ايه حكاية شمس النهار دى؟ حسين : دى أميرة جميلة .. رفضت كل أمير اتقدم لها. وما قبلتش تتجوز غير واحد من أبناء الشعب قدر يحقق اللي هى عايزاه.

ناهد : وكانت عايزة ايه؟ حسين : لأ - دى قصة طويلة مش وقتها . ناهد : أنا لازم أعمل زى شمس النهار واطرد كل الخطاب اللي ما بيفهمونيش صح.

حسين : برافو عليكى .. وناوية تروحي فين دلوقت؟ ناهد : أروح السينما. حسين : (ينظر لها ويضحك) سينما ؟ تعملى ايه فى السينما؟ ناهد : أمص قصب . حسين : (يحملق فيها باستغراب) تعرفى تهزرى.

ناهد : هم اللي بيروحوا السينما بيعملولوا ايه .. ما نتش عارف - مش قلت لك فتح مخك. حسين : (يتنحج) ! نسيت افتح مخى. وقبل ما يقفل تانى افضل اننا نمشى.

ناهد : ببساطة كده ؟ تحت أمرك أنا؟
 حسين : أمال عايزة ايه تانى .
 ناهد : عايزة أعمل زى شمس النهار.
 حسين : وفين الخطاب... والملك وباقي الحاشية ؟
 ناهد : ما يهمنيش من دول .. مش كان فيه شاعر أو مغنى
 ووصيفة بتخدمها.
 حسين : طبعاً.
 ناهد : كفاية دول . بت يا حسنية. تعالى امسكى المروحة
 الريش وهويلي زى اللي بنشوفهم فى الأفلام .وانت
 تقف تغنى أجمل قصائد الغزل.
 (تقوم وتعديل الفستان .. تضع رجل على رجل. تغير
 الكرسي تمثل العظمة الملوكية)
 حسين : وانتى فاكدة ان أنا .. فى موهبة شاعر الزمان اياه
 ناهد : حسينة .. الجدع ده كان بيغنى فى الفرح ولا لا؟
 حسنية : (تهوى لها بالمروحة) طبعاً يا ستى ..أغانى حلوة ما
 حدش سمعها قبل كده.
 حسين : ده حنة موال حلمنتيشى ...حاجات من اللي يحبها
 الفلاحين .
 ناهد : أنا من الفلاحين وباحب الفلاحين هى شمس النهار
 مش عاشت مع الفلاحين برضه ؟
 حسين : بعدين لما نيجى بالليل فى السهرة ..بعد الفيلم .
 ناهد : أوع تتحرك .. ما فيش ليل ولا سهرة ولا فيلم. الوقت
 تغنى.
 حسين : حتى الغنى بالأمر يا ربى (صمت) أمرك (يبدأ
 يغنى بصوت جميل لكن فيه غمزة كتقليد ساخر
 لمحمد عبد المطلب) .

يا زهرة الفل ميلى عالفؤاد واشفيه
واشفى فى قلبه مرض حار الاطبا فيه
ساكن قصادكم وشايف من سنين لسينين
بده يشاور لكم والعين تلاقى العين
لكنه شايف وخايف من عيون الناس
والفكر عنده وقف حتى الفؤاد احتاس
بده يبوس الهوا هو الهوا ينباس؟
صعبان عليه

ناهد : (تقف مسحورة بصوته) يا ابن الإيه ! مين دى اللى
بتقف قبالتها؟

حسين : أمى .

ناهد : ما تستعبطش (تضربه على صدره) لازم أعرف
اللى بتألف لها الأغانى . مين قول يا حسين. مين اللى
بتحبها دى؟

حسين : يا ستى وأنا مين هيجبنى ؟ والحب ده عايز امكانيات..
عايز فراغ وروقة بال .

ناهد : فيه واحد يكتب الكلام ده وما يكنش بيحب .. معقول من
غير ما تحب.

حسين : لأطبعاء، بأحب . بأحب أمى وأخويا الصغير اللى
بأربيه بعد وفاة والدى.

ناهد : بس ؟

حسين : وبأحب اخواتك برضه عشان مشغلينى عندهم .

ناهد : وهو ده حب ولا بتستعبط (تمسكه من يده) مين هيه
اللى بتشاور لها دى؟ تكونش البنت سكىنة المكعبرة
اللى ساكنة قبالك.

حسين : يا ستى وأنا مين هيجبنى

قلتلک انشاء الله تكون ست أبوها الهيلة. ده كلام عايز
فلوس .. وانتى عارفة. عشان كده با حب لحساب
غيرى وبأغنى عشان أبسط أخوكى ومرات أخوكى
وهكذا.

ناهد: وامتى هتغنى للى بتحبها
حسين : لما آخذ الشهادة فى إيدى .. وألقى وظيفة وألقى اللى
ترضى بحالى.

ناهد : وانت مين يرضا بيك يا واد انت (تمشى نحو الباب
تساور له)
(يخرجان)

(ستار)

المشهد الرابع:

كازينو على النيل بالمنصورة ... الوقت عصرا
والشمس مائلة الى الغروب. ناهد وحسين جالسين
على ترايزة.

حسين : ناويه تقعدى كثير هنا؟
ناهد : بارتاح أوى فى الكازينو ده يا حسين ! آه. نفسى فى
شقة على النيل هنا أعيش فيها مش عارفة ليه أول ما
أقعد هنا بأحس بالسعادة والصحة.

حسين : يعنى ما فيش سينما خلاص.
ناهد : لا ، لا سينما ولا مسرح – خلىنا هنا نتكلم على راحتنا.
حسين : عملتى خير حتى أنا عايز أقول لك خبر يبسطك.
ناهد : (يفرح) صحيح ! وساكت ليه ما تقول.
حسين : هفيت خمسميت جنيه فى ساعتين النهاردة.
ناهد : هفيتهم ازاي ؟
حسين : كسبتهم فى خبطة واحدة.
ناهد : خمسميت جنيه حته واحدة !
حسين : آمال حنتين . ما تفتحى مخك بقه ولا لسه مش فاهمة
حسين!

ناهد : وجت ازاي دى يا مضروب ؟
حسين : لعبة بسيطة من غير شيل ولا حط .
ناهد : لعبت قمار ؟
حسين : أيوه لعبة . لكن فى السوق..تصريح كسب وسماد من
الجمعية التعاونية اشتريته من واحد وبعته لواحد
تانى، وأنا قاعد فى الأجزاء على الكرسي.
ناهد : على كده محمود ما علمش بالحكاية دى ؟

حسين : لا محمود ولا حامد .دى انتهت فى ساعتين ما فيش غيرهم .

ناهد : المبلغ ده تجيب أنا أشيله عندى وما تجبش سيرته لبنى آدم منهم .

حسين :ليه كده ؟

ناهد : فلوس جبتهما بشطارتك يا خدوها هم ليه ؟ تضحك بدلع (مش قلت لك فتح مخك . الفلوس دى تفضل لنا نعمل بها حاجة للمستقبل

حسين : (ينظر اليها فى حيرة) وبعدين ؟

ناهد : ولا قبلين . فتح عينك وفتح مخك وأعمل حساب للمستقبل. تربت على خده) فوق .. فوق الجارسون وصل.

حسين : بس لو عرفوا أقول ايه ؟

ناهد : ما تخافش . قول الفلوس وصلت ناهد. انت ناسى انى بيعت الفدايين اللى حيلتى عشان يفتحوا الأجزاء.

حسين : بس .. بس.

ناهد : ما بسش ولا حاجة . أنا مستعدة لو حد زعلك أدبك كل الفلوس تشتغل بها

حسين : (يهز رأسه) خلاص أمرك .

ناهد : فيه حاجة تانية عايزاك تعملها.

حسين : تانى ؟

ناهد : أيوه تانى . مش اتفقنا تفتح مخك (تضحك)

حسين : آه. صحيح ! الواحد مخه عامل زى الأسفنجة. يفتح وبسرعة يقفل .. يفتح وبسرعة يقفل.

ناهد : (تضحك بصوت عالى) لآ بقه . انت مش أسفنجة .أنت من النهارده ورايح هتبقى الشاطر حسين .

حسين : قصدك الشاطر حسن !
 ناهد : زى بعضه الشاطر حسن بحق وحقيق مش كلام
 حواديت.
 حسين : خلاص يا ستى . فاضل حاجة واحدة .
 ناهد : ايه تطلب ؟
 حسين : (يقف) نقفى على التراييزة دى وتعلنى الآتى : أنا
 الأميرة شمس النهار ، حفيدة الأميراطور شهريار .
 أعلن باسمى وباسم الشعب الشهر مانى كله تعديل
 اسم العبد الفقير حسين بن عبد الجليل الى الشاطر
 حسن. ورفع من وظيفة مساعد صيدلى أرزقى الى
 وكيل ومنفذ لخطة السنوات الخمسة القادمة التى
 تهدف الى شراء شقة جميلة تطل على النيل .وعلى
 كازينو الشجرة بالمنصورة .
 ناهد : هایل. هایل . (تصفق بيديها)
 حسين : (ينحنى) شكرا ... شكرا (يضحك) بدمتك مش أنا
 دى خفيف ؟
 ناهد : طبعا، ولولا دمك خفيف كنت أخليك تمشى معايا .
 حسين : ده من حسن حظى يا مولاتى.
 ناهد : (بدلع) كفاية بقه هزار .. خلىنا فى الجد.
 حسين : نرجع للجد ، ايه طلباتك ؟
 ناهد : البنت نجية الحرباية ابتدت تسأل .عايزة تتدخل وتعرف
 كل حاجة. خايفة على مال جوزها.
 حسين : من مين ؟
 ناهد : منك ومن محمود !
 حسين : وأنا شأنى ايه ؟

ناهد : فتح مخك وأفهم اللي ها أقوله .
 حسين : قولى وفهمينى .
 ناهد : عايزاك تزود الغيرة بتاعتها.
 حسين : أنا ؟ أزود غيرتها؟ (ينظر اليها بشك ثم يبتسم) تحصل
 ازاي دى ؟
 ناهد : (بتركيز) كبر الحكاية فى دماغها . اتكلم كثير قدامها
 قول محمود بيسافر كثير. ويبضيع كثير لغاية ما
 يتخانق حامد ومحمود ويقسموا الشركة.
 حسين : وده لزومه ايه ؟
 ناهد : (تضحك) لزومه ايه ازاي ؟ مش قلت لك فتح مخك !
 حقى ضايع بين الاثنين. ولما يقسموا الشركة ها
 أعرف آخذ حقى.
 حسين : ما فيش طريقة تانية غير البهذلة دى ؟
 ناهد : كل الطرق ما نفعتش معاهم، وأنا عايزة أشوف
 مستقبلى . (بدلع) مش كده ولا ايه ؟
 مش كنت بتقول ان أبويا طمع على اخواته البنات
 وأكل حقهم فى الأرض. وأمك ضاع حقها كده. أهو
 أنا خايفة يعملوها معايا ويبضيع حقى زى عمتى.
 حسين : (يتأثر) آه ممكن. بس أنا وحدى مش كفاية. لازم
 تحركى محمود وتنبيهه أن الأجزاء القديمة
 والجديدة باسم حامد وحده .. وجايز يطمع عليه كده
 يبدأ هو يدور على حقه برضه.
 ناهد : هایل . أهو كده مخك بدأ يشتغل.
 (يأتى الجارسون ويقدم أطباق الجيلاتى)
 حسين : اتفضلى الصنف اللي بتحبيه .
 ناهد : (بسرور) انشاء الله ما اتحرم منك .

أى!
حسين : (يضحك) عضيتى لسانك ؟
ناهد : ياريت . أسنانى شعلت
حسين : نجيب حاجة سخنة .
ناهد : لأ . أسنانى مش طايفة .
حسين : قومى نشوف دكتور هنا .
ناهد] : ما فيش داعى ، لما نروح البلد اطلع للخواجة كرياكو
فى الشقة اللى فوقينا أحسن .
حسين : تحبى نمشى .
ناهد : يللا بينا - (تتقدم منه فيضع يده على كتفها فى طريق
الخروج)

(ستار)

الفصل الثانى

المشهد الأول:

شفة الدكتور كرياتو كاتو نيللو طبيب الأسنان
اليونانى فى جانب من الصالة انتريه، وعلى الحائط
خلقه لوحات عالمية لصور نساء عاريات. وفى
الجانب الآخر تراييزة عليها طاولة وخلفها على
الحائط صور تشريحية للأسنان. الخواجة يقوم بوضع
زهور فى زهرية بينما تتبعث من الراديو موسيقى
أجنبية. فجأة يدق جرس الباب وحين يفتح يفاجأ بناهد
تدخل بسرعة.

ناهد : متأسفة يا دكتور. أنا بعث اسأل عنك فى العيادة قالوا
انك هنا وأسنانى ملتهبة. وعندى صداع.
كرياتو : (يضحك) أهلا ست ناهد . اتفضللى (يقدم لها كرسي)

ناهد : شكرا يا دكتور. أسنانى تعبانى. قلت اطلع لك فى الشقة.
مش قادرة انتظر للصبح.

كرياتو : سلامتك (يلاحظ ان الدكتور ينطق العربى بلهجة
افرنجى وينطق الحاء خاء)

ناهد : بس يكون حضورى هنا هيزعجك . أنا عارفة انك ما
تحبش المرضى ييجوا هنا.
كرياتو : لا .. مش كل المرضى. أنا مبسوط انك جيت هنا. أنا
باسأل عليك كثير من الدكتور محمود.

ناهد : سألت عليك العافية . اصلك ابن حلال بتحب الناس
وبتسأل.

كرياكو : (يمد يده بمراية صغيرة يكشف بها اطباء الأسنان عادة
ويدخل المرأة فى فمها المفتوح ثم يدقق النظر فى
أسنانها يفحصها واحدة بعد واحدة وهو يحرك وجهها
بأصابعه وفى نفس الوقت يتأمل وجهها الجميل فى
نور اللبة القوى) أنت ما عندكش حاجة . أسانك
حلوة أوى . دى شوية التهاب فى اللثة. أنت ما تخافش
خالص.

ناهد : البركة فيك يا دكتور

كرياكو : عايزة مس كام يوم وتصحى (يمد يده بقطعة قطن
يمس بها ثم يعيد فتح جهاز التسجيل على موسيقى
أجنبية خافتة). أنت بتخب المزيكا الأجنبية؟ دى
بتريح الأعصاب وتبسط المزاج.

ناهد : يا بختك يا خواجه – مزاجك رايق على طول .
كرياكو : بعد شوية اجيالك حبتين ابتاليدون وفنجان شاى يحوش
الصداع فى الخال.

ناهد : كمان هتسقينى شاى ... الله يكرمك يا دكتور، أنا هانزل
أشرب عندنا .

كرياكو : مش ممكن .أنت أول مرة تيجى هنا . ولازم تقعد شوية.
أنت بطلت تروح المنصورة؟

ناهد : لا بطلت ولا بروح .

کریاکو : ازای دی ؟ موش فاهم حاجة.

ناهد : یعنی حسب الظروف .. لما با تعب یاخدونی للدكتور ولما ارتاح ابطل.

کریاکو : انت عایز فرفشة . موش دكتور . تعمل به ایه الدكتور واخذ شباب زیك جميل خلو أوی.

ناهد : ما بیدوناش فرصة عشان نهیص ولا ننسب .

کریاکو : (یهز رأسه فی استنكار) غلط ، ولیه ما تروخش مع محمود بیه اسکندریه تتفسح .

ناهد : ما أحبش أروح معاه فی أى مكان . بیحبس دمی ویکدر نفسی . ولو حصل وضحت بصوت عالى یثور ویتهانق معایا.

کریاکو : محمود بیه یعمل کده معاك . ازای دی؟ دی جنتل خالص. بیسهر معانا هنا بیبقی لطیف اوی أوی.

ناهد : ربنا یلطف بیه . ما حدش جاب لی النکبة غیر المضروب فی قلبه ده.

کریاکو : معلى ماتزعلش . أنت تتجوز وتسیبه.

ناهد : (تضحك) وفین اللى هیتجوزنی؟ تجوزنی یا خواجه؟

کریاکو : (یضحك) کان زمان .. خلاص أنا عجوز ما عندیش حاجة تنفع.

ناهد : مین قال کده . ده انت لسه شباب (تلتفت للجمهور وهی تضحك) تکونش خایف من العین.

کریاکو : (یضحك) أنا خلاص ما فیش حاجة للسئات .

ناهد : أمال السئات الحلوین اللى طالعین نازلین عندک دول بیعملوا ایه ؟

کریاکو : دی واخذ ست غلبان بتطبخ لیه . کان مجوز واخذ مدرس مزیکا وخلف منه بنت بعدین سابه وراح

أجوز واخذ تانى ، وبعدين سابه (يتحرك للداخل
يحضر الشاى ويقدمه لها)
ناهد : ما فيش داعى . أنا ها مضمض اسنانى وأشرب وبعدين
لما أنزل المهم اسنانى مش عايزة دوا تكتبه؟
كرياكو : ليه موش ترضى تتجوز الأستاذ سعيد ؟
ناهد : مين قال كده ؟
كرياكو : أخوك محمود . قال انت موش عايز تتجوز .
ناهد : ما جابليش سيرته ابدأ – حلو العريس ده يا دكتو؟

كرياكو : أوى .. هو مدرس فى الثانوى . راجل فنان بيجى
يسهر معانا هنا .
ناهد : ولسه بيجى هنا ؟ الأستاذ فريد بيعرفه؟
كرياكو : ده الصديق بتاعه – بيزوره كثير .
ناهد : مدام سامية ما جابتليش سيرته ومحمود ما خدش رأى
(تسرح قليلا) شفت الواد مجرم أد ايه ؟
كرياكو : غلطان كثير . بس انت ما تزعلش . أنا نقوله تانى
ناهد : يعنى العريس لسه موجود ؟
كرياكو : موجود ويمكن بيجى الليلة . آه الليلة هيجى هنا هو
ومحمود اشان نسهر .
ناهد : والنبي يا دكتور تحاول تانى مع محمود عشان يوافق .
ربنا يخليك . أصل دماغه ناشفة خالص .
كرياكو : دى أنانى . أنت لازم تتجوز . ما يصحش تقعد كده
ناهد : قول له كده يا دكتور . فهمه والنبي .
(هنا يدق الجرس .يفتح الدكتور الباب ويدخل رجل
طويل نسبيا يميل الى النحافة . فى حوالى الاربعين .

شعره طويل وخفيف. يرتدى نظارة سوداء سمكية
وشارب طويل يتدلى على شفتيه)
كرياكو : أهلا سعيد بيه . أعرفك بدموزيل ناهد . أخت الدكتور
محمود

سعيد : أهلا (يمد يده وينظر اليها بتمعن)
ناهد : (تمد يدها وهي تتفحصه) أهلا يا با شمههندس .
كرياكو : اتفضل يا أستاذ فى الأوده هناك شوية (يبتعد ناحية
الغرفة ويجلس هناك) ايه رأيك ؟ (لناهد)
ناهد : (وهي تضحك) مش بطل على رأى المثل ، ضل
راجل ولا ضل حيط .

كرياكو : دى كويس خالص .
ناهد : همتك يا خواجه . فتك بعافية. باى (يودعها وهي
خارجة)
سعيد : (بمجرد خروج ناهد يتقدم الى الخواجه وقبل أن ينطق
بكلمة يبادره الخواجه بالكلام)
كرياكو : شفت أستاذ سعيد ناهد؟ واخذ ست كويس خالص. وخلو
أوى

سعيد : خلوة فعلا . لكن اخواتها مش عايزين ليه يجوزوها؟
كرياكو : مسكين عايز يجوز واخواته عايزينه يقعد يخدمهم.
سعيد : غلطانين – وليه يقعدوها بعد السن ده ؟ ما يجوزوها
بقه.

ابعت لهم الشغالة بتاعتى بس ياريت يجوزوها لى .
البننت مستوية خالص (يتحرك فى الصالة) خالص
عالسكين.

كرياكو : (يضحك بسرور) تمام .دى كمان عنده عاطفة كثير
أوى (يحرك يديه محاولا أن يجعل بينهما مسافة
ليجسد معنى الكثرة أو الكبر)

سعيد : وبعدين يا خواجه أنا حبيتها.
كرياكو : دكتور حامد أخوه الكبير بيجهاز عشان يجوز ، والدكتور
محمود هو اللي متمسك بيه .

سعيد : عايز لها دكتور أو مهندس طبعا .
كرياكو : انتى يا خبيبي عليك تقول عايز أجوزه . ومستعد بكل
حاجة.

سعيد : بس كده .
كرياكو : بس انتى تقول كده ، وبعدين تشوفى.
سعيد : وأنا هاجيب منين كل حاجة .

كرياكو : هم مبسوطين ومعاهم فلوس كثير . انتى مدرس كبير
وفاهم طبعا لما تكون عايز سيجارة من واخد تانى .
ما تقوليش هات سيجارة من اللى معاك . انتى تديله
هو سيجارة الأول .. بعد شوية يخلف عليك تأخذ
سيجارة.

(يضحك) كده تمام . عايز تناسب واخد غنى معاه
فلوس كثير . قول أنا عنى زيه . ومش عايز حاجة منه
...هو عايز يعمل انه أغنى منك يروح يجيب حاجات
غالية وجميلة وفخمة مش تخلم بيها . فهمتى يا أستاذ
مغفل.

سعيد : ده انت عفريت مش خواجه.
كرياكو : (يضع أصبعه على رأسه) أصل هنا فى واخد مخ مش
بسطرمة.

(يضحكان ويخرج سعيد ، وهنا تظهر فاطمة) !

فاطمة : أيوه يا دكتور (تتقدم من ناحية المطبخ امرأة طويلة
ممتلئة الجسم خمرية اللون تفيض بالحيوية)
كرياكو : اسمع . خلاص روخ نام مع بنتك
فاطمة : واشمعنى الليلة عايزنى أمشى بدرى ؟
كرياكو : فيه ناس جايين بسهروا الليلة وعايز ارتاخ شوية .
فاطمة : فهمت .. ومش عايزهم يشوفونى؟ يا حبيبى يا خواجه
انت بتغير عليه كثير الأيام دى؟
كرياكو : موش عايزهم يشوفوا بطناك .
فاطمة : (فى سخرية ولا مبالاة) ابنك يا دكتور. ضناك، ولى
العهد ياراجل. حد ينكسف من نعمة ربنا؟
واحد عجوز ومقطوع زيك حقه يفرح.
كرياكو : دى فضيحة أنت واخذ مش كويس .. مش مضبوط
تروح بينك بسرعة.
فاطمة : بعد ايه ؟ عايز تتهرب من الجريمة؟
كرياكو : يللا .. بلاش كلام كثير ... دى بتاع الدكتور قواد. مش
بتاع الأنا.
فاطمة : (تتصنع الغضب) هنعيد الأسطوانة تانى . الدكتور
فؤاد ما لو ش دعوة. ده ابنك انت يا خواجه. عيب
تتبرا منه.
كرياكو : أنا ما فيش حاجة زى كده .. أنا ما عنديش عيال. عندى
سكر وضغط بس شوف مين عمل فيك كده.
فاطمة : الدكتور فؤاد كان هنا من أسبوعين لكن ده (بقاله)
ثلاث شهور يا لنيم وان ما سكتش هخليهم يحللوا دمك
ودم الطفل ويكشفوا الحقيقة .

كرياكو : أنت واخذ بطال . كداب تضحك عليه وتدى نفسك
للدكتور فؤاد البصباص الخاين. أشان يجى بيتى
ويعمل كده .اشان عينك فارغة

فاطمة : عايز تستهبل عليه . ومن امتى الخواجات بيخافوا من
الفضايح؟ الواد هاعلقه فى رقبتك. اشمعنى حبوبتك
القديمة اياها اشتريت لها بيت وعايز ترمى ضناك يا
عديم القلب! عيازنى اطلع فشوش.. ده بعدك يا
خواجة كاتوينللو (تهز أكتافها وأردافها) والنبي ما
هيحصل (الخواجة يتحرك نحو المطبخ ويأتى فى يده
كأس براندى ولا يكاد يجلس فى مكانه حتى تتقدم منه
فاطمة)

فاطمة : أيوه كده روق .. ينعل أبو الدنيا (تمسك الكأس وتقربه
من فهمه ثم تسحبه بعيدا عنه) فين الكاس بتاعى؟
(ينظر لها فى استعباط) ايه مش عايزنى أرقص لك
الليلة .. ما عدش هز البطن يبسطك.

كرياكو : (يضحك فى بلاهة) روح أرقص للدكتور فؤاد .أنت
موش تمام .

فاطمة : ابقى تمام لما أسقط الجنين مش كده .

كرياكو : تبقى تمام خالص .. تبقى كويس

فاطمة : دى جريمة.

كرياكو : دى جريمة انك تجيب عيال . تعمل بيها ايه العيال. البلد
مليان عيال مش لاقين يا كلوا.

فاطمة : (تقف فى حركة تهريج) مش كل العيال ... ده ابنى
وابن الدكتور كرياكو كاتو نوللى، أكبر طبيب أسنان
فى الوجه البحرى واسكندرية.

كرياكو : (يهز رأسه) طظ . ما خليتوش حاجة . مافيش حاجة .
كله راخ فى لعب الكونكان . أحسن لك تروخ للدكتور
فؤاد البصباص أشان يديك حاجة تنزل الجنين .

فاطمة : مستعجل . عايز تتخلص بسرعة؟ ولما يحصل لى
تسمم وأموت . أبقي فى ستين داهية . وانت يهملك ايه؟
وأسيب بنتى تضيع وسط الكلاب زى ما ضيعتوني .
كرياكو : (بلهجة هادئة) ما تخافش .. أنت موش تموت فاطمة .
أ،ت كوى أوى صحتك زى البمب .

فاطمة : (فجأة تغير لهجتها) ولا يهملك يا خواجه .. وأنا ها
خلصك خالص .

(تملأ كاسا وتشرب) اضرب على البيانو .

كرياكو : (بفرح صبياني) برافو فاطمة لكن ازاي دى هيجصل
؟

فاطمة : بأحدث طريقة .

كرياكو : أنت هتعمل عملية ؟

سعيد : عملية ايه يا راجل يا متخلف ؟ بالرقص . يهز البطن
.اختراع ما يعرفهوش الخواجات اللي زيك .

كرياكو : (فى غاية الانبساط) أنت عفريت فاطمة (يقدم كأسا
ثم بقرع كأسها بكأسه) فى صحتك يا فاطمة .

فاطمة : (تفرغ الكأس فى جوفها) مزيكا يا خواجه . اضرب
مزيكا عشان أوريك .

كرياكو : (يجلس على البيانو ويبدأ فى اختبار الأوتار والعزف
محاو لا الوصول الى نغمة صحيحة ، وفى أثناء
انشغاله بهذه العملية تتقدم فاطمة نحو الجمهور وتبدأ
التحدث اليه)

فاطمة : ما عدش حد عبيط ولا حد أهبل . ما عدش طائش
ومجنون الا أنا حتى الخواجة كرياكو بقى يعرف
الفضيحة ويخاف منها. ما فيش فرق بين الخواجة
كاتونيللو اليونانى وبين المعلم حمودة السنباطى
مدرس المزيكا . كلهم أندال (تنتظر الى الخواجة)
اخص على ده الصنف .. يعملوا العملة ويتهربوا
منها. حتى الأولاد ينكروها ويتملصوا من مسئوليتها.
ومن غير خجل، عاملين رجالة. رجالة آخر زمن ما
يختشوش حتى من ربنا.

كرياكو : (يلتفت نحوها) ايه ده بتقول ايه ؟
فاطمة : كلام ما يفهموش الخواجات . اعزف . اعزف مزيكا
على طول سخن (تعود للاتجاه نحو الجمهور)
الاولانى حمودة السنباطى. كان فنان (تهز رأسها فى
أسف) كان مدرس مزيكا لكن ياه! فنان بحق وحقيق
. لما كان يعزف على العود كنت أحس بكيانى كله
يرقص ويطير فى عالم تانى. عالم كله جمال وحب
وسعادة. ومش كده بس ده علمنى الغنا والرقص. كان
يحفظنى الأغنية احفظها وأغنيها وهو يعزف، أنا
بارقص وهو سعيد .. خمس سنين كانوا حلم .. ياما
حكالى عن ألف ليلة وليلة، وسمعى الموشحات
والأغاني القديمة. ماكانش فيه غير الحب والمزيكا
والأغاني. نسينا كل شىء (تضحك ساخرة كنا
عاشين فى ألف ليلة وليلة، ليالى بغداد والرشيد مش
دريانة بتقسى. . ما فكرشى لا فى حاضر ولا
مستقبل. وفجأة تغير كل شىء. فين وفيه لما اشوف
جوزى. أثارىه أعلق بواحدة تانية. شابة حلوة وشقرا

زى بنات الخواجات . ونسينى ونسى بنته – وكان لازم اسييه. ما طقتش اشوف واحدة تانى تشاركنى فى جوزى .

كرياكو : (كان قد توقف وسمع الجزء الأخير من كلامها) لكن ما عندكش مانع يشترك فيك ثلاث رجالة .

فاطمة : اسكت يا خواجه يا بن الايه . كنت فاكرة انك انسان طلعت تلعب . كنت بتقول انك مودرن ومتحرر . عايز كل واحد يعيش على هواه وزى ما يحب . لغاية ما خدعتنى وطلعت زيهم كمان وألعن . آه لو كنت أقدر على القتل . كنت انتقم منك ومن السنباطى ومن كل الرجالة اللى زيكم لكن اقول ايه ؟ مش قادرة أعمل شىء مش قادرة حتى اخلص نفسى منك . وازاى بعد اللى حصل وتعودت على الشرب والرقص والمتعة) هنا ترتفع أنغام لحن راقص فتمسك بالشال تلفه حول خصرها وترقص . يندمج الخواجه فى العزف وتندمج هى فى الرقص بعنف ونشوه حوالى خمس دقائق تنتهى بان يقوم الخواجه كرياكو ويتقدم منها مبتهجا ومهلا يحاول ان يأخذها بين ذراعيه فترقص وتدفعه بعيدا عنها ثم تتكلم للمرة الأخيرة) كان زمان وجبر . أنا لى حساب لازم أصفيه .

(تتخرط فى البكاء ثم تنزل الستار)

المشهد الثانى:

(شقة ناهد كما رأيناها فى الفصل الأول \. ناهد تفتح

الباب وتجد حسين)

ناهد : ادخل يا حسين

حسين : ايه يا ناهد . فيه حاجة , أسنانك ارتاحت عالدوا اللى جبته

ناهد : الحمد لله . ايدك فيها الشفا ,

حسين : ايدى ولا ايد الخواجة اللى قال عالدواء

ناهد : لكن ايدك اللى جابت الدوا . انت الوحيد اللى بتهادنى .

وبتقضى كل طلباتى .

حسين : عيب يا ناهد تقولى كده . ده انتى بنت خالى برضه .

لحمى ودمى أختى (يتغير صوته ويرق جدا) انتى لما

تعى بأحس ان أنا عيان . لما اشوفك مبسوفة

بتضحكى بأشوف الدنيا كلها فرحانة .

ناهد : (تضع يدها على كتفه) صحيح يا حسين ؟ الكلام الحلو ده

بتجيبه منين يا حسين ؟ بتألفه ولا بتحفظه من الكتب .

حسين : الكلام طالع من قلبى . يا ناهد أنا غلبان طول عمرى فى

تعب وعرق ليل ونهار . باشقى كتير وباتعذب عشان

حاجات كتير نفسى فيها – ومش طايئها . عشان كده

بأحس بيكى وبألامك .

ناهد : بس كفاية لحسن هتفكرنى بالأخزان . وأنا قلت لك من

أيام أوع تشغل بالك عالفلوس . أنا معايا فلوس كتيرة

كلها تحت أمرك . خد دروس زى ما انت عايز وحقق

النجاح . ياريتهم كانوا سابونى أتعلم وأكافح . واشتغل

حتى بعشرة جنيه وأحس بكيانى زى بقية البنات الا

حبسونى زى القرد فى القفص .

حسين : زى القرد! ما تقوليش كده. انتى قمره منوره البيت ده
من غيرك كان هيضلم.

ناهد : وهو بيتى يا حسين ؟

حسين : بكره يبقى لك بيت أحسن منه .

ناهد : (تبتسم) صحيح يا حسين !!

ايه ده اللي جبته فى الكرتونه. محمود وصل

حسين : آه لسه واصل . وسبته فى الاجزاخانة يجرد الحساب

وجبت أنا الكرتونه . بس ما أعرفش فيها ايه زى ما

قالى وديها أنا جيتها وجيت.

ناهد : (تفتح الكرتونه) دى فيها جاتوه وبسبوسة . أقعد يا وله

كل حته وخذ معاك حنتين لأمك واخوك.

حسين : هأكل واخد كمان لأمى وأخويا (تحط الجاتوه)

ناهد : آمال – عمتى .كانت حنينه أكثر من خالتى

حسين : بس مسكينة ما حيلتهاش حاجة . لكن خالتك برضه

متريشة. احنا فين وانتوا فين.

ناهد : (تضربه على صدره) ما تقولش كده . البركة فيك بكره

تبقى دكتور زى حامد ومحمود ويمكن أحسن.

حسين : مرة واحدة كده . انتى واخده مقلب في. وانا لو جببت

ستين فى الماية وانتسبت لكلية التجارة هابقى حقت

المنى.

ناهد : هتحقق باذن الله كل اللي انت عاوزه .

حسين : يا سلام يا ناهد ، كلامك ده بيفتح لى باب الأمل .

بينسينى همومى.

ناهد : وأنا كمان يا حسين . لكن قول لى اخواتى ليه مش

عايزين يجوزونى.

حسين : مش معقول ؟

ناهد : كل ما يجى عريس يطفشوه . آخر واحد جابه الخواجة
كرياكو قالوا ناهد مش راضية من غير ما أعرف
ولا أسمع لما يفتنى القطر.

حسين : اطمنى . عمر القطر ده ما يفوتك . انتى حلوه وطيبة
وصغيرة ولسه بدرى وكل سنة تفوت عليكى بتزيدى
حلوة وأمارة.

ناهد : يا حبيبى يا حسين ، لو حد من اخواتى قال كلمة من دول
كانت الدنيا ما تسعنيش.

حسين : ما تزعليش . أصل الحكاية محسوبة تمام. اللى معاهم
كلام مامعاهمش فلوس. واللى معاه فلوس ما
بيتعاملش بالكلام. اخواتك شافوا أيام قاسية كتيرة
بس مش زى أنا طبعا . لكن بقه عندهم قدرة وفلوس
كتيرة ومكاسب من كل ناحية.

ناهد : وأنا تايهة مش عارفة مصيرى ايه . أو نصيبى فى ده
كله . نفسى أعرف وانت يا حسين خليك جنبى.
اعرف كل شىء وقوللى عايزة أعرف حقى. لما
تشوف محمود وانت راجع قول له ان أنا راقدة
تعبانة. لازم أدور على نفسى بسرعة. ساعدنى يا
حسين وأكتم سرى.

حسين : اطمنى هاعمل كل اللى يرضيكى (يخرج)

ناهد : حسنية

حسنية : نعم يا ستى

ناهد : أنا هادخل أنام، لما يجى الدكتور محمود قولى له
أسنانها تعبها ومصدعة . راحت ليلة أمبارح للدكتور
كرياكو(تقرب منها وتهزها من كتفها) حسنية حبيبتي
فاهمة . أنا قلت ايه؟

حسنية : أيوه . عيانة ومش تقدرى تقومى من السرير
ناهد : برافو ! وهاتى بوسة على كده. (تقبلها) كمان حاجة
النهار كله تعبانة ومزرجنة يعنى حاولى تنكدى
عليه .

حسنية : (تضحك على الآخر)
ناهد : ادخلى المطبخ اتعشى . خدى جاتوه وكلى. وأبقى
حضريله الأكل اذا طلب.

حسنية : تصبى على خير.
ناهد : (تبتسم بحنية) يا حبيبتى يا حسنية ، لولا وجودك معايا
كنت انتحرت من زمان . (لا تكاد تدخل ناهد حجرة
نومها وتغلق الباب حتى يدق الجرس دقة واحدة حتى
تسرع حسنية وتفتح الباب. ويدخل محمود)

محمود : أزيك يا حسنية ، ناهد فى ؟

حسنية : راقدة فى أودتها .

محمود : ايه يا بت ؟

حسنية : (تبدأ تمثل بيديها وعينيها وصوتها) أسنانها يا حبة
عيني بينقحوا عليها النهار كله ، مدوخينها من ليلة
امبارح.

محمود : راحت للدكتور ؟

حسنية : الدكتور كريكو مس لها مرتين وعطاها حبوب . عندها
صداع ومزاجها متعكن خالص من ساعة ما نزلت
من عنده.

محمود : آه (يهز رأسه) يمكن قال لها حاجة (يفتح باب
الحجرة وينادى عليها . تظهر ناهد نصف راقدة تنظر
اليه فى عتب دون أن تتكلم) ناهد
؟ مالك (يهزها) ردى على . فيه ايه؟

ناهد : تدفع يده بعيدا عنها وتستدير ثم تضع راسها على
الوسادة)

محمود : قومي يا ناهد . اياك كرياكو قال لك حاجة تزعلك منى.
قومي يا أختى قولى مالك، كرياكو أهبل وعبيط
بيخرف باستمرار.

ناهد : (فى السرير وهى تنظر اليه نظرة لوم خفيف)
مافيش حد عدل غيرك انت؟ كرياكو أهبل وأنا
مجنونة وانت اسم الله عليك كامل الأوصاف.
محمود : أيوه كده الله يفتح عليكى . خضتيني قومي. قومي.
جهزت لك حطة مفاجأة.

ناهد : (تفرح) لي أنا ؟

محمود : أويه . مفاجأة.

ناهد : هيه ايه ؟

محمود : حذرى فظرى . تقولى آيه؟

ناهد : ياترى اللى فى بالى ، معقول ؟

محمود : وأحسن .

ناهد : ما تحيرنيش . المفاجأة الوحيدة اللى تسرنى هيه اللى
فى بالى أتا.

محمود : طيب قولى اللى فى بالك .

ناهد : عريس !

محمود : يخى . هو ده طلب يا شخية ده أنا لو حببت أجيب لك
ميت عريس.

ناهد : صحيح ؟ أصل العرسان مرصصين فى الشوارع؟

محمود : فيه حاجات أهم . أنا جبت عربية مرسيدس .

ناهد : (بسخرية) مبروك عليك . بس دى أعمل بها ايه. ها
تفسح فيها ولا هاروح بها الجامعة. دى تخصك أنت

تصيع بيها - أما أنا هافضل هنا زى الكلبة
المسعورة.

محمود : اخص عليكى يا ناهد (يربت على كتفها) يا حبيبتي انتى
طالمانى . أنا باجرى ورا الشغل، ورا المكاسب فى
كل حته . عيب أنا مش صايع . انتى عارفة من سنتين
ثلاثة كنا ايه وأصبحنا ايه. مين عمل ده كله ؟ أنا
عامل صيدلى وتاجر كسب وسماد ورز وكل حاجة.

ناهد : اسمع بلاش لف ودوران أنا مين أنا ؟ فين نصيبى .
أنت أخذتمونى مضيت على بيع الفدانين بتوعى. ما
كتبتوليش حاجة فى الهيصه اللى أنتم فيها - بعد حامد
ما يجوز وأنت تتجوز, أنا هاعمل ايه ؟ أخدم مراتك
ولا مراته ؟ وان ماخدمتش ايه اللى هيحصل لى ؟
هابقى اشحت منك انت وهو؟

محمود : أخص عليكى يا ناهد . خدى اللى تطلبينه.

ناهد : ده كلام فك مجالس . الصبح ببقى غير كده.

محمود : طيب الصبح ببقى ايه ؟

ناهد : أنا دفعت رأسمال التجارة بتاعتكم دى ... مش كده؟

محمود : طبعا ما بننكرش ده --

ناهد : ببقى ليه نصيبى فيها - التلت . الربع . الخمس . السدس
. حاجة تبقى محددة ومكتوب بها ورق عشان اضمن
حياتى ومستقبلى.

محمود : كلام جميل . احنا رجلين وانتى نص. ببقى لك الخمس
على طول . الكلام ده فيه عيب؟

ناهد : بس التنفيذ بالورق وانت لازم تعرف حقك . حامد كاتب
كل شىء باسمه-

محمود : بكره زى دى الوقت تكون الورقة جاهزة . يجى حامد
من المحلة الوقت ونقوله.

ناهد : وينسجل كله فى الشهر العقارى . حامد ما ينضمنش
الوقت وراه نجية وأمها زى التعابين . عايزة
تعرف كل حاجة وتكوش عليها.

محمود : ده كلام الناس العاقلين . فيه حاجة تانى.

ناهد : تعشيت ولا لسه -- ؟

محمود : ابدأ . قومى نتعشى مع بعض.

ناهد : (تتحرك وتترك السرير) حسنية . حطى الأكل على
الترابيزة.

(لمحمود) العريس اللى جابه الخواجة كرياتكو
طفشته ليه من غير ما تقول لى ؟

محمود : يا بنت الناس ده جدع شربة ما ينفعكيش.

ناهد : يا ترى هو الى ما ينفعليش ولا انت شايف ان أنا ما
أنفesch عروسة.

محمود : لأ . ده كبير عليكى ووظيفته مش قد كده.

ناهد : بس أنا شفته ليلة امبارح داخل عند الخواجة . شكله
مش بطل.

محمود : بس ما حيلتوش حاجة . حته مدرس بتاع رسم.

ناهد : وماله المدرس ؟ امال عايزلى دكتور.

محمود : على الأقل صيدلى من اللى بيشتغلوا معانا فى
الاجزاخانة . تبقى انتى صاحبة الاجزاخانة وهو
صيدلى عندك.

ناهد : وأن ماجاش الصيدلى . سيبك من الكلام ده . قال
عصفور فى ايدك.

محمود : بس اصبرى يا شيخة . مدرس ايه بس اللى تتجوزيه؟
هم المدرسين بياخدوا مرتبات ده أنا بأضيع فى اليوم
الواحد مرتب مدرس فى شهر.
ناهد : ليه يا أخويا . أستاذ فريد اهو مبسوط خالص.
محمود : ده بتاع انجليزى بيدى دروس . لكن ده بتاع رسم ما
حليتوش غير الفرش.
ناهد : واحنا من كام سنة كان حيلتنا ايه.
محمود : أفهم من كده أنه عاجبك .
ناهد : أوى .
محمود : أدبنى فرصة استشير حامد . ونشوف هيقول ايه بعد ما
رفضناه .
ناهد : يا حبيبى يا محمود . أنت حنين الليلة خالص (تعانقة
بفرح. يدخل ليغير ملبسه)
محمود : هاخلع هدومى عشان أتعشى . يتحرك ناحية حجرة
النوم . وتبدأ ناهد ترقص فى عنف ونشوة ثم تبدأ
تغنى (ما تزوفينى يا ماما . أوام يا ماما) (بعد قليل
تتذكر)
هيه فين بس ماما عشان تزوفنى (تتوقف عن الغناء
ثم تنخرط فى نوبة بكاء حار حتى تنزل الستار)

المشهد الثالث:

- (شقة الأستاذ فريد جارهم. فى الصالة ناهد وسامية)
- ناهد : تعرفى يا مدام سامية الأستاذ سعيد بتاع الرسم جاى يخطبنى. عارفينه يا مدام؟
- سامية : ايوه ده زميل جوزى وصديقة الحميم.
- ناهد : ما قلتوليش قبل كده.
- سامية : يمكن ما جاتش مناسبة .
- ناهد : بعث الدكتور كرياتكو كلم محمود.
- سامية : على بركة الله . أنتى شفتيه وعجبك ؟
- ناهد : شفته على الطاير شكله مش بطل . بس شنبه طويل أوى.
- سامية : (تضحك) ابقى احلقيه.
- ناهد : تعرفى ايه عن أهله؟
- سامية : أهله ناس طيبين. واحدة من أخواته دكتورة فى الجامعة والثانية ناظرة مدرسة. وعندهم بيت فى اسكندرية كده من دورين فيه أربع شقق وأخته ساكنه فى شقه – والباقي متأجر. بس هو ما بياخودش حاجة.
- ناهد : زى بعضه . مستغنين عنه يعنى.
- سامية : آه . وأحياناً بيدوه مبالغ كده صغيرة.
- ناهد : طب والله عال . ده محمود فاهم انه شربه وما حيلتوش حاجة.
- سامية : لأ. أطمنى.
- (ستار)

المشهد الرابع:

يتغير المشهد. صالة بمنزل الخواجة كرياكو. فريد وكرياكو يلعبان الطاولة. يدخل محمود. كرياكو يرحب به. كرياكو : أهلا أستاذ محود . متشكرين على الإزاحة. النوع الثانى كان أحسن. محمود : (يبتسم بغیظ) النوع الثانى مش موجود . ولو كنت عرفت اللى عملته قبل ما أبعثها كنت حطيت فيها سم فيران.

فريد : يا ترى جرى ايه ؟ عمل فيك مقلب؟ محمود : وأى مقلب يا استاذ ؟ كرياكو : ايه اللى بتقوله دى (بحيرة وجدية) لمين سم الفيران دى.

محمود : (فى برودة) لواحد خواجة ابن حرام. كرياكو : مين دى ؟ عمل فيك مقلب ؟ زى الدكتور فؤاد دى ما عندوش أصل ولا أخلاق.

فريد : (ينظر لمحود ويقهقه) انا مش فاهم حاجة. كرياكو : (يضحك) فاطمة دى واخذت كويس . كان مجوز واحد بتاع مزىكا . سابه وأجوز واحد ست تانى . شفت يا فريد بيه . رجل ندل ما ببسألش فيه . ما فيش فلوس ولا بيديه حاجة هياكل منين هو وبنته؟ عشان كده ابتدا يشتغل . يعمل ايه ؟

فريد : لكن محمود بيقول أنك مجوزها. محمود : دى حامل منه.

كرياكو : رجل بطل . مديه المفتاح بتاع الشقة أشان لما أموت
كده فجأة يكفنى بالفلوس اللي عنده . أنا واخده صديق
واثق فيه . بعدين يخلينى فى البلاج ويبجى يضحك
على فاطمة.

محمود : طب قول لنا عملت ايه لما عرفت؟

كرياكو : رخت على طول . قلت للست بتاعه . مراته واحد ست
حلوة أوى . بنت ناس كويسين . متربية كانت بتستغل
أبله بتاع فرنساوى . وعنده ولدين لطاف أوى . أوى
قلت جوزك دى راجل بطل نجس . بيعمل حاجات
بطالة مع الشغالة بتاعى .

(محمود وفريد يضحكان على كلامه)

فريد : وفاطمة ازاي تسلم نفسها له ؟

كرياكو : ده ست طيب أوى . ما يقولش لأ ابدأ (يضع يديه على
صدره ويحاول أن يشرح) أصل عنده عاطفة كبيرة
أوى . عاطفة حب يعنى .

محمود : عشان كده اتلمت عليك يا خواجه يا أهبل . ده فؤاد واد
جن قدر يستكردك .

كرياكو : (يدخل الحجرة الثانية . يحضر كتابا كبيرا . يقرأ باللغة
اليونانية ويترجم) دى كتاب فى علم النفس اسمع يا
فريد بيه . سوف يقول ايه دى (يقرأ بضعة سطور
بصوت منخفض ثم يخلع النظارة ويبدأ يترجم) الست
ده جسمه مليان أوى - يعنى كوى - فيه حيوية (
يوضح بيديه) شكله حلو أوى . وشه أحمر أوى
عنده عاطفة عايز يديها لواحد راجل . يعنى عنده
هنية كثير أوى . أشان كده هو يخب الناس لما واحد

يقوله كلام حلو. يقول له باخبك . يخبه على طول
أشان عايز يدى الخب اللى عنده.
محمود : وبعدين تسبب نفسها لأى واحد يا راجل يا تحفة.
كرياكو : صحيح آه . أشان بيخب الناس. عنده أطفة كوية أوى
(فجأة) انت واحد غشسيم ما بتفهم.
فريد : لكن الحالة دى غريبة
كرياكو : موش حالة غريبة ولا حاجة . دى مستوى أوى. وعايز
واخذ يخبه أشان ينبسط .اشان يشاركه فى مشاعره
الأطفية . اشان يديه الخب اللى عنده . دى عامل زى
واخذ غنى عنده كتير فلوس وهو كريم عايز يدى
الناس التانيين (لمحمود) اصله كريم موش غشسيم
زيك .
محمود : (يغمز لفريد) يا جدع سيبك من الكلام الفاضى ده .
خواجة أهبل مخه طائر.
كرياكو : انتى موش تفهم كتير . أمال انتى بتروح اسكندرية
تعمل ايه.
فريد : أنا عايز أعرف بالضبط ايه اللى بينكم نازلين على
بعض تلبخ.
كرياكو : (يضحك) دى واخذ أفندى ما بيفهمش. رجعى وموش
بيؤمن بالعلم. ده عايز يمسك الشنب بتاعه ويبرمه
ويشخط ويؤمر ويقول تكاليد.
محمود : أنت خواجة مخك طائر فى الهايفه..لكن احنا شرقيين لنا
طابعنا وتقاليدنا.
كرياكو : طظ فيك . ايه يعنى شركى أو غربى دى انسان ودى
انسان ولا دى انسان (يشير الى محمود) ودى
حيوان .

فريد : (يضحك وهو ينظر لمحمود الذى يضحك أيضا) رد
يا أخ.

محمود : ده خواجه أهبل . البننت تيجى علشان تعالج أسنانها
يقلبها علينا ويقول لها سعيد عايز يجوزك .

كرياكو : انتو موش عايزين أختك تتجوز ليه ؟ أنتى عندك خبط
فى النفوخ بتاعك . ما فيش مخ . اشمعنى انتى
تروخى اسكندرية تلعب مع الستات البطاليين زى
الدكتور فؤاد وتقول شركى . شركى.

فريد : ودى حاجة تزعلك يا محمود . راجل ماشيلكم فى الخير.
محمود : طبعا . لأن البننت تعبانة . مريضة وعصبية وما تنفعش.
كرياكو : ايه يعنى . لما ما ينفعش . تبقى تطلق .
فريد : والله فكرة !

محمود : ازاي بس اهنا هنعملها حقل تجارب وان خلفت ؟
فريد : مش مشكلة . بلاش تخلف سنة أو سنتين لغاية ما تتأكد
من نجاح الجوازة.

كرياكو : خرام عليكم دى أختك واخذ ست حلو خسارة . لازم
يجوز وينبسط دى عايز واخذ يخبه.

محمود : (يقاطعة) هات الطاولة فضنا من دى السيرة.

فريد : وليه ما نفكرش فى حل ، وتخلينا نفكر معاك . أصل
مش معقول نقعدوها على طول كده.

كرياكو : (يملأ كاس من البراندى ويقدمه لمحمود) ياخذ واحد
كاس الأول أشان مخعه يفتح ويعرف يفكر.

فريد : (يشرب) نوع ممتاز يا دكتور.

كرياكو : دى جابه مخمود تيه ولو انه ما بي فهمش .

محمود : انت شغال طبيب أسنان ولا طبيب قلوب ؟

كرياكو : انت مش مثقف انتى مخك مقفول انتى لازم تخب
عشان نقدر تفهم .

محمود : كفاية انت نعملك أفوكاتو الحب فى العمارة . أmaal
متجوزتش ليه لما انت فالح.

فريد : آه صحيح يا دكتور؟

كرياكو : أنا كنت بأخب واخد ست كويس أوى . كان بيخبنى
موت (يهز رأسه) كان ست نضيف خالص خالص.
كان يعمل كل حاجة فى البيت تمام . لما كان يشوف
شراب مكطوع كان بيخيطه على طول.

محمود : انت متخصص فى الشغالات.

كرياكو : دى ست طيب كان متجوز راجل طيب.

محمود : وكانت بتحبك على جوزها !

كرياكو : جوزها كان راجل طيب.

فريد : كان بيحبك برضه ؟

محمود : كان يجى هنا مبسوط خالص (يهز رأسه فى أسف)
أنا بنيت لهم بيت ثلاث أدوار فى المنصورة.

محمود : وراحت فىن الحبوبة - يا كو توموتو يا حبيب.

كرياكو : راخ . راخ . مات من أربع سنين . شوف فريد بيه . كل
يوم خد بازورها وأحط وردة حمرا على الكبريتاعه
كان بيخب الورد الأحمر (يمسك زهرية الورد)
هو اللي جاب الزهرية دى . أشان يحط فيه ورد كل
يوم . أشان كان بيخب الورد باخد له ورده كل
أسبوع.

فريد : (بسخرية) يا سلام على الوفاء يا خواجه .

محمود : قول يا سلام عالهيل . المهم البيت راح عليك؟

كرياكو : (يهز رأسه) أنا سبته للبنت بتاعه وجوزها أشان راجل طيب .

محمود : أكمئك بتلبخ كل يوم تجيب واحدة شكل.

فريد : عشان بطل يحب ؟

كرياكو : خلاص (يهز رأسه فى ندم) كنت مبسوط أوى أوى .

فلوس كتير أرض ومبان بتاع بابا . راخ كله عالقمار .

محمود : خلصنا من السيرة دى . احنا مش ناقصين نسمع تاريخ هيافتك . فضنا وهات الطاولة .

كرياكو : اسمع قبل ما نلعب نتفق على يوم أشان نزورك احنا والأستاذ سعيد .

محمود : سيبك من الموضوع ده . اخلعه من دماغك . ولما تيجى ناهد هنا ما تجبش السيرة قدامها .

كرياكو : (ينظر اليه بضحكة بلهاء) انت واخذ أفندى غشيم .

فريد : اسمع يا محمود . احنا نمشى فى الحكاية بتاع سعيد دى ونحاول بينا وبين بعض وممكن من غير تعقيدات يعنى لا مقدم ولا مؤخر ويجوزوا .

محمود : (بغضب) يا أخواننا يتعبوا .

فريد : يا أخى نجرب وان تعبت تتطلق .

محمود : والأولاد ؟

فريد : ما فيش داعى للخلفة سنتين تلاتة مش مشكلة .

كرياكو : فيه حاجة اسمها هبوب منع الحمل . ولا انتى ما تعرفيهوش يا دكتور مغفل

محمود : احنا قلنا دى حاجات ما يفهمهاش الخواجات اللى زيك ما تفهمش تقاليدنا .

كرياكو : تكاليد ايه دى اللى يمنع واخذ عايز يجوز ؟

فريد : انتم خايفين أكثر من اللازم يا محمود .

محمود : ازای ده لا . احنا ما نكرهش لها الجواز. بس بندور
على راحتها. فى الأول وبعدين راحة اللي هيجوزها
وطبعا هو ما عندوش فكرة عن حالتها ؟
فريد : ما فيش داعى نديه أى فكرة وأنا من رأى أن حالتها
مش خطيرة . ولو اجوزت هتتغير تماما.
محمود : مين يضمن ؟ افرض قلبت حال الراجل الغلبان يبقى
يعمل ايه ؟

كرياكو : (خارج الموضوع تماما) ده هينبسط كثير.
فريد : (لمحمود) ممكن تساعدوهم يتغلبوا على أى مشكلة
محمود : بفلوس طبعا ما فيش مانع كل اللي تطلبه.
فريد : الفلوس مش كل حاجة . الفهم أولا يعنى لما تطرأ أى
مشكلة تبقوا تقفوا جنبهم.

محمود : وان منفعنash ، دى بتجيبها حالات تقعد أيام ما تكلمناش،
وتجيب فى الدوا وفى العلاج حتى الكهربا يا جماعة
أنا مش مرتاح للموضوع ده أبد.

كرياكو : ليه يا غشيم افندى . عايز واخد ست زى دى تقعد من
غير خب ولا فرفشة.

محمود : احنا قلنا تتلهى وتسكت شوية .ده كلام ما يفهمهوش
الخواجات.

كرياكو : خليه يجرب . ما ينفعش الجواز يبقى يطلق، فيه ايه دى
. تكاليد . تكاليد . تكاليد . تاكل تكاليد . تشرب تكاليد
تتجوز تكاليد.

محمود : الخواجة الأهل عايزنا نعمل البنت حقل تجارب.
فريد : لأ مش تجارب بالضبط . هو المطلوب شىء من
الشجاعة اللازمة لكل مشروع . والجواز كله مغامرة
ووجود الفهم مع حسن النية ممكن تتجح الجوازة دى.

وسعيد انسان طيب وعطوف جدا وده اللي مشجعنى.
دى الشغالة بتاعتنا لما كانت تتعب شوية كان ياخذها
فى الحال للدكتور. وكان يقضى ساعات بحالها ألقاه
شايلى ابنها الصغير وبيلاعبه. انسان طيب بكل معانى
الكلمة.

كرياكو : (يملا الكاسات) أفهم يا بتاع التكاليد (يضحك)
تعرف انه كان فيه زمان واحد وزير أيام الخديوى
اسمه وزير التكاليد.

محمود : (يقاطع الخواجة) طيب يا فريد بيه الجدع الطيب ده
ذنبه ايه نخط حياته ومستقبله فى الميزان.

فريد : ولا ميزان ولا حاجة واحنا عايزين مصلحة الاثنين
يمكن تتحل عقدتهم . وهى لما تجرب حظها يبقى
أحسن بدل ما تقعد تفكر طول الوقت فى الجواز.

محمود : ونبدأ فى المحاكم وهات محامين واحضر جلسات،
يبقى المرض من جانب والقضايا من جانب تانى .

فريد : ولا محاكم ولا قضايا لو حصل خلاف واستحكم لا
قدر الله تبقى الحكاية تنتهى ببساطة زى ما بدأت .
يعنى انت فاهم وأنا فاهم دفينه سوا . على ايه
القضايا احنا قلنا ما نكتبش لا مقدم ولا مؤخر . مش
معقول نخط الراجل فى مؤامرة وعلى العموم نقدم
الخير الأول قلت ايه ؟

محمود : أرجوك يا فريد بيه بلاش الموضوع د تتكلم فيه تانى.
ده خواجه أهبل ما يفهمش.

كرياكو : احنا نيجى ناخذ أهوة عندكم بعد بكرة ومعانا الأستاذ
سعيد .

محمود : (يوجه كلامه للخواجه) هات الطاولة والازالة
التانية وريح دماغنا شوية ، أوع تجيب سيرة
الموضوع ده تانى على لسانك.

المشهد الخامس:

شقة ناهد

حسين : شوفى يا ناهد أنا نفذت الخطة اللي اتفقنا عليها . قلبتهم على بعض، خلّيت كل واحد بيدور على نفسه. فضلت اعبى فى نجية لما هبلتها وقلبّت مخ جوزها. المهم أوعى تجيبى سيرة الفلوس أو سيرتى. حامد أخوكى هايح زى الطور المجنون بيدور فى كل حته. راح البنك شاف الحساب ورجع يدرج فى الأجزاء، وخذ منى المفاتيح وقال لى روح اقفل المخزن وهات مفاتيحه فجيبّت على هنا عشان أديكى فكرة.

ناهد : ويعدين ؟ هنعمل ايه؟

حسين : ها شوف محمود وأديه فكرة قبل ما يبجى.

ناهد : وانت ها تيجى معاه ؟

حسين : لا طبعا . أنا ها ختقى خالص لحد ما تنتهى العاصفة.

ناهد : ازاي ؟ وتسيبنى فى الزنقة دى وحدى؟

حسين : خلينى بعيد أحسن لغاية ما يتحاسبوا . المهم أوعى تقعى بكلمة كده ولا كده. أنا عطيتك الفلوس كلها وما خدتش حاجة لنفسى.

ناهد : (تنظر له فى صمت)

حسين : أنا ماشى قبل حامد ما يوصل عشان أشوف محمود.

ناهد : (تشيعه بنظرة احتقار) أخص عليك يا جبان . تسيبنى وتهرب فى ساعة الكرب. طيب يا حسين يا عيل كنت فاكراك راجل هتقف جنبى على طول.
(تدور حول نفسها فى حيرة)

طبيب وأنا أعمل ايه وياهم؟ افرض انهم مسكوا فى بعض لكن استاهل أنا كل اللى يجراالى عشان أنا السبب، أنا اللى خدت الفلوس ووفعتهم فى بعض. لكن حسين كان موافقنى وبيشجعنى وييجى فى الساعة دى ويهرب.أخص على صنف الرجالة كلهم أنانيين (تفكر قليلا) بت يا حسنة.

ناهد : بسرعة خلصى اللى فى ايدك.

ناهد : (ترفع سماعة التليفون) مدام سامية الحمد لله اللى لقيتك . الأستاذ فريد موجود ! بركة اخواتى جاينز الوقت بيقولوا زعالانين وخايفه يتخانفوا ويمسكوا فى بعض . ابقوا خللوا حسكما معانا. متشكرة ربنا يخليكوا لى (تضع السماعة) حسنية. حطى الأطباق على الترابيزة عشان اللى يوصل منهم نلخموا بالاكل.

حسنية : (تتحرك فى الصالة وترص الأطباق) حالا . اطمنى. (يدق جرس الباب)

ناهد : (ترتجف مزعورة وتتحرك نحو الباب ببطء ثم تفتح ويدخل حامد مسرعا)

حامد : فلوسى . فلوسى يا أولاد الإيه؟ راحت فين؟ فين هو؟

ناهد : فلوس ايه ؟ اتسرقتم؟

حامد : آه أنا اللى انسرفت . رصيد الاجزاخانة والتجارة راح. حسابى فى البنك ما حطوش فيه مليم من ست شهور. اتاريه فاتح حساب باسمه.

ناهد : طبيب وماله لما يبقى له حساب انتوا قسمتم؟

حامد : النهارده ها نقسم . أخوكى اشترى العربية قلت زى
بعضه. أهى بتتنفع لكن يشتري شقة فى اسكندرية
بعشرين ألف جنيه من غير مايقوللى.
ناهد : (تمسك فيه تحاول أن تهدئه) أقعد ارتاح وأتغدى وكله
يتسوى هيجرى ايه ؟
(وهنا يدق جرس الباب)
بس أهو جه. أوع تتكلم الا بعد الغدا. افتحي الباب يا
حسنية .
محمود : (داخل من الباب بثقة) الأخ وصل (يلتفت الى حامد)
ايه مالك ؟ جرا لك حاجة فى عقلك ؟ فلوس ايه اللي
انت داير عليها ؟
حامد : فلوسى
محمود : نتحاسب وان طلع لك فلوس عندي خدها .
حامد : نتحاسب على ايه ؟ ها حاسبك على العربية ولا على
الشقة.
محمود : نتحاسب على كل حاجة .
حامد : انت مالکش عندي حساب . دى فلوسى كلها. انت لو
توظفت فى الحكومة من يوم ما تخرجت ما كنتش
قدرت تغير البدلة. لكن خليتك بتغير العربيات.
محمود : حاسب شوية أنا مش موظف عندك . أنا شريك قدى
قدك والفلوس جبتهأ أنا بشطارتى، من تجارة الكسب
والرز والسماذ مش من الدوا اللي بتبيعه حضرتك
وانت قاعد على الكرسي.
حامد : الاجزاخانة هي الأصل ، والأجزاخانة بتاعنى أنا .
محمود : الاجزاخانة اللي هنا ولا بتاع طنطا .
حامد : (بانفعال) الاثنين.

محمود : انت لك اجزاخانة واحدة بس لكن اللى هنا دى لأصحاب الفلوس.

ناهد : فلوسى أنا.

حامد : فلوسك تحاسبية عليها ، فلوسك عنده هو اشترى بها عربية وشقة وحاططها فى البنك . اما الاجزاخانة من النهاردة ما تدخلهاش انت.

محمود : يعنى ايه الكلام ده ؟

حامد : يعنى كفاية اللى خدته ابقى تاجر بيه بعيد عنى.

(يتحرك للخروج)

محمود : (يمسك به) هات مفاتيح الاجزاخانة أحسن لك .

حامد : (يدفعه بقوة) انت بتهددنى

محمود : (يمسكه من كتفه ويشده)

حامد : يضربه بالقلم على وجهه

(محمود يرد الضربة بلكمة ويبدأ تبادل اللكمات ---

بسرعة وأخيرا ينجح حامد فى ايقاع محمود على

الارض . محمود ينهض باسرع منه شاهرا مسدسه

نحوه)

محمود : طلع المفاتيح أحسن لك .

(يقف حامد جامدا وتتنبه ناهد للموقف فتتوسل

لمحمود)

ناهد : أو ع تضرب أخوك يا محمود . أنا مش عايزة حاجة

حامد : (يمد يده يمسك بطبق ليقذف به محمود وهنا ترتعش يد

محمود فتخرج الطلقة فترتمى ناهد على حامد الذى

يقف خلفها وتصرخ ثم ترتمى على الأرض وفى هذه

الأثناء ينهار الجميع وينفتح الباب ليدخل فريد وسامية

وخلفهم الخواجة كركو)

فريد : ليه كده ؟
سامية : يا مصييتي ! وصلت لحد كده (ترتمي على ناهد
وتحاول أن توقظها . محمود يبكي على أخته . وحامد
جالس مدهول . سامية تمسك يد ناهد وترفعها)
الحقيني بقطنة يا حسنية (ناهد تفتح عينها وتنظر
حولها نحو حامد ومحمود)
فريد : اطمنى . اخواتك بخير
ناهد : (تنفجر فى البكاء)
سامية : (تفحص جسمها كله) ما فيش غير الجرح البسيط ده .
حامد : يمسك يدها ويقبلها على جبهتها (قومي يا ناهد . قومي
ياختى خدى الاجزاخانة اللى تعجبك .
كرايكو : أنا مش قلت ده لازم يجوز وينبسط .
(يضحك فريد وسامية)
حامد : خلاص يا دكتور . ورينا العريس بتاعك .
(تطفأ الأنوار وتنتقل الى حجرة ناهد)

المشهد السادس:

(ناهد فى حجرتها أمام المرأة. ترتدى ملابسها وتتزين وهى
تغنى. عريسي اهو اهو جاى اهو. وأنا حلوة كمان
مش زى زمان.
وعرفت أكيدهم، كل العزال)

سامية : (تدخل من الخلف) أبوه يا ناهد عايزانى ليه؟
ناهد : (بفرح) يا سلام ! وأنا اقدر استغنى عنك يا أحسن
جارة فى الدنيا.

سامية : (بابتسامة) مرة واحدة كده . فيه ايه؟
ناهد : خير طبعا . العريس جاى فى معاده ولا بتسرحوا بي؟
: (تقفز نحوها) والله طيب قوليلى ألبس ايه ؟ أخط أحمر
كمان ولا أبيض , الرميل ده كفاية تعرفيش بيعجب ايه؟
ايه اللى بيعجبه؟

سامية : انتى تعجبنى الملك . الحلاوة والسحر ده كله مش عايز
لا أحمر ولا أبيض . والفستان عليكى بينطق. يجنن.
ناهد : يسلم لسانك (تقفز نحوها وتقبلها) لما ييجى أقدم له
شربات ولا كوكاكولا ؟

سامية : الشربات أفضل طبعا.
ناهد : أنا بأقول كده برضة ؟ أخش عليه والصينية فى أيدي
أقول نهارك سعيد. وبعدين يحصل ايه؟

سامية : (تضحك) حلوة دى و أنا عارفة يحصل ايه بأه .
هيشرب الشربات.

ناهد : يعنى أقدم له الشرابات ولا أحطها قدامه وأقول له اتفضل

سامية : لا . قدمى له الشرابات على طول.

ناهد : ليه؟ هو مش يقوم يسلم على الأول.

سامية : طبعا (تعود لتتظر فى المرأة ثم تسرح قليلا فى التفكير ثم تعود تكلم سامية)

ناهد : أقدم له الشرابات فى كبايات ايه ؟ الفضية.

ولا المدهبة. والشرابات أحسن تكون وردى ولا لمونى؟

سامية : لا يا عبيطة . وردى أحمر فاقع دليل الحب – والعوظف المشعللة.

ناهد : صحيح (تنبسم فى بلاهة) سؤال أخير – يا أبله سامية ؟

سامية : (تفكر) أعرف إنه مبسوط إزاي؟ لما يشرب كل اللي فى الكباية. ولا استنى (تضحك) احسن يعمل ابن ناس ويسيب شوية فى القعر.

سامية : ما يهمش . اطمنى احنا متأكدين انه هينبسط خالص. عن اذنك بقه.

ناهد : ما تسبنيش يا ابله سامية انتى عارفة أنا غلبانة ما عملتش الحكاية دى قبل كده .

سامية : لامش سيباكى ها نيجى لغاية ما نشرب الشرابات ونسيبك انتى وهو تتعرفوا على بعض كويس. (تخرج سامية)

ناهد ما زالت أمام المرأة تنتظر الى نفسها .

ناهد : حلوة خالص . ملعون ابو اللي ما يصلى على النبى. قال عايزين يدفنونى هنا. ده أنا لازم أجوز واتمتع وأجرب حظى.. ايه اللي يحبسنى هنا ويمرضنى ، ده

قال وده عاد حتى نجية الفلاحة اللي عاملة زى عروسة المولد ، هنتجوز وتبقى مرات راجل وست بيت حرة تمشى وتتأمر . تيجى ايه هنيه ولا نجية جنبى . ليه حظى ما يكنش زيهم أو احسن؟ الحكاية ايه يكونش اللي بيوزع الحظوظ أعمى ما عندوش نظر (تضحك على نفسها تمشط شعرها مرة ثانية) المهم ان الخطوة الأولى بدأت (يدخل حسين وهو يتكلم بصوت عالى من الصالة)

حسين : ناهد أنا جيت الجاتوة والبون بونى . انتى فين؟

ناهد : أيوه يا حسين ؟

حسين : (ينظر فى الحجرة) اوه . ايه ده كله؟

(يمسك يدها ويدور فى الصالة) ايه الحلاوة دى. اللهم صلى على النبى . ايه يا بت الخدود الموردة. والعيون السمر والفستان الأبيض (تنظر اليه وهى تتحرك معه فى الحجرة فى سرور واضح) مقلتيش رايحة فين، حفلة زفاف ولا مستتية العريس.

ناهد : ما تعرفش؟

حسين : لا طبعا (صمت) صحيح ! أما أنا طلعت قفل أمال اشترى فى شربات وحلويات من غير ما أعرف،

ناهد : (تضحك) طلعت مغفل لأنك مش مهتم بى.

حسين : أنا يمكن الدراسة شغلانى . معلش يا ناهد حقك على

ناهد : ولا يهملك أنت تيجى الوقت تجلس فى الصالة تعمل

عريس وأنا هقدم لك الشربات ونشوف هيجصل ايه) تشده من يده . يسيران قفزا الى الخارج . حسين يجلس فى الصالة . تدخل ناهد ومعها الشربات

تضحك فى حياء ثم تضع الصينية أمامه) مساء الخير
يا استاذ – اتفضل أشرب تحب تشرب شربات وردى
ولا فزدقى (ترفع يدها بكوب)

حسين : (يتصنع الجد) مرسى يا مدموازيل . أنا با حب
الاثنين لأنى شايف فيهم ذوقك الجميل – حتى الكباية
اللى بتلسميها بصوابك أنا بحبها (يمسك أول كوب
وقبل أن يشرب يبوس حافة الكوب) نعمة كبيرة لازم
أبوسها علشان ما اتحرمش منها أبدا .

ناهد : (تسرح مع الكلمات وهى تنتظر إليه فى حنان يكاد
يطفر من عينيها. حسين يمسك يدها ثم يربت بيده
على خدها)

حسين : ناهد ! فوقى ما تسرحيش.

ناهد : (تنتظر اليه فى حيرة) احنا فى حلم يا حبيبي.

حسين : لا والله . ده حقيقة. قريب جدا ده هيحصل.

ناهد : ياريت يا حسين العريس يجبر بخاطرى . يا ريته
يسمعنى كلمة زى اللى قلتها دى.

حسين : (يفوق) عريس ؟ الحكاية بقى جد؟

ناهد : أيوه يا حسين -

حسين : ولسه بتتكلمى ؟ أما واخدانى لعبة تتسلى بيها (يحاول
الخروج فتمسك به)

ناهد : استنى ما تخرجش. انت أخويا وقريبى وأعز أصدقائى
وأغلى انسان عندى.

حسين : كفاية بقى يا شيخة . أنا كنت فاهم ده كله. أيوه قريبك
بس فقي. بس شغال عندك موظف ما انفعش (تتعلق
به أكثر يتهدج صوتها بالبكاء)

ناهد : أخص عليك يا حسين طيب ما قتلش أبدا. أنا ما كنتش فاهمة انك بتحبني للدرجة دى.

حسين : ربنا يسعدك يا ستى (يخرج) (صوت سامية من الخارج)

سامية : ناهد استعدى خلاص . العريس وصل عندنا (تتظر فى الحجرة نجد ناهد صامته على الكرسي والدموع مازالت فى عينيها) الله! جرى ايه؟ سبحان مغير الأحوال (تربت على ذقنها) قومى يا أحلى عروسة فى القرن العشرين (تشدها تقف) نشفى عنيك الحلوة دى بسرعة. أوعى تفكرى فى حاجة النهاردة غيرفى العريس. يللا بسرعة فين محمود؟

ناهد : (تجفف عينيها) ها اطلبه بالتليفون (تخرج سامية) حسنية ؟

حسنية : أيوه يا ستى .

ناهد : كلمى محمود . قوليله الأستاذ فريد مستنتيه وعايظه حالا.

حسنية : حالا.

(بعد قليل يدخل محمود ووراه العريس وفريد والخواجة ولا يكادوا يجلسوا حتى تدخل سامية تتبعها ناهد وهى تحمل صينية الشربات. من الملحوظ ان حالتها النفسية متكدرة. تتضع الشربات أمام للعريس على المنضدة.

ناهد : اتفضلوا (تقولها وتجلس) -

العريس : شكرا

محمود : (تمدها بالأكواب للعريس ثم للضيوف) اتفضل يا استاذ سعيد.

سامية : (تأخذ رشفة) تسلم إيديكى يا ناهد شربات لذیذة قوى.
ناهد : (تبتسم) هنيا يا أبلة سامية.
سعيد : (يشرب قليلا من الشربات ثم يضع الكوب ليخرج علبة السجائر. فى نفس الوقت يقدم محمود سجائره فيحدث ارتباك ينقلب على اثره كوب شربات العريس فينفجر الجميع ضاحكين حتى ناهد لكن العريس سرعان ما يشعر بالحرج)
ناهد : (تقوم برفع الصينية) ما يهمش .تعالى يا حسنية خدى الصينية (تأخذ حسنية الصينية وتخرج خلفها ناهد ثم تعود بكوب آخر) اتفضل اشرب دى بدلها.
سعيد : معلش غرمناكم كباية زيادة .
فريد : ضربتین فى الراس توجع.
محمود : لا احنا واخدين على كده .
كرياكو : فين الطاولة يا دكتور محمود . تعالى عايز أخلص تار امبارح (يخرج ووراء محمود)
سامية : عن اذنك بقى يا أستاذ سعيد والبركة فى ناهد .
سعيد : ما هو بدرى (تخرج سامية)
ناهد : (تقف ورائها)
سامية : لا خليكى مع العريس.
ناهد : (تعود الى كوب الشربات تقدمه بيدها) اشرب يا استاذ ولا الشربات مش عاجباك .
سعيد : ازاي دى شربات حلوة أوى.
ناهد : أجيب لك قهوة.
سعيد : (ينظر من خلف النضارة فى دهشة) ما فيش لزوم.

ناهد : أمال ما تشرب (وهو يتفرس فيها فتحملق فيه. تمد رقبته نحوه. يعد قليل تنفجر فى الضحك بصوت عالى. يشعر بالحرص فيضحك بصوت منخفض ثم يبحث عن شىء يقوله)

سعيد : أسنانك عاملين إيه؟

ناهد : كويسين

سعيد : ما رحتيش للدكتور تانى

ناهد : لأ . دى كانت أول مرة وآخر مرة. عطانى دوا ومس وأسنانى كلها سليمة خالص.

سعيد : ما هو باين . أسنانك زى اللولى الأبيض. ازاي ما تبقاش سليمة .

ناهد : انت مخلص أسنان كتي؟

سعيد : (ينظر اليها بشك) لا مش كثير.

ناهد : كم يعنى كده ؟

سعيد : (يضحك فى خبث) اطمنى ثلاثة أربعة .

ناهد : خلعت ضرر العقل طبعاً.

سعيد : (يضحك) والعقل كمان خلعت.

ناهد : (تقهقه) يا ساتر استر.

سعيد : ما تخافيش ما وصلش للدرجة دى (يضحك)

ناهد : يعنى العقول بتقيدنا فى ايه ؟ تقعد تفكر وتفكر طول النهار على ايه؟ ندى العقل أجازة شوية. أهو ترتاح وضحتك تتحسن.

سعيد : اطمنى ! هياخذ أجازة طويلة (يضحك)

ناهد : (تقف وتتجه ناحية الباب) عن اذنك شوية (تعود بعد قليل ووراءها الخادمة تحمل جاتوه وشاى) اتفضل يا أستاذ سعيد .

- سعيد : (ينزل النظارة على أنفه ويتأمل جسدها الفاتر) ايه لزومه بس .
- ناهد : (تحاول أن تقدمه له بيدها وهو يبخلق فيها ثم يمد يده ليمسك الطبق فيمسك بأيدها ويحدث ارتباك) اسم الله عليك يا أستاذ . اتفضل .
- سعيد : سورى ده كرم كثير .
- ناهد : أصلنا فلاحين ودى حاجة ما تلقش بالمقام .
- سعيد : يا ست العفو . احنا كلنا فلاحين .
- ناهد : انت لك أخوات يا أستاذ سعيد ؟
- سعيد : لى أختين
- ناهد : يا بختك . أنا ما ليش أخوات بنات .
- سعيد : كويس . ربنا بيحبك .
- ناهد : ليه هما البنات وحشين ؟ : يعنى الرجالة بيريحوا دول نفمة .
- سعيد : (يضحك بصوت عال) متقوليش كده أخواتك يسمعوكى .
- ناهد : اللى يسمع يسمع . أنا بقول رأى . لكن ما جبتش حد من أخواتك ليه .
- سعيد : وأجيبهم ليه .. أنا بحب أتصرف وحدى من غير رأى حد .
- ناهد : تعجبنى يا أستاذ (تضحك) لكن دول ستات بيوت ولا موظفات .
- سعيد : واحدة بتشتغل دكتورة فى الجامعة والثانية ناظرة مدرسة .
- ناهد : ودول مغليبنك فى ايه ؟

سعيد : ولا حاجة . لكن قبل كده كنت مسئول عنهم. عن اللي طلعت واللى دخلت.

ناهد : (بضيق) واياه يعنى لما واحدة تطلع ولا تدخل .

سعيد : تطلع بس لمشوار محدد لأن الست مش زى الراجل.

ناهد : انت شايف كده؟

سعيد : كده ايه؟

ناهد : ان الست ست والراجل راجل؟

سعيد : (يضحك) انت شايفة حاجة غير كده ؟

ناهد : شايفة ان الست بنى أدماية برضه . فيها عقل زى الراجل وليها عينين ورجلين وبتمشى. يعنى من حقها تطلع بره البيت تمشى رجليها بدل ما تعجز وتتكسح ولو كان ربنا علوز يحجز الستات فى البيوت ماكنش خلق لهم رجلين زيكم ولا ايه؟

سعيد : (مندهشا ثم يتصنع الضحك) أيوه بس تطلع مع راجل مش لوحدها.

ناهد: يعنى لازم تاخذ غفير معاها. تروح المدرسة بغفير وتروح الجامعة بغفير وحتى لو راحت لدكتور الأسنان تاخذ معاها غفير.

سعيد : وده فيه ايه يز عجبك.

ناهد : فيه وفيه . فيه غم ونكد . فيه سجن وسجان.

يعنى الست تبقى عبارة عن معزة لازم واحد يجريها من البيت للشارع وراه وبالعكس.

(يدخل حامد ووراءه الباقون)

حامد : مساء الخير . أهلا يا أستاذ سعيد.

سعيد : (يهم بالوقوف) أهلا يادكتور.

حامد : شرفت يا أستاذ (يلتفت لناهد) أزيك يا ناهد.

ناهد (فى شبه نرفزة) كويسة خالص.

كرياكو : سعيد بيه يا دكتور حامد راجل ممتاز مدرس أول فى الثانوية . وشاب لطيف وابن حلال وفنان .

حامد : يا مرحبا شرفت يا أستاذ سعيد.

سعيد : الله يشرف قدرك.

سامية : (تأخذ ناهد على جنب) ايه يا ناهد ، ازاي الجو؟

ناهد : (تحملق عينيها وتحركها يمينا ويسارا وكذلك شفتيها وتمد يدها فى بانتوميم) أهو مش بطل .

سامية : (تضحك ثم تلتفت لسعيد) ايه يا أستاذ سعيد . سارح فين؟

سعيد : أنا لأ .

فريد : بيفكر طبعا. هو الواحد هيجوز كم مرة فى العمر.

محمود : شوف يا أخ سعيد . فكر على مهلك واحنا نرحب بيك فى كل وقت واذا كنت . عايز تقعد مع ناهد أو تخرج معاها احنا مش بنمانع لغاية ما تفهموا بعض او تتأكدوا انكم تقدروا تعيشوا مع بعض.

فريد : برافو يا أستاذ محمود . دى أول خطوة صحيحة.

لازم العلاقة تقوم على فهم متبادل وانت يا سعيد ابن حلال والناس دول طيبين وناهد طيبة وصريحة.

سعيد : واضح طبعا. والواقع أنا سعيد بمعرفتكم وربنا يفعل ما فيه الخير وأشكركم على حسن ظنكم.

حامد : ازاي يا أستاذ انت راجل مربى كبير لازم تكون محل ثقة .

كرياكو : كفاية كلام بتاع المجاملات دى اتفقوا على يوم تنفسحوا ولا تروخوا السينما .

محمود : قلبك رايق انت ما فيش فى دماغك غير الفسح .

كرياكو : ايه دى بيقول ايه دى (يمد أذنه لكى يسمع)
محمود : (يضحك) ولا حاجة يا تحفة .
كرياكو : أنا قلت انتى ما بتفهميش حاجة .
حامد : اخواتك هيشرفونا امتى يا استاذ ؟
سعيد : لازم يعنى ؟
حامد : مش لازم . بس نتشرف بمعرفتهم برضه .
فريد : بيقولوا النسب عصب وان صح يبقى قصب .
سعيد : طيب يا جماعة تحت امركم . يوم الشبكة يعنى بعد اسبوعين .
محمود : خلاص على كيفك .
سامية : على بركة الله . مبروك يا ناهد مبروك يا سعيد .
يللا يا فريد (يقف الجميع ويخرج فريد وزوجته والخواجة)

" ستار "

الفصل الثالث

المشهد الأول:

شقة سعيد – صالة طويلة بها ترابيزة صغيرة وبها عدة كراسى خزان. ينفتح على الصالة حجرتان نوم بهما سراير سفرى وفرش عادى. ترفع الستار نجد أمامنا سعيد واقف ببنطلون بيجامة وفنلة بحملات وخالع النضارة. أمامه بنت اسمها شادية سنهها حوالى 10 سنين وأخوها كمال سنه سبع سنوات. أمهما امرأة فى حوالى الأربعين تجلس بجوار الترابيزة تتفرج بسعادة على الحركات التى يجريها الأولاد بتوجيه ومساعدة الأستاذ سعيد. هى سيدة جميلة خمريه اللون تتمتع بصحة جيدة وتعمل شعاله عند الأستاذ سعيد وزملائه.

وفى الناحية الأخرى يجلس صلاح الجنائنى مدرس التربية الرياضية وعاطف مدرس الكيمياء صلاح قصير نحيف وجهه مخربش لا يبدو أن بينه وبين الرياضة أى علاقة. عاطف أبيض سمين الى درجة ما يرتدى نظارة.

سعيد : هيا ابتي (كمال يضع رأسه على الأرض ويرفع
رجليه من الخلف وسعيد يساعده حتى ينصب رجله
(برافو شا طر (يلاحظ ان كمال يرتدى كلوت
قصير وفنلة بدون أكمام) كمان مرة . برافو وهكذا
عدة مرات ثم يتشقلب على الأرض. بعد ذلك تبدأ لعبة
أخرى حيث يمد سعيد يديه أمامه ويضع كمال رأسه
بين يديه ثم يقفز الى أعلى ليلف رجله حول رقبته.

صلاح : برافو . انت ابن جنية يا سعيد.
عاطف : هو كان نفسه يطلع بتاع ألعاب . غلط وطلع بتاع رسم.
صلاح : (يضربه على ايده) بس ما تقولش ألعاب اسمها تربية
رياضية

عاطف : طظ . ما تفرقش حاجة. ايه يعنى الألفاظ بطلوا
العقد دي بتاع الألعاب يقول تربية رياضية وبتاع
الرسم يقول ايه تربية فنية. بينى وبينك انت وهو لا
لكم فى التربية ولا فى الفن.

صلاح : (يخطف نضارة عاطف ويتركه مزعورا يتحرك
كالأعمى) اسكت انت يا بتاع الكيميا انت ما تفهمش
فى الكلام ده . ولو أن كلامك صحيح على سعيد. هو
آخر حاجة يفهم فيها الرسم.

عاطف : (يمد يده) هات النضارة بلاش الهزار البايخ .
صلاح : (يمد يده فيمسكها صلاح ويجره) قلت لك ما نتش
قدي.

سعيد : (يتدخل) ولد يا صلاح . اديله النضارة (يمسك
بالنضارة ويسلمها لعاطف) أنا قتلتك من زمان أعمل
راجل واضربه خليه يحترمك.

صلاح : (يضحك) مجنون . خليه يطاوعك عشان أقتله.

سعيد : اخرس انت وهو . مش عايز اسمع صوت فى البيت بدون اذن .

كمال : اسكت يا استاذ صلاح أنت والأستاذ عاطف . خلىنا نكمل التمرين.

سعيد : قول لهم يا كمال مين الرئيس هنا.

كمال : انت طبعاً .

صلاح : (يضحك) رجعت له الحالة يا واد يا عاطف.

سعيد : قول يا واد يا عاطف . مين الرئيس هنا.

صلاح : أوع تقول . اعمل راجل مرة. ما عدش فيه ريس ولا مريسة هنا.

عاطف : (يبتسم ثم يخلع النظارة ويتلفت حوله فى حيرة .دون أن يتكلم)

سعيد : (يضربه بيده على صدره) هتعترف ولا لأ . انت شايف الحبل اللى فى السقف ده . ها علقك فيه (يوجه كلامه لزينب) انتى يا ولية مين الرئيس هنا ؟

زينب : (تضحك حتى تأخذها الشنقة)

سعيد : (بصوت الأمر) انطقى بسرعة. أنا ما احبش المياعة.

زينب : انت يا أستاذ سعيد. هو فيه حد ريس غيرك هنا.

صلاح : (بضحك) اخص عليكى يا زينب . انتى بتخافى من شنبه اللى عامل زى المقشة.

سعيد : اسكت يا واد يا زولط (يشد عاطف من كتفه) تعالى هنا . انت ما بتتطقش ليه.

(عاطف ينكمش خوفاً)

شادية : (تنظر فى وجه عاطف بسخرية) يا عيني يا أستاذ عاطف . انت بتحكم العيال ازاي فى الفصل؟

عاطف : (بصوت قاطع) ومين قالك أنا بحكمهم . ده هم اللي بيحكموني.

زينب : (تضحك) ازاي يا أستاذ عاطف.

عاطف : ها حكمهم ازاي ؟ أنا عندي في تالته تالت كل طور وطور ينطح أخوه.

سعيد : (يضحك ويتركه . كمال وشادية يصفقان ويهرجان)

شادية : (تشد سعيد من يده) جه دورى بقه .

سعيد : أيوه استنى لما يستتب النظام ونعرف أولا مين الرئيس هنا؟

صلاح : علشان خاطر شادية هنوافق انك ريس، يللا مارس هوايتك وحاول تبطل الجنون بتاع المريسة أحسن لك.

سعيد : (يعود الى تمرين شادية تمرينات حركة) رفع . مد ثنى الجذع. شقلبة.

صلاح : (يضرب كف على كف) ربنا يشفيك . انت تنفع قرداتي. كنت تكسب كل يوم ثلاثين أربعين جنيه بالراحة.

شادية : حسن ملافظك يا أستاذ صلاح . هو أنا قرده ؟

صلاح : (يضحك) مين قال كده .

شادية : مش هو بيلاعبنى ؟ وأنا كمان هابقى زوجته الثامنة عشر.

(يرن الجرس تفتح زينب الباب يدخل كريكو ومحمود ويريان المنظر دون أن يراهم سعيد لأن ظهره كان ناحيتهم وهم يضحكان.)

صلاح : (يوجه كلامه لهما بلهجة هزار) دى حالة خفيفة

بتجيلة كده مرة كل يوم وتروح.

- محمود : نهارك سعيد يا أستاذ سعيد .
سعيد : (يلتفت فجأة) آه لا مؤاخذه . اتفضلوا (يصافحهم)
عن اذنكم البس جاكته البيجاما (يجلس الجميع)
شادية : أهلا يا أستاذ محمود. أنت اخو الست ناهد.
كرياكو : أمورة البنت دى .
زينب : اتفضل يا خواجه.
كرياكو : تتجوزينى ؟
صلاح : لا دى محجوزة .
شادية : أيوه . أنا هجوز الأستاذ سعيد.
محمود : مرة واحدة كده ؟ انتى لسة صغيرة.
شادية : بكرة أكبر وأنا منتظرة دورى طبعاً .
محمود : (يضحك بانبساط) هو بيجوزهم بالدور .
شادية : أنا الزوجة الثامنة عشر.
صلاح : بعد المائة .
شادية : (تضحك فى عبت) لا يا أستاذ صلاح الثامنة عشر فقط.
كرياكو : ايه دى ؟ هو سعيد هيجوز تمناطاشر.
محمود : على طريقة شهر يار (يلتفت للخواجه) شورتك كحل (لشادية) وكنتى بتعملى ايه ؟
شادية : كنت باتمرن عشان الرئيس يؤمن ان العقل السليم فى الجسم السليم.
صلاح : أصلة غاوى كده يربى العرايس ويسيبها لغيره.
شادية : ما تقولش كده (يدخل سعيد) سامع يا ريس -

سعيد : ما تصدقش (تجلس شادية بجواره وهو يقدم
السجائر)

محمود : انتى بطلتى التمارين ليه؟

سعيد : خلاص بقه نقعد معاكم شوية.

شادية : الأستاذ صلاح بيقول انك هتسيبنى.

سعيد : وانتى تصدقى برضه صلاح.

صلاح : طب اسألى الأستاذ محمود أخو العروسة كمان.

محمود : بس احنا ما نقدرش نتعدى على حقك .

شادية : ماهو أنا الثامنة عشر (يضحك الجميع) (تأتى زينب
بالشاي)

سعيد : عارفين بعض طبعاً يا صلاح ؟

صلاح : أنا بأعرف الخواجة والأستاذ محمود صاحب
الأجراخانة -

سعيد : الأستاذ صلاح الجنائنى مدرس التربية الرياضية .

صلاح : ما تنساش اسكندرانى.

محمود : اجدع ناس الاسكندرانىة . أنا اتعلمت فى اسكندرية.
وفى كل اسبوع باقضى يوم أو يومين هناك.

صلاح : أنا مش اسكندرانى أصلاً . احنا صعايدة عيلتنا
استوطنت الاسكندرية من أيام محمد على.

كرياكو : دى كديم أوى -

صلاح : آه . أنا جدى هو اللى ادخل فلاحه البساتين فى مصر.

عاطف (بصون منخفض) واسعة شوية.

صلاح : (بغيط) ايه مش عاجبك يا عجر انت وهو (يهز
عاطف من كتفه) بتضحك على ايه؟

عاطف : أبدا .

سعيد : ما تقول يا عاطف بتضحك ليه خايف منه ؟

عاطف : لا طبعا . هو احنا شفنا مين أدخل فلاحه البساتين (لصلاح) بحبح يا شيخ بحبح ولا يهملك .

صلاح : (يزداد غيظا) يعنى أنا كذاب (يوجه كلامه لمحمود) انت سيادتك ، أول ما تنزل من محطة سيدى جابر اسال بس وهم يوصلوك لبیتنا . هناك حتلقى أخويا مش شقيقى زنده اد الصدغ ده (يشير الى كتف الباب) أخويا ده انقذ عشرين واحد من الغرق لولاه كانوا راحوا فطيس (الجميع تقريبا يضحك)

سعيد : لولا جدك وأخوك ده كان اتغير تاريخ العالم .

صلاح : كده يا أبو شنب لف عايز تكسر معايا كمان ؟ انت شفته ولا لأ ؟ تقدر تكح قدامه؟

سعيد : (يضحك) لأ طبعا

عاطف : بس أبوك يعنى هو اللى أدخل فلاحه البساتين فى مصر (يصمت قليلا) فهمت أه صح يعنى كان جناينى فى البلدية .

صلاح : اسكت يا عجر فاكركه زى أبوك الكحيان (يضحك ويوجه كلامه لمحمود) سيبك منه أول ما تنزل اسكندرية اسأل أى شيال أى عربجى قول له تعرف صلاح الجناينى وعيلته هيقولك طبعا أعرفه . فيه حد ما يعرفش الجناينية؟

عاطف : طبعا كل الشيالين والعربجية عارفينكم (يضحك عاطف ويجرى خلفه صلاح ومحمود والخواجة وسعيد يضحكون)

محمود : اعتقد كفاية كده . نستأذن يا أستاذ سعيد .

سعيد : ثوان ألبس البدلة وأطلع معاكم (يدخل حجرة نومه)

صلاح : (يعود الى مكانه) ما تنخضش خللى قلبك جامد .
محمود : (فى حرج) بس ده (يتوقف دون أن يكمل جملته)
صلاح : (يقاطعه) بيتسلى . أصله بيحب الأولاد دول ومريهم
من ست سنين.
كرياكو : مش قلت لك يا محمود بيه دى طيب وابن خلال .
محمود : (يهز رأسه بغیظ) ابن خلال زيك . ما أنا عارف مخك
مehروش انت راخر.
سعيد : (يخرج من حجرة النوم) اتفضلوا.
(ينجهون نحو باب الخروج وتنزل الستة)

المشهد الثانى:

(ناهد وحسين فى شقتها)

- ناهد : عاش من شافك .
حسين : (ينظر لها فى حزن) نعم طلباتك.
ناهد : أخص عليك يا حسين . زعلان منى ليه؟ لازم أبعث لك
وأترجاك عشان تيجى.
حسين : مش فاضى بأذاكر.
ناهد : لا مش ده السبب . انت زعلان ومش عايز تقول ليه؟
حسين : لا مش زعلان من حاجة. انتى طلبانى عشان تفتح لى
تحقيق؟
ناهد : كده كده ! بقيت تتكلم بالنحوى (تمسك بيده وتربت
على كتفه) ناهد الغلبانة اللى كنت بتعطف عليها
وتسليها بحكائك وأغانيك تقسى عليها كده يا حسين؟
حسين : (يبتسم فى سخرية) كان زمان.
ناهد : والوقت جرى ايه يامضروب؟
حسين : مش عارفه البركة فى العريس. أنا اللى بقيت عايز
العطف.
ناهد : (تضحك وتكاد تحتضنه) أخص عليك يا حسين أول
فرحة فى حياتى تزعلك .
حسين : (فى صوت باكى) طبعا لا . أنا بأتمنى لكى السعادة.
ناهد : (تنظر اليه فى تلذذ) أعمل ايه يا حسين . ما صدقت
اخواتى وافقوا على الجواز وبعدين احنا لسه ما
عملناش حاجة.
حسين : ليه مش بكرة الشبكة.
ناهد : وايه يعنى؟ أنا لسه بافكرواللى يعملهم ربنا.

حسين : ليه لعب عيال ؟
 ناهد : يمكن ما اعجبوش حد ضمن .
 حسين : وبعدين ؟
 ناهد : مش انت عايز كده؟
 حسين : أنا مش عايز حاجة .
 ناهد : ازاي ؟ ده انت بكره هتيجي معانا بالعربية نشترى الشبكة ولوازم الحفلة.
 حسين : طبعا . أنا لى شغلة غير دى؟ شيال سواق خدام – حاضر يا ستى علم .
 ناهد : (تنظر فى وجهه بتمعن ثم تشده نحوها) انت تبقى وحش خالص لما تتكلم جد . يا أخى فرفش. فرحنى شوية. غنى لى غنوة. قول يا بنت عمتى أنا فرحان لك. ربنا يسعدك. قول أنا هارقص معاكى بكره فى الحفلة. قول لى ها غنيلك غنوة جديدة – ولا راح الحزين يفرح ما التقاش مطرح (تتحول الى البكاء ثم تجلس)
 حسين : (تياثر جدا فيقترب منها ويبدأ يربت على كتفها) معلش يا ناهد . ما تزعليش. أنا كان عشمى فيكى كبير. أنا فاكرك بتحبينى.
 ناهد : طبعا بأحبك قد الدنيا دى كلها . انت الوحيد للى باحبه فى الدنيا وبألقى نفسى جنبه.
 حسين : (بحنية) صحيح يا ناهد طيب ليه عملتى كده.
 ناهد : (مخنوقة بالدموع) أنا ما عملتش حاجة. أنا باتعلق فى قشاية زى الغرقان أعمل ايه فكر معايا.
 حسين : اهدى وبعدين نفكر

ناهد : (بعد قليل) ايه رأيك بلاش أروح أجيب الشبكة
 حسين : (بعد تفكير) لا ازاي هتقولى ايه ؟
 ناهد : أقول مش عايزاه . أقول بأحب حسين.
 حسين : مرة واحدة كده ؟
 ناهد : أمال ايه غريبة! انت مش بتحبنى؟
 حسين : باحبك طبعاً.
 ناهد : أمال خايف ليه؟
 حسين : مش خايف من حاجة . بس هيقولوا ايه ؟ بتحبيه؟
 بيحبك؟ من امتى؟ ما قلتيش ليه قبل كده؟
 ناهد : هو انك تقول باحبك ولا أنا أقول باحبك جريمة.
 حسين : (فى تذكر) أيوه صحيح . لا ولا يهملك . قولى اللى
 يعجبك وليكن ما يكون.
 ناهد : مش كثير أقول لمحمود الكلام ده أنا ؟
 حسين : يعنى الحب حرام . التجارة فى قوت الخلق والبيع
 والشراء فى السوق الـسوده حلال؟
 ناهد : أحوال مقلوية . بيدنا ايه نعمله . الحرام بقى ماشى عيني
 عينك والحلال بقى يدارى، وأنا أخذت نصيبي من
 الهم والغم عشان أتسرعت وصارحتهم مرة (تتروى
 قيلاً) اسمع يا حسين. احنا نروح بكره وأنا هاتصرف
 وافضها.
 حسين : ازاي؟
 ناهد : العريس أصله كبير فى السن وباين عليه غيار وعقله
 كهنة خالص . عايز واحدة ست يقفل عليها الببان
 والشبابيك.
 حسين : خلاص طفشيه .

ناهد : بس ضاعت ولقناها بكره ما تسبنيش لحظة واحدة
نشوفه هيقول ايه ؟
حسين : (بفرح) يا بنت الإيه ؟ (يربت على خدها بيده)
باي . باي
(يخرج ونطفئ الأضواء)

المشهد الثالث:

كازينو على النيل بالمنصورة

(ناهد وحسين وسعيد ومحمود جالسين على تراسية وحولهم آخريين)

محمود : نقوم أنا وحسين نحيب شوية طلبات ونيجي (يخرجون)
سعيد : (يلتفت لناهد) انتى بتبصى فين ؟
ناهد : باتفرج على النيل والخضرة .
سعيد : مشتاقة أوى للحاجات دى؟
ناهد : قوى. بعيد عنك محبوسة طول اليوم تفتكرها أشتاق لإيه ؟

سعيد : لكن انتى كنتى بتقولى انك بتيجى كثير هنا انتى وحسين؟

ناهد : آه الحقيقة حسين ده صاحب فضل على كان دايمًا جنبى بيواسينى وببسلينى.

سعيد : وهيفضل على طول كده جنبك؟

ناهد : طبعًا. أنا لى مين غيره!

سعيد : (فى عصبية) ازاي ده؟

ناهد : ابن عمى ومتربيين سوا فى بيت واحد.

سعيد : (يهز رأسه) لا. ده حال ما يعجبش. حسين ده ما يدخلكيش بيت

ناهد : (تضحك بقهقه) حلوة دى انت بتغيرولا ايه ؟

سعيد : صوتك الناس حوالينا.

ناهد : أنا ما يهمنىش الناس.

سعيد : لأ أنا يهمنى. وكلامى لازم يتنفذ حرفيا.

- ناهد : (تقف وتضرب تعظيم سلام) حاضر يا أفندم . من امتى انشاء الله ؟
- سعيد : من الآن .
- ناهد : (تضحك فى دلال) لأ بقة ما تبقاش ظالم . لما نجوز هاكون تحت أمرك (تقف وتمثل) أول ما تيجى طالع أقف أودعك على الباب وأقولك مع السلامة بعدين تقفل الشبابيك والبيان وتأخذ المفاتيح. ايه رأيك فى الكلام ده - ؟
- سعيد : انتى واخدة الأمور سبهلة على طول.
- ناهد : ليه مجنونة؟
- سعيد : مين قال كده؟
- ناهد : كلامك.
- سعيد : (متأثر بضيق) أقعدى وأتكلّمى عيب الناس حوالينا.
- ناهد : أنا تعبت من كلمة عيب والناس. عايزة أحس بالحرية يوم واحد فى حياتى.
- سعيد : وانت فاكرة الجواز بيدى حرية؟
- ناهد : طبعا آمال الستات بيجوزوا ليه.
- سعيد : الجواز مسئولية يا ناهد.
- ناهد : للراجل ولا للست؟
- سعيد : للاتنين طبعا.
- ناهد : أنا عارفة مسئوليتى أكنس وأغسل وأطبخ وأكويك الهدوم وأخلعلك الجزمة عند النوم- فاهمة أنا الحكاية دى .
- سعيد : طيب ما احنا متفقين .
- ناهد : على ايه؟ على انى خدمة، مش كده؟
- سعيد : لا- ست بيت (ييتسم)

ناهد : (تجلس) زى بعضه . على كيفك .
سعيد : قومى محمود بيشاور (يخرجون)
(ستار)

المشهد الرابع:

(ناهد وحسين فى شقة ناهد)

حسين : لكن ما وصلناش لحل.
ناهد : الصبر طيب ، شوف الحلق ده والدبلة دى،
شوف البروش عامل ايه على الفستان.
حسين : (تتحرك أمامه وهو يتأملها) رائع رائع بس يا
خسارة. أنا كنت عايز أخذ لك صورة انتى وعريس
الغفلة بتاعك وأكبرها وأخليكى تشوفها عشان تضحكى
على خيبة أملك لما تشبعى.
ناهد : اخرس يا ولد . فشر ده راجل عاقل وفنان مش مغنواى
طايش زى حضرتك.
حسين : هو قنان بصحيح ، وده باين خالص فى شنبه المدلدل
على حنكه زى الفرقة.
(يضحكان)
ناهد : (تحاول أن تثير غيرته بحركات يدها) ايه رايك منظره
عاجبنى خالص. انت وشك مربع وتقاطيعه صغيرة.
لكن عامل زى المية ما لهاش لون ولا طعم لكن الأستاذ
سعيد شكله كوميدى، فيه ارتفاعات وانخفاضات ، فيه
تنويع يريح النفس ويحركها.
حسين : (فى صوت حالم ساخر) سبحان الله وايه تانى؟
ناهد : (تقفز فى سرور) وفيه نواحى حزانى بتشدنى قوى
تصور عنيه السوده الصغيرة اللى داخلين جوه فى

أعماق رأسه ، والنضارة السوداء السمكية بتفكرنى
بالكوبيس اللى انا عايشة فيها من سنين لكن لما أبص
لشنبه بانسى كل شىء وأموت على نفسى من الضحك .
حسين : الله يهنيكى ويرضى عليكى أنا بقه ما بقاليش لزوم .
عن اذنك.

(يهم بالخروج فتمسكه من يده)

ناهد : استنى . يعنى ايه مالکش لزوم ده احنا لسه فى
أول خطوة.

حسين : يا نهارك مش فايت . انتى مجنونة. بقه بتحسبى ده
كله أول خطوة؟ انتى فاكرة الناس لعبة فى أيديك؟

ناهد : احنا لازم نلعبهم . أنا وأنت لازم نلعب ونخليهم يلعبوا
معانا.

حسين : بس مش على حساب الراجل المسكين اللى فتحلك قلبه.

ناهد : فتح لى قلبه ! هو كان قالك؟

حسين : لا يعنى وافق يجوزك.

ناهد : ليه يا ولد أنا كنت مرمية . أنا جانى ميت واحد أحسن منه
لكن طفشوهم اخواتى.

حسين : ما اقصدش يا أختى .

ناهد : آمال ايه ؟

حسين : أقصد أنه جه وطلبك واشترى شبكة ، وراح يجيب أهله.
ده كله يدل على اخلاصه.

ناهد : يا مرحب وانت عايز ايه ؟

حسين : يا نهارك أسود؟

ناهد : على دماغك انت بتلف على ليه؟

حسين : (فى دهشة) بنت يا ناهد انتى بتسخرى بى؟

ناهد : أصلك بتلف وتدور عايزاك تكون صريح وتكلم
دوغرى.

حسين : انا ما تكلمت دوغرى فيه ايه تانى ما قلتوش؟
ناهد : قول باحبك قول أنا لازم أجوزك ولو بالقوة . قول أنا
على استعداد انى أقتل ميت راجل عشان أجوزك ده
الحب الصحيح مش حب كده على الطاير مالوش أثر
ولا طعم.

حسين : ده كان زمان ... كل الأغاني والأشعار اللي بألفها
وأقولها لك ما تكفيش؟ زمان كانوا بيتصرفوا زى
الوحوش يقتل الواحد غريمه عشان يفوز هو بالمجوبة .
لكن اللي كان بيحصل ان واحد يموت والتانى يقضى
عمره فى السجن أو يعدم وتفضل هى فى حزن وغم
طول العمر. ما فيش حد يهوب جنبها وياريت الناس
يسكتوا عنها دول كانوا يقولوا دى وشها نحس قتلت واحد
والتانى وددته السجن.

ناهد : يا شيخ انت خايف على نفسك ولا خايف على .
حسين : خايف عليكى وعلى نفسى. عملت اللي ما كانش يقدر
عشاق زمان يعملوه صورت حبي فى أغاني وقصائد
هيفضل الناس يرددوها طول العمر، وده اللي بيميز
الحب بتاعنا ويخللى سيرتنا حلوة.

ناهد : زى عنتر وعيلة وروميو وجوليت .
حسين : لا دى حاجات عتيقة عفى عليها الزمن حتى حب ليلي
والمجنون ما ينفعش احنا لازم نكون أحسن .

ناهد : ولا مجنون ليلي
حسين : حبنا ما فهايش جنون حب عاقل حب عصرى .
ناهد : يعنى ما فيهش عواطف ولا أشواق ولا آهات.

حسين : مين قال كده ؟ ده مليون عواطف واشواق أمال الشعر
هيجى منين؟ بس ما فيهمش جنون ولا قتل.
ناهد : طيب قول لى حاجة . ورينى عواطفك فين.
حسين : فى اليومين اللى فاتوا أنا عشت فى منتهى الحزن
والنكد . كنت بأفكر فيك. تصورت انك غدرت بى
وكتبت غنوة حزينة صورت فيها مشاعرى.
ناهد : (تقفز نحوه وتعانقه) يا حبيبى يا حسين (بعطف) سمعنى
قول .
حسين : يبدأ الأغنية وهى تسمع فى عشق وهيام وتأثر
(بعد قليل يدخل محمود)
ناهد : (تقف للقاءه فى فرح) أيوه يا حوده ازاي الحال؟
محمود : (يهز رأسه فى ضيق)
ناهد : مالك ما تتكلم.
محمود : ها أقول ايه بس الخواجة الأهل يميل عقلى .
ناهد : ليه بس يا محمود ؟
محمود : العريس طلع شربة - عقله مهروش على الآخر .
حسين : باين على شكله . أنا كلمتى ما تقعش الأرض.
ناهد : أحكى لى شفت ايه ؟
محمود : (يضحك) لقيته طالع بالفنلة وبيلعب أولاد زينب الشغالة
زى الحاوى بالضبط .
ناهد : يمكن بيحب العيال .
حسين : آه ده صحيح .
محمود : بس مش عايزينك تجيبى عيال عشان صحتك .
حسين : آه ده مهم
ناهد : (تبص لحسين فى فهم) بلاش يا أخويا ما تشغلش نفسك
نفرکش العملية دى كلها .

حسين : بسيطة سيب ناهد تستهبل عليهم لما تطفشهم .
محمود : وده كلام؟.
ناهد : اطمئن يجوا نشوفهم ونفكر على مهلينا يمكن احنا ما
نعجبهمش .
حسين : من هنا لبكره تفرج . عن اذنكم أنا مروح.
ناهد : مع السلامة فكر معايا يا حسين .
(يخرج حسين وتتطفىء الأضواء ثم يضاء مرة أخرى)

المشهد الخامس:

(المنظر السابق)

(سعيد واخواته سعاد ومديحة وسامية وفريد)

سعاد : (سنها فوق الخمسين تبدو . غير جميلة)

محمود : أهلا .

ناهد : (تدخل – يقفون لمصافحتها)

سامية : دكتورة سعاد أخت سعيد . أبله مديحة أخته برضه

سعاد : (تنظر لها بعدم ارتياح) أهلا يا عروسة . أختي مديحة

بكالوريوس علوم وناظرة مدرسة وعندها بنتين حلوين
زيك .

ناهد : (تبتسم) متشكرة . أنتم شرفتونا وأخويا محمود

بكالوريوس تجارة وصاحب إجازة وأخويا حامد

صيدلى وعنده إجازة ثانية فى طنطا .

مديحة : حاجة عظيمة ، مالكيش أخوات بنات .

ناهد : لا طبعا .

محمود : كفاية كده .

سعاد : انت ما تحبش البنات زى سعيد .

محمود : (يضحك) لا بأحب ناهد طبعا .

سعيد : أنت زوجت من السؤال .

سعاد : حظنا كده رحنا الجامعة واحتلينا أكبر المناصب وبرضه

مش عايزين تغيروا نظرتكم لنا .

محمود : لا طبعا . ازاي ده انتوا الخير والبركة .

سامية : مش كلهم طبعا .

مديحة : لازم الأستاذ فريد له رأى آخر.
فريد : أمال ! البنت زى الولد عندى ما أفرقش بينهم. هى بتتعلم
وتطلع زيه.. بتخدم البلد ومن حقها تتمتع بحقوق مساوية.
سعاد : عشان كده مجوز موظفة .
سامية : ده صحيح . لكن برضه كل واحد له ظروفه. الجواز
بغير موظفة ما يعنیش العكس.
سعاد : بس أنا أقصد ان اللى يجوز بموظفة بياكد فعلا ايمانه
بدور المرأة وحقها فى أن تخرج للحياة وتتصرف بحرية.
سعيد : (يبتسم) ما تسيبونا من الموضوع ده .
ناهد : هو انتى بتشتغلى دكتورة فين؟
سامية : فى الجامعة فى كلية الآداب .
سعاد : أنا معايا دكتوراه باطلع مدرسين ومدرسات الثانوى .
ناهد : والله ده أنا فاكراك دكتورة فى الطب .
مديحة : أختى سعاد رفضت تخش الطب ودخلت الآداب قسم آثار
ليسانس وماجستير فى الآثار واللغات القديمة والدكتوراه
من أكبر جامعات أمريكا .
فريد : حاجة هائلة والآثار متعة.
محمود : (يضحك وهو ينظر لفريد) باين باين لازم غلوية
انتيكات .
سعاد : آه عندى تحف كتيرة . رأس نفرتيتى وحتشبسوت.
ناهد : (بنبرة ساخرة) الا حتشبسوت دى شكلها يخوف .
سعاد : انتى شفتيها فين؟
ناهد : (يتراجع) لا ما شفتهاش . لما كانوا يضحكوا على
واحدة فى المدرسة يقولوا دى زى حتشبسوت.

سعاد : (تمط شفائيفها فى غيظ) هو ايه الجمال ؟ الحمار والبياض . الجمال هو جمال الروح والأخلاق والعلم.
أنا اشتغلت مفتشة فى التربية والتعليم وكنت باحرم على المدرسات أنهم يحطوا الأحمر والأبيض على وشهم خصوصا وأنا ناظرة.

(يتكهرب الجو يحاول فريد ان يلطفه)
فريد : بعض الناظرات بتهتم بمظهر المدرسات برضه عشان البنات بتقلدهم .
مديحة : (تأخذ موقف وسط) بعض المدرسات بتزودها أوى .
كأنها رايحة حفلة والبنات طبعاً بيلقطه المناظر دى ويكرروها

سامية : المدرسات اللى بيعملوا كده عددهم قليل وبعدين دى مسألة ذوق.

سعاد : الواحدة تبقى جاهلة وفرحانة بشبابها وتيجى لابسالى فستان مبين جسمها وحاطة أبيض وأحمر بالكوم زى البلياتشو احنا كنا ملايكة وما عجبناش حد.

محمود : بعض الرجاله بتعجبهم الألوان.
مديحة : كلهم .

فريد : مش كلهم طبعاً .

سعاد : أيوه انت مالك مراتك حلوة وأمورة ومش عايزة كلام .

فريد : لو تسمحى يا دكتورة أسألك عن حاجة أحب أعرفها .

سعاد : اتفضل ؟

فريد : ايه هى أغرب عادات للزواج اللى قرىتى عنها أثناء دراستك للآثار والتاريخ؟

سعاد : هو مش غريب أوى لأنه مستمر فى بعض عادات الصعايدة ان الست ما توريش وشها للراجل الا ليلة

الزفاف (يضحك الجميع)

كرياكو : جواز ايه دى ؟

فريد : جواز فى الضلعة.

ناهد : دى كانت فرصة للسيدات المعقربين.

كرياكو : أنا قرئت فى كتاب عن الرقص البدائى فى جزر

البلونينيز ، لما كان واحد يخب واخدة كانوا يقلعوا

ملايسهم الراجل والست يروخوا الجبل يشيلوا

الهدوم خالص خالص مالمص. يقفوا عرايا زى آدم

وخوا

فريد : أيوه يا خواجه ، كمل اتحفنا باللطائف بتاعتك الحلوة.

كرياكو : بعد ما يخلعوا كل الهدوم .

محمود : حلصنا بقه .

كرياكو : يلعبوا رياضة . بيدأ العريس والعروسة يرقصوا. هم

طبعاً مش عريانين خالص فيه ورقة توت..

مديحة : (تضحك) الخواجه بيقدم كل حاجة على المكشوف (

الجميع يضحكون)

فريد : أيوه يا خواجه كمل كمل .

كرياكو : الناس واقفين يغنوا ويحيوهم .

محمود : وبعد الرقصة؟

كرياكو : انتى ما تقاطعنيش. انتى موش بتفهم.

حامد : اسكت يا محمود خلليه يضحكنا

كرياكو : فى آخر الرقصة يروخ العريس ماسك العروسة فى أيده

ويتقدم لرد التحية.

محمود : الله يخيبك. هى دى حكاية.

كرياكو : لا مش بس استنى . بعدين بيدأ طقس جديد اسمه.

صراع الأجناس يمشوا عكس بعض. تمشى

الزوجة فى اتجاه معاكس للزوج دى يشرق دى
 يغرب بسرعة خالص. بعدين يلقوا يخلقوا.
 يفضلوا يخلقوا لبعض مدة طويلة لغاية ما يضحكوا
 محمود : الله ينكبك يا كريكو يا أهبل يا عبيط.
 كريكو : (مندمج فى سعادة) المرحلة الأخيرة تبدأ بأسئلة
 للراجل والست
 فريد : امتحان ؟
 كريكو : لا موش امتحان دى حاجة زى اللى فى التليفزيون
 ناهد : ازاي؟
 كريكو : يعنى يجى العريس يسأل العروس هى بتحبه ولا لا
 ان قالت لا ما تخبوش ما تقدرش تعيش معاه ما
 يجوزهاش.
 ناهد : طريقة حلوة
 سعاد : (فى غيظ) عجباكى يا عروسة الطريقة.
 ناهد : آه والله حاجة مسلية خالص .
 مديحة : قوم يا سعيد انت والعروسة فرجونا .
 سعيد : ده كان زمان .
 فريد : وايه اللى يمنع الوقت .
 سامية : وايه رأيكم تقوموا ما ضيعوش وقت وتورونا تتمشوا
 بالعكس وتخلقوا شوية لبعض.
 الجميع : (بصوت واحد) هيه هيه يللا يللا
 سامية : (تشد ناهد من يدها) يللا يا ناهد (ناهد تقف وهى
 تضحك)
 فريد : (يشد سعيد لكنه يرفض باصرار) قوم يا سعيد يللا
 اثبت وجودك.
 مديحة : ايه يا سعيد هو مين اللى ينكسف؟ قوم يا أخويا قوم.

(تبتسم وتحاول معه لكنه يزداد كسوف)
سامية : بقة كده تكسفنا يا عريس بلاش تبخلقوا ممكن
تكتفوا بالأسئلة.

كرياكو : (يقف) والله يا سعيد بيه ، دى لعبة خلوة أmaal هتعرفوا
بعض ازاي.

سعيد : (لسامية) ايه رأيك تقومى أنت بالأسئلة واحنا نجواب.
حسين : لا يا استاذ دى لازم يقوم بيها راجل وأنا هقوم بالدور ده
(يمسك بكوب ماء ليستعمله كمكرفون) لو تسمحى يا
آنسة تردى على أسئلتى بس بسرعة ودون تفكير كثير .
يعنى عايزك تتكلمى بسرعة من غير لف ولا دوران.
موافقة؟

ناهد : (بدلال) بس أسئلة تكون واضحة وغير محرجة .

حسين : اتفقنا . نبدأ انتى بتحبي العريس؟

ناهد : (بسرعة) ما حصلش لسه .

حسين : ايه اللي بيعجبك فى العريس؟ بسرعة من فضلك.

ناهد : (تلتفت نحو العريس ثم الى الآخرين) عنيه الحزينة جدا

حسين : (يشجع) برافو الجميع (ضحك وتهريج .

(للباقين) سكوت من فضلكم (لناهد) السؤال ده

عايزك تجاوبى عليه فى ثانية بلا تردد لأنه سؤال مهم
شوية.

ناهد : (تتماسك) اسأل وخلصنى .

حسين : قولى لى ايه الشىء اللي مش عاجبك فى العريس؟

ناهد : حاجة بتتفرزنى خالص وتطير عقلى.

(الجميع يستعجلوها)

حسين : قولى بسرعة.

ناهد : شنباته يا عمرى .(الجميع يصفق ما عدا العريس

واخواته)
سعاد : لا دى اهانة لا أقبلها عن اذنكم (تشد اختها وتتجه نحو
باب الخروج ثم تكلم أخيها) احنا ماشيين وان كان
عاجبك الكلام خليك انت.
(محمود وفريد وسامية يحاولون تلطيف الجو) دى
مجرد ضحكة يا دكتورة استنى شوية. ما يصحش حاجة
زى دى تزعلك)
سعاد : (اسفة لا يمكن انتظر ثانية) (لأختها) يللا بينا
(يخرجون ومعهم العريس)
(اظلام)

المشهد السادس:

(شقة سعيد اخواته سعيد مع الشغالة زينب)

- سعاد : (متكدرة حظ) آمال حظنا مال ليه .
مديحة : ودى عاجبك فيها ايه ؟
سعاد : الحمار والبياض واحدة ممعهاش شهادة الابتدائية.
فريد ضحك عليك.
زينب : ما تظلموش حد. رغبة الأستاذ سعيد هو اللي
عايز كده عايزة واحدة مش متعلمة.
سعاد : عايز كده ليه . أبقي أستاذة فى الجامعة وأخته الثانية
ناظرة مدرسة وباخد واحدة جاهلة؟
زينب : أخوكى شرطه كده . واحدة صغيرة ما تعرفش تقرأ ولا
موظفة.
سعاد : ليه ؟ عملت له ايه.
زينب : هو مخه كده. ده مرة بعتنى أخطب واحدة كانت أوحش
من كده قال لى روى كلميهم عنى (تضحك)
مديحة : بتضحكى ليه ؟ افكرتى ايه؟
سعاد : افكرت ميعة عقله.
زينب : تعرف قال لى ايه قوليلهم يكتبوا لها العشر فداين اللي
حيلتهم.
سعاد : ورحتى؟
زينب : (تضحك) قعدت أفكر فى الكلام لكن عقلى دلنى على
كذبة وخلصت نفسى.
مديحة : وايه اللي يخليكى تكذبى .
زينب : الناس ما حيلتهمش غير العشر فداين أروح ازاي

أقول لهم اكتبوها للبنت دى وليها أختين وتلات أخوة.
سعاد : برضه دى لازم يتخلص منها طظ فى الشبكة اللى خدوها
أنا أدفع ثمنها,
زينب : ليه بس ؟ دى عروسة حلوة وأهلها مبسوطين.
مديحة : حلوة بس حيلتها ايه .
سعاد : حلاوة ايه دى . يودرة ده جير – ده مديحة مرة جابت
علبة بنكيك وأول أبوها ما شافها دهسها برجله.
سعيد : (يدخل ويраهم منفعلين) ايه مالكم .
مديحة : العروسة دى عاجباك يا سعيد .
سعيد : مالها .
سعاد : مش من مقامك . جاهلة وما حيلتهاش حاجة.
سعيد : مش عايز أنا لا تعليم ولا حاجة .
سعاد : لك حق تكره المتعلمات علشان احنا معولينك الهموم .
سعيد : بلاش لك انتى وهيه . دى مش أول واحدة تطيروها
وأنا عارف ان ده هيحصل.
مديحة : انت حر واللى يشيل قربة تشر على قفاه .
سعاد : بس دى هنلعب بيبك . دى جريئة وسنها صغير.
مديحة : أيوه صغيرة قوى يا سعيد بتاع عشرين سنة على الأكثر
يعنى بينكم عشرين سنة.
سعاد : يعنى لو اتجوزت من عشرين سنة كان بقى عندك بنت
فى سنها.
مديحة : أيوه فكر بعقل . يا حبيبى دى مغامرة مش مأمونة
العواقب.
سعيد : (كالتائه) بلاش يا ستى جواز.
سعاد : لا بلاش دى .أنا عندى واحدة أحسن منها موظفة.
مديحة : نادية يا سعاد. يا ريت يا خويا دى بنت منكسرة

وتعيش.

سعيد : خلاص فضونا من السيرة دي . لادى ولا غيرها.

زينب : ازاي ؟ هتقول ايه يا أستاذ سعيد؟

سعيد : اسكتى بلاش كلام . أنا اللي هتصرف.

مديحة : نمشى احنا بقى تخرج هي وسعاد) .

(اظلام)

المشهد السابع:

(شقة ناهد)

حسين : (فى سخريه) أما أنا جهزت لك حته غنوة للحفلة .

ناهد : صحيح يا حسين؟

حسين : آه وحياة امى اللى ما حلتيش غيرها – غنوة على الجرح.

ناهد : هو الجرح ما صحيح لسه؟

حسين : ايه اللى حصل عشان يصحى؟

ناهد : على رأيك . الجو اتعكر. وأنا قلت لمحمود امبارح أنا مش مرتاحة للشورة دى.

حسين : وقال لك ايه؟

ناهد : قال انتى حرة (يدخل حامد ومحمود ويبدو عليهما الانشغال).

حامد : ايه يا ناهد – الناس دول مش عاجبينك؟

ناهد : أنا محتارة ومش عارفة أقول ايه.

محمود : يا ناهد يا أختى ده جواز – لازم يكون برغبتك وبمنتهى الحرية.

ناهد : اخواته باين عليهم الشدة . متعربين قوى هاروح فيهم فين؟

حسين : انتى هتعيشى معاهم؟

محمود : ولو.. برضة دول مش سهلين والدكتورة بتاع الجامعة دى فيها عقد الدنيا والآخرة.

حسين : دى عاملة زى أم سحلول اللى بيخوفوا بيها العيال.

ناهد : والدعاوى بتاع الخطوبة اللى وزعناها ؟

محمود : ما يهكم كيش نعنذر للناس .
حامد : مش مشكلة كل المدعوين من أهلنا --
حسين : (يضحك فى سخريه) قدر أخف من قدر . واحنا ما
نقدرش على تعبك يا ست ناهد.
ناهد : (تضحك) يا شيخ ! أمال جهزت غنوة الحفلة بسرعة
ليه؟
حسين : بنت عمتى الوحيدة لازم أحبيها فى ليلة العمر.
ناهد : يعنى مش عايز تتخلص منى .
محمود : ليه ! كنت مرمية عليه؟
حسين : أنتم حتخطوا على ليه حلوا عنى أنا مش قدكم . ده انا
غلبان.
حامد : مالكم ومال حسين .
ناهد : أنا باضحك بس.. أنا لى بركة غير حسين. هو اللى
مسلىنى ومواسينى.
محمود : خلاص تجوزيه وتفضوها سيرة.
حسين : (ينظر اليه بشك) ايه ؟ مش قد المقام يا سى محمود؟
بكره أخذ الشهادة وأبقى زيك.
محمود : (يضحك بصوت ملين) ما أنت زى من النهاردة .
وقبل ما تاخذ الشهادة.
حامد : ما تزعلش يا حسين بيهزر معاك.
محمود : لا مش هذار. وحياة أبويا باتكلم جد. بس توافق ناهد
والشبكة موجودة والحفلة بكره فى موعدها.
حامد : أنا ما عنديش مانع على الأقل يبقى زيتنا فى دقيقنا.
أنت ابن عمتنا وأخونا التالت.
محمود : ايه رأيك يا ناهد . ده حل كويس للمأزق اللى احنا فيه.
ناهد : هو حسين كان قال لكم هاجوز؟

حامد : ليه ما هو قدك فى السن وأكبر ما يجوزش ليه .
 حسين : (ينظر بحيرة) انا مش مصدق .
 محمود : وحسين كان طال حاجة بس ما قلش ؟ دى فرصة ما يحلمش بيها.
 حسين : (فى حياء) فعلا دى فرصة العمر بالنسبة لى .
 انا طول عمرى باحب ناهد . وأتمنى أسعدها.
 ناهد : (فى تهور؟ يا حبيبى يا حسين.
 حامد : (بسرور) آمال كنتم ساكتين ليه من زمان.
 محمود : شفتم أنا كاشفكم ازاي ؟
 ناهد : تجرى نحو محمود وتعانقه ثم تعانق حامد) يا حبايى
 يا اخواتى الهى ما اتحرم منكم.
 حسين : (فى نشوة وحيرة) مش عارف أقول ايه؟ احنا فى حلم
 ولا فى علم. ما كنتش فاكرا انكم طيبين بالشكل ده.
 (يعانقهم واحد بعد واحد ثم يقترب من ناهد فيفتح ذراعيه
 لها فتميل نحوه وبسرعة تجرى بعيدا عنه)
 ناهد : اختشى بقه مش وقته.
 (يدخل الأستاذ فرید)
 فرید : يا ترى ايه رأيكم فى العريس؟ أنا شايف انكم مش
 مبسوطين من اخواته.
 محمود : ما فيش نصيب.
 فرید : كده يعنى أبلغه الكلام ده وحفلة بكره؟
 محمود : هتتعملها باذن الله .
 فرید : لمين؟
 حامد : (يضحك) لكتب الكتاب عقبال أولادك .
 فرید : (يضحك) حيرتوني.
 محمود : ما تحترش هنكتب لها على حسين.

فريد :الف مبروك أحسن حل (يتجه الى باب الخروج) عن
أذنك.
ناهد : استنى يا أستاذ فريد (فى نفس اللحظة تدخل سامية)
وأبلة سامية جت كمان. يللا يا حسين ابدأ.
حسين : (يضحك) ابدأ ايه.
ناهد : غنى . لازم نسمعنا الغنوة اللى كنت مجهزها للحفلة.
(الجميع يشجع) أيوه سمعنا. سمع (يصفقون)
حسين : بكره بقه فى الحفلة.
محمود : وده كلام بكره نسمعها تانى مع الناس . لكن ده طلب
خصوصى للعروسة.
سامية : أيوه يا أخى يللا فرح العروسة يللا.
فريد : ممكن نسجلها عشان نسمعها مرة تانى بكره.
حامد : اتكل على الله و غنى خلينا نفرح عروسة حلوة وأمورة
لازم تلبنى طلبها وده شرطنا.
حسين : على عينى . غنوة مش بطالة أهديها للمحبين والعزال
اسمها " من امتى كان اللى انكوى بالحب تاب "

ضيعت أملى فى الهوى وصبحت يا قلبى فى عذاب
وطيف حبك بطول الليل يحاورنى.
أبات وياه يبادلنى
حنين الشوق بنار وعتاب
يللى تلومونى كلكم – وتجرحونى فى وحدتى
أنا بأعود وأرجع وأقول
من امتى كان اللى انكوى بالحب تاب ؟

صحيح فى الحب ناس قدروا على التوبة
وناس دابوا
وناس على الود متعاهدين
وأنا وأنت بقالنا سنين
ومتعاندين
نفيد النار ونطفئها
ونحرق شمعنا فيها
ودنيا خشنا نبنيها بتتحول رماد وتراب
ومن حيرتى ونار حيرتى
أعود وأقول:
من امتى كان اللى انكوى بالحب تاب؟

آه يا قلبى
صابر على ايه - أحوالك بقت تصعب
ده اللى يطاوع عنادك - لازم فى يوم يتعب
سر الزمن قسوته عمره ما لهش حبيب
والحب ده لعب ساعة يكسب وساعة يخيب
وجرح خلفتهولى فى الحشا قايد
ان جه طبيب يعرفه قلت الطبيب كداب
ومن حيرتى ونار حيرتى أعود وأقول:
من امتى كان اللى انكوى بالحب تاب
" ستار "